

# WANTOK

NIUSPEPA BILONG YUMI OL PAPUA NIUGINI STRET - 26 YIA NAU

32 pes

Issue Namba 1,158

Wik i stat long Fonde, Septemba 5, 1996

50 toea



## Asaro graun man kukim Mosbi singsing

• Kumulele Morume bilong Apa Asaro long Isten Hallans provins i bilas na sindaun wantaim tambaran pes, em ol i wokim long graun. Dispela em long "Tumbuan Mask Singsing", em i bin kamap long Sir John Guise pilal graun long Waigani, Mosbi long las wiken, Sarere Ogas 31. Etpela singsing grup bilong Morobe, Madang, Wes Nu Briten, Is Nu Briten, Milen Be, Westen provins na ol Asaro graunman husat i makim hallans rijon i kamap na danis. Planti manmeri na pikinini long Mosbi i bin kamap na amamas long lukim dispela singsing. Lukim stori na moa poto long pes 15. -Foto: Ivan Bayagau.

## BRA komanda kisim bikpela bagarap nau

### VERONICA HATUTASI i raitim

KOMANDA bilong Bogenvil Revolusinari Ami (BRA), Ishmael Toroama i kisim bikpela bagarap nau long bodi bilong em. Na bai nogat sans long stretim bagarap em i gat nau. Ripot i kam long Bogenvil long dispela wik i tok strongpela patrol bilong ol sekyuriti fos long boda namel long PNG na Solomon Ailans i givim hat taim, na moa mekimsave long BRA komanda.

Bikos BRA komanda i bin traim hat tru long brukim dispela patrol na go hapsait long Solomon Ailan long kisim sut marasin. Tasol em i painim hat na kisim taim nau long bus i stap.

BRA komanda i bin kisim bagarap bihainim wanpela pait namel long ol BRA paitman na sekyuriti fos long Toimanapu las mun.

Ripot i tok long pinis bilong mun Septemba sapos BRA komanda ya i no kisim wanpela sut marasin, bikpela bagarap stret bai kamap long bodi bilong em. Na em i ken indai.

Koporol David Ban, wanpela PNG Difens Fos soldia, we i bin gat ripot olsem BRA i bin kisim em olsem kalabus man bilong ol long mun Ogas i bin tokaut namba wan taim long kondisen bilong Toroama. Dispela em bihain tasol long ol BRA i lusim em i go bek long beis bilong em long Arawa.

i go moa long pes 2

### KANAGE BILONG WIK

■ Wanpela lapun man bilong Maprik long Is Sepik i dai stret long dring lolitwara. Em kisim 35t na go long stua. Long stua em pusim 35t i go long yangpela stuakipa na askim: Pikinini! Wanpela Coke i kam na mi stretim nek liklik! Stuakipa kaunim mani na lukim olsem mani i no inap. Em pusim 35t i go bek long lapun papa na tokim em: Sore tru lapun, sapos yu bin kam long asde, em bai orait, yu ken kisim wanpela Coke long dispela mani. Nau em mipela apim prais i go antap pinis long 38t. Yu mas putim antap 3t moa." Stuakipa tok olsem na pusim 35t i go bek long lapun. Lapun sanap tingting i go na pusim 35t i go bek long stuakipa na tok: Em i orait pikinini, mi laikim Coke bilong asde. Jada Wilson Lepwing Drive Gordons, MOSBI



## Amerika bomim Iraq long namba tu taim

OL pait balus na sip bilong USA insait long Persian Gulf i bomim gen ol sampela hap bilong Iraq long asdei (Trinde) bihainim namba wan atek bilong ol long Tunde.

Long Tunde taim ol lain ya USA i bomim Iraq, sampela hap we ol i laik tromoi bom em ol i abrusim.

Olsem na long asdei Trinde, ol USA i bomim Iraq gen.

Dispela ol atek i bringim gutpela toktok i kam long ekting praim minista bilong Australia Peter Costello.

Atek bilong ol Yuniatet Stets (USA) misail long ol Iraq i wanpela bikpela samting tru long was long ol Kurds insait long kantri egensim wanpela bikpela bagarapim tru i ken kamap long ol manmeri, ekting Praim Minista Peter Castello i tok.

Toktok long namba tu raun bilong ol misail atek long Iraq, Mista Castello i tok olsem em i bikpela samting tru long ol intanesenel komyuniti long karim aut ol lo em Yuniatet Nesen (UN) i putim egensim Iraq.

Dispela atek bilong US long Iraq em US presiden Bill Clinton i tok

em wanpela tek we mipela i luk-save na sapoti."

"Na mipela i bilip em i kamapim wanem samting mipela i laikim na Saddam Hussein bai ino inap pait egensim ol Kurds gen."

"Mipela i ting olsem i gutpela long mekim sampela toktok egensim ol pasin em Saddam Hussein i

wok long mekim na i mas klia olsem intanesenel komyuniti ino inap sanap na lukluk tasol long dispela rabis pasin em i wok long mekim egensim olKurds, we i ken kamapim bikpela bagarap tru long ol manmeri," Mista Castello i tok. "Ol Kurds em planti taim i save kisim taim nogut long Iraq, na taim

Gulf War i pinis, i bin kamap klia tru olsem intanesenel komyuniti ino inap sanap na lukluk tasol long wanem samting i wok kamap long ol na Hussein ino ken tanim long ol.

"Laspela taim Iraq Militeri i go long ol pipel ya, ol i pusim ol long ranawe; bikpela hangre i kamap;

ol manmeri i dai long hangre na kol na olsem wanpela bekim bilong dispela, UN i tokaut olsem em bai lukim olsem ol dispela pipel i mas kisim gutpela sindaun.

"Nau ol lain Iraq i salim samting olsem 40,000 ami egensim ol we ol bai kamapim wanpela bikpela bagarap tru long laip bilong ol manmeri na dispela misail o bom atek em toktok bilong USA i go long Iraq long noken mekim dispela kain pasin," Castello i tokim Redio 3AW.

Dispela namba tu taim bilong tromoi ol bom em ol i mekim gen long wanem ol i abrusim sampela ol samting em ol i sapos long bomim asdei. Mista Castello i tok olsem ol US gavman wantaim ol Defence Fos i bin toksave long Australia gavman long dispela samting.

Taim em i kisim askim sapos Australia i ken go aut na sapotim US, em i tok: "Mi no ting. Mi ting ol Britis na Kanada husat i klostu long US i mekim sapot bilong ol i klia. "Mipela i mekim sapot bilong mipela i klia. Mipela i ting dispela em wanpela bikpela samting USA i tokaut. Mipela i luksave na mipela i sapotim tru.

### Iran nogat presa nau long Amerika

IRAN i wok long stap long sait tasol long dispela tabel bilong Iraq, we ol i amamas long lukim olsem birua bilong ol tru Yuniatet Stets (USA) i wok long atekim Iraq. Tupela kantri ya i stap klostu wantaim. Long las mun tasol, ol bikpela save man i tok olsem USA i redi long atekim Iran long bekim bek long wanem samting em Washington i tok ol Iran i sponsaim ol man long bagarapim laip bilong ol pipel.

Tasol nau long skel bilong presiden Bill Clinton, dispela olgeta samting i go long sait bilong Iraq we ol bai kisim taim stret.

"Lukluk bilong USA i go long Iraq i rausim Iran long huk nau," wan-

pela savemen i tok. "Long las mun, ol lain Iran i bin stap aninit long bikpela presa tru i kam long USA. Nau ken em presiden bilong Iraq Saddam Hussein i kamapim trabel gen, na ol Iran lain i ken malolo liklik." USA i wok long traim kamapim wanpela intanesenel kempain Iraq lukim olsem intanesenel komyuniti i rausim dispela Islam komyuniti logn wanem ol i mekim ol pasin bilong terosis egensim ol lain long West.

Iran i wok long mekim kros pasin egensim USA long kros egensim ol bom atek long Saut bilong Iraq taim Bill Clinton i laik sanap gen long lekseen. "Taim Clinton i laik sanap gen long lekseen, em i laik

painim rot long atekim Iraq long mekim em i gat moa pawa long em yet na rausim pawa long ol narpela pati," wanpela saveman i tok.

Iran i bin pait wantaim Iraq long 1980 i kam inap long 1988 na stap namel tasol long Gulf War taim Iraq i laik kisim Kuwait. Iran i kros egensim ol Iraq long traim kisim Kuwait na tu kros egensim USA long kamapim pait.

Kros namel long USA na Iran i kamap long Ogas taim Defence Seketeri bilong USA William Perry i tokaut olsem Iran tasol i mekim na 19 USA ami i bin dai long taim wanpela bom i pairap. Na USA bai redi logn bomim ol Iran.

### PLIS RIPOOT

#### Mosbi, Nesanel Kapitel:

Ripot we Plis Komisina Bob Nenta i putimaut long dispela wik i soim olsem ol kain kain trabel we i kamap long kantri i wok long slek liklik.

Mista Nenta i tok ol trabel we i sut long kilim dai narapela man, wokim stilpasin taim ol i holim ol samting bilong pait na tu stilim ka i wok long go daun. Pasin bilong bagarapim meri em i stap antap yet.

Mista Nenta i tok, i kam inap long Ogas 24, plis i gat rekod long 124 bikpela trabel we i kamap long olgeta hap bilong kantri.

Tripela em ol birua long kilim dai narapela man. Long dispela, wanpela i bin kamap long NCD, narapela long Madang na las em long Manus.

Long pasin bilong wokim nogut na bagarapim meri, Mista Nenta i bin tok insait long wanpela wik, tripela trabel long dispela i wok long kamap. Long 21 bilong dispela kain trabel plis i ripotim, eitpela i bin kamap long Lae olsem plis ripot i soim.

Planti long ol dispela trabel ino inap long kamap sapos ol meri yet i was gut long wokabaut bilong ol, Mista Nenta i tok. Olsem na em bin askim strong ol meri long keful long abrusim dispela kain trabel ino-ken kamap.

Nesanel Kapitel Distrik i bin topim ol taun insait long kantri wantaim ripot long 58 keis bilong ol bikpela trabel. Tripela bilong ol em trabel we ol man nogut i kamapim long ol meri, eitpela i wokim stil pasin na siksipela keis bilong stilim ka. Ol plis i kisim pinis sampela long ol man husat i wokim ol trabel.

#### LAE, Morobe :

Wanpela man Simbu i bin dai na faopela pasidia long ka i bin kisim bagarap long wanpela birua long ka we i kamap long Lae long dispela wik.

Plis long Lae i tokaut long nem bilong dairman olsem Nalai Kaupa husat i gat 20 krismas. Em i bilong ples Koronama insait long Sinasina eria bilong Simbu provins.

Em bin dai bihain long ka we em i draiva long en i bin abrusim rot na kapsait klostu long Papuan kompaun. Plis i bilip olsem ol lain husat i bin stap insait long dispela birua em ol wokman bilong wanpela sekyuriti kampani. Bos bilong ol plis long Lae siti, Tony Wagambie i tok draiva i bin lus kontrol long brek bilong ka na kamapim birua we em i bin dai long en. Ol i tok tu olsem draiva ya i bin dring spak na draiv na olsem dispela birua i kamap.

Ol arapela foapela man i stap nau long Angau Memoriel haus sik.

#### Lae, Morobe:

Kanding bilong holim ol trabel man bilong mun Julai long dispela yia i soim olsem NCD em i topim lista.

Long ol ripot i kam long opis bilong kostel na boda komanda, Asisten Komisina Tom Kulunga, plis i bin rekotim 837 ol trabel i kamap insait long kantri long mun Julai.

Long ol trabel we plis i ripotim, ol i autim olsem ol bin holim pasim 379 pipel long wokim trabel we NCD igat bikpela namba long ol wantaim 313 keis em ol plis i ripotim. Long dispela, plis i bin holim pasim 128 trabel man long en.

Westen provins i bin kamap namba tu wantaim 304 long ol trabel we ol man nogut i wokim. Long dispela, ol bin holim pasim 52 man pinis. Long 12 pela keis bilong trabel long laik haitim na karim smok nogut mariwana na ol marasin nogut olsem, plis i bin holim pasim 12-pela pipel olgeta husat i stap insait long ol dispela trabel ya.

Lae insait long Morobe provins i bin kamap namba tri wantaim kanding bilong 188 keis. Long dispela, plis i bin holim pasim 78 pipel. Hailens rijon i bin kamap namba foa long lista wantaim Sauten rijon i bihainim ol na Niugini Ailians i bin kamap las wantaim 44 keis long ol trabel we ol i ripotim kamap na 36 pipel ol i holim pasim pinis long wokim ol dispela trabel.

## Bung bilong ol meri bringim fridom long Arawa

BUNG bilong ol Bogenvil sios meri long Arawa i bringim sampela gutpela kaikai long ol pipel long sentrel Bogenvil.

Long ol ripot we Wantok i kisim long Arawa long dispela wik, planti moa pipel i wok long i go i kam long Arawa taun. Na ol pipel i pilim olsem ol i wok long wokabaut raun long taun long laik bilong ol wantaim nogat pret long ol BRA paitman o ol sekyuriti fos memba.

"Ol man nating long Arawa i pilim dispela samting i kamap stat yet long taim ol meri i bung long Arawa. Sapos i nogat man i raun wantaim gan long Arawa, bai mipela i pilim olsem ol i stap long gut taim," wanpela gavman opisa long Arawa i tok.

Em i tok long wanpela mun nau, sentrel Bogenvil distrik i stap isi wantaim nogat pait i kamap namel long ol sekyuriti fos na BRA.

Bung bilong ol meri i bin pinis long las wik Fraide. Na long dispela wik, ol bin go long ol wanwan distrik bilong ol.

Bihainim dispela bung, ol pipel long sentrel Bogenvil i wok long lusim pret tingting na pasin. Na dispela i strongim hatwok bilong kamapim gutpela sindaun long ol eria we gavman i lukautim. Na long ol BRA lain tu.

Narapela gutpela senis tu em moa pipel i wok long go long Arawa long kisim helt sevis. Na gat sans long baim ol samting long stua insait long taun.


## BRA komanda kisim bikpela bagarap nau

*i kam long pes 1*

Koporal Ban i bilong Wés Nu Briten provins.

Long ol ripot, Koporal Ban em i poroman bilong Bana Topesi, husat i brata bilong wanpela strongpela sentrel Bogenvil BRA komanda. Na olsem pren bilong ol, Bana wantaim ol lain BRA bilong em i bin kisim Koporal Ban long go stap wantaim ol long las mun, wanpela wik tasol bihain long Sajen Samuel Petueli husat ol Bogisago BRA long Buin i bin holim em olsem kalabus man i ranawe long ol na go bek long ol sekyuriti fos long Arawa.

Tasol long stori bilong Koporal Ban, ol ripot i tok long bik moning bilong Fraide Ogas 29, ol BRA paitman i bin go lusim em long Arawa wantaim wanpela trak i pulap long ol gaden kaikai i go wantaim em. Na long stap bilong em wantaim ol long Panguna, ol bin lukautim em gut tru.



### Laki bilong ol!

Long lephan i go long rait em Ombas Umugan, Rantia Yangae (fron), Kila Dibula na Meru Damara (baksait). Dispela 4-pela wokman bilong Nesanel Kapitel Botanikel Gaden i laki ya. Ol bai go long Kens na stap insait long tripela wik trening wantaim Kens Okid Senta. Na kisim moa save long planim na lukautim okid long nupela kain we bilong tude. - Ivan Bayagau.

# Gavman bai givim K1.5 milien long Bogenvil

### VERONICA HATUTASI i raitim

EITPELA interim atoriti long Bogenvil bai kisim K1.5 milien aninit long nupela ogenik lo-bilong Provinsal na Lokol Level gavman gren i go long ol provins.

Dispela bai helpim tru long givim gavman sevis na kaikai long ol pipel husat i sot tru long kaikai long ol kea senta. Bikos Bogenvil Trensisenel Gavman i sot long mani long lukautim ol.

Tasol bipo long gavman i givim dispela hap mani, dipatmen bilong Provinsal Afeas wantaim Bogenvil Trensisenel Gavman (BTG) i mas kamap long wanpela tingting o tokorait long lukim olsem ol i bihainim ol askim bilong Fainens dipatmen long yusim gut dispela mani.

Provinsal Afeas ministra, Peter Barter i bin tokaut long dispela mani we gavman i katim bilong ol lokol level gavman long Bogenvil. Dispela em long taim em bin go lukluk raun long

Tasol bipo long mani kam aut, Provinsal Afeas na Bogenvil Trensisenel Gavman mas kamap long wanpela tingting long bihainim askim bilong Fainens dipatmen long yusim gut dispela mani.

Bogenvil long las wik.

Long skruim toktok long dispela hap mani i go long ol interim atoriti, Minista Barter i tokim siaman bilong ol atoriti na ol sinia publik sevan olsem bikos Bogenvil i no stap yet insait long nupela provinsal gavman rifom inap long neks yia, ol provinsal na nesanel atoriti husat i lukautim dispela samting bai stretim sampela samting. Na tu kamap long wanpela tingting long lukim olsem bai gat gutpela lukaut long rot bilong yusim dispela

## Bogenvil publik sevan pretim BRA

OL publik sevan long sampela eria bilong saut na sentrel Bogenvil i pret nau long laip bilong ol.

Ol i pret bikos ol soldia bilong PNG Difens Fos i lusim pinis dispela eria. Na nogut ol paitman bilong Bogenvil Revolusinari Ami (BRA) i kamap na bagarapim o kilim.

Dispela em long ol eria olsem Aropa, Manetai, Koromira, Piano, Tabago na Haisi.

Provinsal Seketeri bilong Bogenvil, John Siau i autim dispela toktok taim Minista bilong Provinsal Afeas, Peter Barter i go lukluk raun long ailan long las wik.

Em i tok em i no moa seif long ol publik sevan long wok long ol dispela eria. Na sevim ol pipel husat i laikim gavman sevis.

Em i tok nau yet planti publik sevan i lusim pinis dispela eria. Bikos ol i pretim tu laip bilong famili bilong ol. Olsem na wanwan publik sevan tasol i stap na wok wantaim bikpela pret long ol paitman bilong BRA.

Mista Siau i tok moa olsem planti pipel insait long bikailan Bogenvil i no kisim ol gavman sevis. Bikos i nogat inap mani long karimaut wok bilong ol. Antap tu long dispela, i nogat gutpela rot long kisim na salim toktok. Na tu i gat hevi bilong trenspot long ailan.

## WANTOK

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea

Published Weekly, Thursday, for  
Word Publishing Company Pty. Ltd.

Printed and published by Anna Solomon of Bittem Place, Gordons, at Allotment 2, Section 209, Spring Garden Road, Hohola, for Word Publishing Co. Pty Ltd.

Acting General Manager and Group Editor in Chief: Anna Solomon

Papers distributed by air throughout PNG.

Advertising Manager: James DeLisle

Available by airmail subscription within Papua New Guinea and overseas.

Editor of Wantok: Leo Waliwa

Australia and New Zealand Representatives: Tonkin Media Pty. Ltd. P.O. Box 101, Avoca Beach, NSW, 2251 Australia Sydney, James Tonkin, (043) 851746, Melbourne, Glen Smith, (03) 8072311

Advertising Deadlines: Display Bookings and Camera ready copy: Tuesday midday. Classified Advertising: Wednesday 2pm.

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.

Ol ripot bilong namba 27 Saut Pasifik Forum

Taiwan na Korea no bihainim agrimen-FFA

BIKNEM fiseris ejensi bilong Saut Pasifik, Saut Pasifik Forum Fiseris Ejensi (SPFFA) long dispela wik i mekim strong-pela toktok egens long sampela pasin bilong fising bot bilong Taiwan na Korea insait long rijon (Saut Pasifik).

Enuel ripot bilong Saut Pasifik FFA i tokaut olsem Ejensi i bin wok long traim long paitim toktok na kamapim multilateral agrimen o tokorait long larim ol bikpela longlain albako sip bilong Taiwan long painim pis insait long rijon.

Dispela ripot bilong SPFFA i tok olsem wanpela bikpela astingting long watpo na ol FFA kantri i gat tingting long kamapim wanpela multilateral agrimen i bikos ol longlain sip i no save bihainim ol lo na tu

ol arapela tokorait i stap long ol i mas go sua na givim ripot.

Ripot ya i tok tasol Taiwan i strong yet na i laik go hetim bailateral agrimen wantaim ol kantri insait long Pasifik.

Ol Pasifik kantri husat i kam aninit long SPFFA i no traim long pinisim bailateral agrimen. Na FFA i tok Taiwan bai senisim ol pasin bilong en taim i gat nupela agrimen.

Ripot bilong FFA i tokaut olsem planti longlain fising sip bilong Korea long nau yet i wok long painim pis insait long Pasifik.

"Ol purse seine opereta bilong Korea i stretim pinisim na i gat gutpela pasin bilong givim ripot bilong pis ol i kisim. Tasol pasin nogut bilong ol longlain sip

long i no save givim gutpela ripot long pis ol i kisim i stap wankain yet," dispela ripot bilong FFA i tok.

Ripot ya i tok sampela seksen bilong longlain indastri bilong Korea i soim pinis tingting na laik bilong ol long paitim toktok long wanpela multilateral agrimen. Tasol rot bilong kamampim kain agrimen olsem i stap long tudak bikos long nem gut bilong ol dispela sip long sait bilong luksave na bihainim ol agrimen na kondisen.

Ol memba bilong FFA em Australia, Cook Ailan, Federeted Stepe bilong Maikronesia, Fiji, Kiribati, Marshall Ailan, Nauru, Nu Silan, Niue, Papua Niugini, Solomon Ailan, Tonga, Tuvalu, Vanuatu na Westen Samoa.

WANTOK

NIUSPEPA BILONG PAPUA NIUGINI STRET

Sik bilong Waigani noken holimpas K1.5 milien bilong Bogenvil

Sampela wik i go pinis bikpela ripot i kam aut olsem planti tausen manmeri na pikinini long ol kea senta long Bogenvil i bin kisim taim stret long hangre. Bikos Bogenvil edministresen i nogat mani long baim kaikai na lukautim.

Bihainim dispela ripot, Provinsal Afeas na Lokol Level gavman minista, Peter Barter i go lukim sindaun na laip long ailan long ai bilong em yet. Na tokaut olsem gavman bai salim K1.5 milien i go long helpim ol trangu manmeri na pikinini long ailan.

Long dispela mani, K800,000 bai go long 8-pela interim atoriti-wanwan bai kisim K100,000. Na K700,000 bai go long baim kaikai na ol samting olsem bilong planti tausen trangu manmeri na pikinini long ol kea senta.

Tasol pastaim long gavman i salim dispela mani, Provinsal Afeas dipatmen na Bogenvil Tremsisenel Gavman i mas kamap long wanpela tingting long bihainim askim bilong Fainens dipatmen long yusim dispela mani.

Sik bilong gavman long planti pepa wok i save holim mani i stap longpela taim long Waigani. Dispela kain sik i noken holimpas K1.5 milien bilong Bogenvil.

Larim mani ya i go kwik na helpim ol tran-gu brata na susa long Bogenvil, husat i kisim bikpela mekimsave nau.

Solomon Ailan namba 2 PM no amamas long Australia midia

NAMBA tu Praim Minista bilong Solomon Ailan, Danny Phillip, i tokaut olsem em i no amamas long ol midia (nius) oganaisesen bilong Australia long ripotim ol ripot we i no trupela long ol wok bilong katim timba na diwai insait long kantri bilong em.

Deputi Praim Minista Mista Phillip i autim belhevi bilong em insait long Saut Pasifik Forum long Majuro insait long Marshall Ailan long dispela wik Tunde Septemba 3, 1996.

Em i tok olsem midia bilong Australia i wok long daunim na bagarapim nem bilong Solomon Ailan aninit long ol ripot we i no gutpela, stretpela na trupela.

Taim em i autim belhevi bilong em long dispela kibung bilong ol Saut Pasifik kantri lida, Mista Phillip i tok Australia na Nu Silan i ken givim sapat na strong bilong tupela long ol hevi bilong envairoment. Em i tok tupela kantri ya i ken givim

sapat na strong bilong tupela long sait bilong givim helpim mani sapos i nogat gutpela winmani i kamap long wok bilong katim diwai na timba na salim i go long ovasis i pundaun.

Tasol em i tokaut olsem midia bilong Australia i no givim gutpela na bikpela luksave long fores polisi bilong Solomon Ailan.

"Bikos long dispela krangi pasin bilong midia bilong Australia, gutnem bilong gavman bilong mi na Solomon Ailan olsem wanpela kantri i kisim nem nogut bikos ol i no kisim gutpela na stretpela infomesen na givim ripot," Mista Phillip i tokaut long wanpela nius konprens long Saut Pasifik kibung bilong ol Pasifik ailan kantri long Majuro.

Em i tok wanpela ripot we foren koresponden bilong ABC televisen i sutim tok long Solomon Ailan gavman long korapsen pasin na tu long stap

lukluk tasol na ol loging kampani bilong Esia i bagarapim timba fores bilong kantri.

Mista Phillip i tok gavman bilong em i wok long lukluk long wanpela gutpela na strongpela forestri na riaforestesen developmen program.

Na tu i wok long stretim ol samting long kamapim wanpela kod ov praktis we bai kam aninit long rijinol kod we i bin kisim tokorait long Saut Pasifik Forum i bin kamap long Madang long las yia.

"Mipela i bilip olsem long sevrim fores risos, mipela i mas karim aut loging operesen aninit long ol gutpela lo," namba tu Praim Minista bilong Solomon Ailan i tok.

Tasol em i tok dispela i no inap helpim gavman sapos i gat kankain toktok i kamap we i autim tasol ol samting we i nogut. Na i no lukluk long ol gutpela samting.

Downer no save gut long Bogenvil hevi-Chan

PAPUA Niugini Praim Minista, Sir Julius Chan, i tokaut long saut Pasifik Forum long dispela wik olsem em na gavman bilong em i nogat hevi wantaim Fores Minista bilong Australia, Alexander Downer, bikos em (Downer) i nogat gutpela save long hevi Bogenvil.

Praim Minista Sir Julius i tokaut long forum bihainim ol toktok bilong Mista Downer i bin kamap sampela taim i go pinis long hevi long Bogenvil. Long toktok bilong em, Sir Julius i tok olsem em wantaim gavman bilong em i no amamas long ol toktok bilong Mista Downer. Na tu Sir Julius i givim tok lukaut i go long Mista Downer. Long mun Julai long dispela yia, Mista Downer i bin mekim gavman bilong Papua Niugini i kros liklik taim em i tokaut olsem em bai katim helpim Australia i save givim long PNG Difens Fos bikos PNG i no yusim long stretpela rot na pasin ol yurikois helikopta long Bogenvil we Australia i givim.

Plantu toktok i bin kamap olsem ol sekyuriti fos long Bogenvil i wok long yusim ol helikopta Australia i givim long pait egensim ol paitman bilong BRA. Tasol ol sekyuriti fos i sapos long yusim ol dispela helikopta long saplaim kaikai, karim ol kago, mekim medical wok na tu mekim ol arapela wok na i no long yusim long pait na kilim ol pipel long Bogenvil.

Praim Minista Chan i sutim toktok i go long Mista Downer long kisim ol ripot na infomesen long Bogenvi hevi long televisen.

"Em (Downer) i kisim ol ripot bilong em long televisen. Em i no luksave o klia gut long hevi long Bogenvil na tu wanem samting gavman bilong mi i wok long mekim. Em i lukim na harim long televisen na tok olsem mipelai asua o krangi o yusim ol helikopta krangi," Sir Julius i tok.

Ekonomik hevi daunim developmen

OL BIKPELA ekonomik hevi i wok long daunim developmen na standet bilong laipstail bilong planti ailan memba kantri bilong Saut Pasifik Forum. Dispela toktok i kam long Seketeri Jenerel bilong Saut Pasifik Forum (SPF), Ieremia Taba. Mista Tabai, wanpela olpela presiden bilong Kiribati, i no kolim nem bilong wanem ol ailan memba kantri bilong SPF i bungim hevi long ekonomi bilong ol. Tasol i gat luksave i stap olsem ol ailan kantri husat i bungim bikpela hevi tru em Cook Ailan, Federeted Stet bilong Maikronesia, Marshall Ailan, Nauru, Solomons, Tuvalu na Vanuatu i wok long bungim bikpela ekonomik hevi. Cook Ailan na Nauru long dispela yia i no baim ol bikpela ovasis dinau bilong tupela.

Mista Tabai i tok ekonomik wok insait long rijon i stap wankain yet na i nogat wanpela bikpela senis i kamap. "Wol tred na ekonomik envairomen i wok long senis klostu klostu. Tasol dispela i no kamapim wanpela gutpela samting long ol forum ailan kantri," seketeri jenerel bilong SPF i tok. Tabai i tok bai moa gutpela long SPF i lukluk na paitim toktok long dispela bikpela hevi insait long rijon. Bikos dispela bai helpim ol lida bilong wanwan memba kantri bilong forum long mekim ol disisen long kamapim ekonomik senis o rifom long stretim dispela hevi. Em i tok seketeriat bilong forum i redim pinis wanpel eknomik polisi na tu ol impoten pepa bilong tarif rifom na invesmen polisi. Foren Minista bilong Marshall Ailan, Phillip Muller, i tok ekspiriens i bin soim olsem i gat ol hevi i stap long ol kantri husat i gat narakain prairiti na tingting long traim na wokbung wantaim. "Mipela i mas skelim gut ol hevi, samting na paitim toktok na kamapim ol samting we bai helpim mipela long daunim dispela hevi. Mipela i mas wokbung na helpim wanpela na arapela," Mista Muller i tok.

WANTOK NIUSPEPA BILONG OL PNG STRET P O Box 1982 BOROKO Telepon namba: 3252500 Feks namba: 3252579 PE BILONG WANPELA YIA 52 NIUSPEPA PLES AIR Mosbi K30.00 Arapela PNG eria K60.00 Australia na Nu Silan K92.00 Esia pasifik na Japan K123.00 Amerika na Yurop K180.00



# Polis painim dai bodi long gaden

YAKAM KELO i raitim

KIMBE polis i painim bodi bilong wanpela man long as bilong gaden banana long Septemba 2 bihain long em i dai pinis. Polis i bilip ol i mas kilim man ya long Ogas 30 o Septemba 1 na haitim bodi bilong em aninit long gaden banana.

Bos bilong Kimbe polis Supritenden Gion Kawat i tok wanpela yangpela meri i bin painim dispela dai bodi long Mande na ripot long polis. Polis i kisim bodi bilong man ya i go long Kimbe haus sik we ol lain bilong em i kam luksave long en. Man ya em Aipos Ai bilong Enga provins.

Mista Kawat i tok bodi bilong man ya inap long sting na tanim wantaim graun tasol ol i painim bodi hariap.

Bali pipel long Wes Nu Briten provins bai givim K4,000, tupela pik na sampela kaikai i go long ol Simbu pipel long Kimbe taun long tude. Dispela em wanpela bel kol kompensesen.

Ol pipel bilong Simbu provins husat i stap long Kimbe i sasim K22,000 kompensesen i go long ol pipel bilong Bali bikos long dai bilong wanpela yangpela man Simbu long Ogas 20 long dispela yia.

Mista Kawat i tok ol yangpela bilong Bali i bin go dring spak long Kimbe taun long Ogas 16 na ol i pait wantaim dispela yangpela man Simbu. Man ya i bin kisim bikpela bagarap bikos ol manki Bali i sutim em long naip we em i kisim bikpela bagarap.

Bos bilong Kimbe polis i tok man Simbu ya i stap long haus sik inap Ogas 20 we em dai.

Mista Kawat i tok polis i holim pinis wanpela man Bali na arapela i no yet.

Ol pipel i bilong Simbu long Kimbe i askim Bali pipel long baim K22,000 kompensesen mani. Planti miting polis i bin askim pinis i no kamap gut. Tasol long Fonde 4 Septemba, em

## ... Simbu sasim Bali K22,000

long tude, bai ol i bung. Bali pipel i redim tasol K4,000 na ol kaikai bilong givim olsem bel kol mani bilong stre-tim bel nogut bilong ol Simbu pipel.

Polis long Kimbe i holim pinis tupela CIS woda bilong Kiamata haus kalabus long kilim indai wanpela yangpela manki bilong Menyamya Morobe provins.

Polis ripot i tok ol CIS woda i bin holim wanpela patrol long painim ol man i bin ronawe long haus kalabus mun Februari long dispela yia. Ol i bin go kamap long Poinini ples long Oil Pam Blok na sekim ol haus. Na ol i holim manki Menyamya nating na kikim em long su, paitim long as bilong sotgan inap em i ai raun. Ol i kisim em i go long haus sik tasol em i kisim bikpela bagarap na indai.

Polis ripot i tok manki Menyamya em James Agule Sakupuni bilong Ifanke ples long Menyamya Morobe provins.

Tupela woda man bilong CIS em Albert Telek bilong ples Ajuvet long kandrien, Wes Nu Briten provins na Kamane Nabuin bilong ples Lalang long Finsafen, Morobe provins. Polis bai sasim tupela long kilim man.

Polis ripot i tok manki ya i no wanpela bilong ol man i ronawe long haus kalabus. Em gutpela man tasol ol polis i kisim em nating.

Namba olsem 10-pela raskel man i bin haitim pes bilong ol na stilim mani na ol samting long stua bilong wapela man Paul Mapeo long ples Vogevoqe long Wes Kove. Mak bilong ol samting i bin olsem K3,615.77 long ol stua kago na mani tu wantaim. Dispela stil pasin i bin kamap long Ogas 28.

Ripot i tok ol i haitim pes bilong ol long laplap na holim tupela hom med sotgan na wanpela fektori sotgan. Arapela i holim ol sap samting olsem naip na tamiok.



Hohola bai kisim nupela hostel • Hohola Gavman Hostel em wanpela olpela na lapun hostel long Mosbi. Minista bilong Hausing Robert Nagle i tokaut long gavman bai rausim hostel ya na wokim nupela. Nau yet i gat tripela olpela hostel istap.

# Yuropien Yunien i laikim moa pipel go skul long Yurop

JOE KANEKANE i raitim

MAN i go pas long opis bilong Yuropien Yunien long PNG Dr David Macrae i askim pinis olgeta pipel long kauntri husat i laik kism moa skul long lukluk long ol skolasip em opis blong em i save givim.

Dr Macrae i tok olsem em i laikim ol pipel long PNG long lukim dispela ol skolasip long wanem planti spes i stap long ol sumatin na ol pablik sevis wok-lain long go long Yurop na stadi.

Em i tok olsem em i laikim ol meri long tingting strong long ol kain skolasip olsem long wanem sans bilong ol meri long winim i moa long ol man.

"Mi laik askim ol manmeri husat i gat sans long winim dispela skolasip long aplai long wanem, mipela i wet tasol long glasim aplikesen bilong ol sumatin," em i tok.

Dr Macrae i bin givim dispela tok salens taim em i givim tiket long 12-pela Papua Niugini wok-lain husat bai go wokim stadi

bilong ol long Inglen.

Em i tokim ol olsem Inglen i gat planti samting i narakain liklik long Papua Niugini na bai ol dispela lain sumatin i lainim planti samting taim ol i stap long dispela hap.

Wanpela loya husat i bai go wokim masta digri bilong em, James Wanjik long dipatmen bilong deputi praim minista i tok olsem skul bilong em bai helpim PNG long taim em i pinis.

Mista Wanjik husat bai stadi long ol main na petroleum i tok olsem; long pinis bilong skul bilong em bai em inap long helpim PNG long glasim sampela to bilong ol mainim na petroleum.

Mista Joseph Lelang wanpela ikonomis bilong Fainens dipatmen i skelim wankain tingting wantaim James.

Em i tok olsem Inglen i save givim gutpela skul long ikonomiks

na em i hamamas olsem em i gat sans long go stadi long hap, long wanem save em i kisim bai helpim em long wokim ol wok plen bilong kantri long ol yia bihain.

Wanpela meri tasol i stap long dispela grup, em Mrs Angela Mageto husat bai wokim masta digri bilong em.

Dispela em i namba tu taim bilong em long go long hap, long wanem em i bin stap wanpela yia na stadi bilong em i kamap gut tru na ol tisa bilong em i laikim em long go bek gen.

Mrs Mageto i skelim stori blong em long wanem samting ol nupela sumatin i ken bungim taim ol i kamap long Inglen we ol dispela lain i hamamas long harim.

Ol lain husat bai go em, Eric Sikam, Fancis Auo, Jeremiah Andrew, Abraham Masu, Joseph Lelang, James Wanjik, Charles Yala, Titus Kakul, Kilori Sepoe, Jacob Taru, Joh Rave na Mrs Angela Mageto.



## Minista Nakikus askim ol kampani long lukaut long ovasis helpim grup

MINISTA i lukautim ol bisnis wok long kantri, Nakikus Konga i askim ol praiwet kampani long PNG long lukaut gut long ol tokorait bilong mekim bisnis, em ol i mekim wantaim ol helpim grup insait long Pasifik rijon.

Dispela em ol helpim grup insait long rijon husat i save givim mani long wok developmen insait long Papua Niugini.

Minista i mekim dispela toktok bikos em i tok ol helpim grup i save wansait long ol praiwet kampani long kantri bilong ol. Na wanem kain tokorait ol i mekim wantaim ol bisnis kampani long hia, dispela tokorait bai wansait long helpim ol kampani long kantri bilong ol yet.

Minista bilong Komes na Industri, Nakikus Konga i bin mekim dispela singaut long Mosbi las wik long Trinde, Ogas 28. Dispela em long taim em i tokaut long de bilong PNG Made Tred Fe.

PNG Made Tred Fe em bikpela so taim bilong ol kampani insait long Papua Niugini long soim kankain pro-

duk em ol i save wokim insait long kantri olsem smok, kankain loliwara, kaikai, klos laplap, bilum na kankain at na kraf olsem kafing, na sampela moa. Astingting bilong dispela so em long mekim ol pipel i luksave long baim ol dispela prodak em i kamap long kantri, na lus tingting long ol ovasis prodak. Na dispela bai strongim ol kampani husat i mekim ol prodak ya long kamap bikpela. Na strongim bisnis wok bilong kantri.

So ya bai i kamap long tripela de long mun Oktoba long Sir John Guise Stadium, Mosbi. Dispela em long wankain hap we so i bin kamap long en las yia. So bai kamap long Fraide Oktoba 11, 12 na pinis long Sande 13.

Siaman bilong Manufacturers Kaunsil long PNG, Wayne Golding, na Siaman bilong PNG Made Tred Fe, Mal Lewis i tok planti gutpela samting bai kamap long dispela tripela de so long stadium. Na bai gat planti gutpela samting we ol pikinini na studen wantaim bikman meri bai gat bikpela laik long lukim.

# Ol Viles Kot opisal long Aitape laik stop wok

**FELIX RAMRAM i raitim**

Ol Viles Kot opisal long Aitape insait long Sandaun provins i gat tingting nau long stopim olgeta wok bilong ol.

Dispela tingting bilong ol i laik stopim wok bilong ol i bihainim ol paul toktok i stap namel long Dipatmen bilong Fainens long Waigani long Mosbi na provinsal treseri long Vanimo. Ol paul toktok namel long tupela gavman oganaisesen ya i mekim ol Viles Kot majistret wantaim ol opisal bilong ol i no kisim pe bilong ol. Bikos long dispela as, ol Viles Kot opisal i no karim aut wok bilong ol gut stat long mun Mas long dispela yia (1996). Ol Viles Kot majistret wantaim

ol opisal bilong ol we *Wantok* i toktok wantaim ol i tokaut strong olsem ol bai i mekim ol liklik wok tasol i go inap ol i kisim pe bilong ol. Ol i tok taim ol i kisim pe bilong ol, ol bai go het gen long mekim wok bilong ol gut long komyuniti na ples bilong ol.

"Mipela i no ol animol ol i kolim donki bilong ol politisen na ol bikpela gavman opisa husat i sindaun long Waigani na fainens opis long Vanimo. Mipela olgeta i man na i mas i gat mani long mekim wok bilong mipela na tu long baim mipela. Nogat mani, nogat wok," ol Viles Kot opisal long Aitape i tokim *Wantok*.

Ol i go het na tok gavman bilong Praim Minista Sir Julius

Chan na namba tu bilong em na Fainens Minista, Chris Haiveta, i giamanim ol pipel na tok olsem i gat planti mani. Tasol ol i askim bilong wanem as tru na planti hevi bilong lo na oda i wok long kamap insait long kantri.

Ol Viles Kot opisal bilong Aitape i tok ol gavman dipatmen na divisen i nogat mani long mekim wok na dispela i as bilong ol prosekna arapela wok i pundaun. Bikos long dispela asua, ol pipel bilong Papua Niugini i bugnim bikpela hevi.

"Taim wanpela liklik lain insait long kantri i wok long kaikaim olgeta mani na risos, ol pipel i bungim hevi long laip na sindaun bilong ol," ol Viles

Kot opisal bilong Aitape i tokim *Wantok*.

Ol i tok long nau yet, ol i wok long laik na taim bilong ol. Ol i sindaun na harim kot o nogat, em laik bilong ol tasol. Bikos ol i tok olsem ol i mas painim kaikai long lukautim famili bilong ol tu.

Ol i tok planti taim ol i save yusim mani bilong ol yet long baim transpot i go i kam long mekim wok bilong ol. Na mani ol i save spenim i winim mak bilong mani ol i save kisim long potnait long wanpela mun. Ol i tok ol i gat tingting nau long stop long mekim wok, maski sapos Viles Kot supavaisa, Jack Sukap, i askim ol long go het na mekim wok inap ol i kisim pe bilong ol.

## Baset 97 mas helpim ol pipel-Namah

"PLANTI Papua Niugini pipel i save wokhat long painim mani na kaikai long lukautim famili bilong ol. Antap long dispela, ol i mas i gat mani long baim na kisim gutpela helt sevis, edukesen na tu ol arapela gavman sevis. Tasol planti gavman sevis i no save go aut long ol pipel bikos i nogat gutpela rot, bris, ples balus na ol arapela infrastraksa," wanpela olpela redio anaunsa na politisen bilong Sandaun provins, Rex Namah, i tok.

Bihainim dispela toktok bilong em, Mista Namah i laikim olsem Chan/Haiveta gavman i mas kamapim gutpela 1997 baset long helpim ol pipel long rausim sampela hevi bilong ol.

Em i tok ol gavman bilong bipo na tu bilong nau yet, i wok long lusim tingting long astingting we i stap insait long mama lo bilong kantri. Em i tok ol wok developmen i kamap i mas lukluk long helpim olgeta pipel na i no long pulmapim poket bilong wanpela na tupela man tasol.

Em i tok stat long taim kantri i kisim indipendens, PNG i kamapim 5-pela nesenel gol na dairektiv prinsipel we kantri i mas luksave na bihainim. Em i tok dispela 5-pela gol o astingting i karamapim wok politik, sosel na ekonomik o bisnis wok bilong ol pipel bilong dispela kantri.

"Wanpela bilong ol dispela astingting em long kamapim planti gutpela savemanmeri. Long wankain taim wanwan man na meri i mas stap fri wantaim nogat samting i pasim em long mekim o toktok na go long wanem hap em i gat laik. Arapela i toktok long olgeta pipel husat i sitisen bilong dispela kantri long kisim wankain luksave. Na long wankain taim ol pipel i mas hap bilong developmen i kamap long kantri na ol i mas kisim kaikai bilong ol wok developmen i kamap," olpela Sandaun provinsal politisen i tok.

Mista Namah i tok ol baset bilong ol yia i go pinis na tu bilong tude, gavman i save lukluk tasol long developim ol bikpela taun na siti. Na i no save tingting long developim ol liklik provins, taun na ol distrik na sab distrik insait long kantri. Em i tok dispela i kalabusim ol pipel long ol ruel eria long kisim ol sevis we ol i sapos na tu i gat rait long kisim.

Em i tok Sandaun i wanpela bilong tupela provins we i no save kisim bikpela mak bilong mani taim nesenel gavman i brukim nesenel baset long olgeta yia.

"Mipela ol pipel i askim nau Chan/Haiveta gavman long givim luksave long mipela long 1997 baset. Bikos provins bilong mipela i save givim bikpela mani i go long nesenel baset aninit long timba risos bilong provins," Mista Namah i tok.

Em i tok ol nesenel prosek insait long provins we i kisim planti yia long nesenel gavman long kirapim na pinisim em Vanimo/Grin Haiwe, Aitape/Lumi rot, Lumi/Edwaki na Amanab long bungim Vanimo/Grin Haiwe, Mai/Tadji rot na tu mani bilong karim aut wok sekap long wokim rot long joinim Vanimo/Grin Haiwe wantaim Telefomin na Oksapmin.



**Sanap long lain...** • Saut Pasifik Beng long Waigani insait long Mosbi Siti long las wik Fraide i bin pulap tru long ol kastoma. Mekim na ol sekyuriti i tokim ol kastoma long sanap long lain na lain i i bin longpela tru-insait long beng na tu ausait. Dispela hevi i kamap bikos Saut Pasifik Beng long Boroko i bin paia long las wik Tunde. Olsem na ol kastoma i go long Saut Pasifik Beng long Waigani.

## Heldsbach trenim moa pri skul tisa

HELDSBACH i kamap gen long mekim bilong insevis tisa trenim bihain long 8-pela yia taim insevis trenim i go long Malahang insait long Lae Siti. Pastaim dispela ples i bin stap ples bilong trenim planti tisa insait long ELC-PNG husat i pinisim trenim na mekim wok tisa insait long Lutheran Sios.

Bihainim dispela senis, 64 pri skul tisa i greduet pinis long Sande 11, Ogas long dispela yia. Namel long ol, 12-pela em ol tisa meri. Dispela insevis i bin kisim ol tripela mun olgeta bihainim nupela rifom edukesen sistem gavman i kamapim. Dispela insevis kos i kosim mak bilong mani olsem K11,000. Hap bilong dispela mani em Hanns Seidel Faundesen i givim na Lutheran Sios yet i putim arapela hap. Wanwan bilong dispela 64 tisa i putim K100 olsem fi bilong stap insait long kos.

Long kos dispela 64 tisa i painim besik tising long nupela rifom

edukesen sistem. Ol i lainim tu wok bilong edministresen we Lutheran Edukesen Seketeri bilong Not Morobe, Songo B. Sohng, i givim. Ol arapela samting ol i lainim em failing, pasin bilong givim ripot bilong mani long wanwan mun, rekot bilong atendens, skul registresen na pasin bilong lukautim bung. Ol hetman bilong edukesen insait long Morobe gavman na lokol gavman tu i bin stap na givim ol setifiket long ol tisa ya taim ol i greduet. Mathew Madany i makim nesenel edukesen bilong Evenjelikel Lutheran Sios long Lae na ol papamama tu i bin stap long greduesen seremoni.

Planti lida long greduesen seremoni i tok olsem ol tisa blong pri skul i gat wok long katim bus na redim ol pikinini i stat long kisim save insait long laip bilong ol long edukesen. Bikos ol i tok dispela bai opim rot bilong ol pikinini i go insait long nupela rifom edukesen sistem

gavmani wok long kirapim insait long kantri.

Ol i tok tu long gavman wantaim sios edukesen i mas wokbung wantaim long kirapim wok edukesen long helpim ol pikinini long ksul gut na kisim save long ol bus eria. Long toktok bilong ol sumatin, ol i tok sios i mas strongim dispela senta long singautim olgeta tisa long kam na holim insevis kos na ol semina tu. Bikos insait long Heldsbach i nogat aigris bilong kainkain samting we ol sumatin inap stap gut na pinisim ol kos gut. Na tu dispela ples i gutpela long sevim mani. Heldsbach skul gat ol wok i stap olsem rilises instraksen trenim, hap 9 na 10 distrik skul, yangpela didiman skul na ples bilong lukautim ol animol. Skul i gat haidro pawa i save wok 24 aua long wok bilong skul. I gat ol wok bilong stretim ol haus na arapela samting long skul i stat pinis na planti arapela senis tu bai kamap.

## Ol Bulolo plisman mas yusim gut tripela nupela plis ka - PPC

ASKIM i go nau long ol Bulolo pipel long putim ai long tripela nupela ka, em ol plisman i bin kisim long mun Ogas. Dispela askim i kam long Morobe provinsal plis komanda, taim Bulolo Mema long Palamen, Samson Napo i givim tripela plis ka.

Kos bilong ol ka ya i winim K126,000. Na wanpela bai go long ol plis long Mumeng, narapela bai go long ol plisman long Bulolo, na wanpela bai go long Wau plis.

Taim Minista Napo i givim ol ka ya, em i askim ol plisman long lukautim gut. Na mekim wok bilong lukautim lo na oda, we i bin kamap bikpela tru long wanpela yia i go pinis.

Provinsal plis komanda bilong Morobe i givim bikpela tok tenkyu long Mista Napo long luksave long hevi bilong ol plisman insait long Bulolo ilektoret. Na givim dispela gutpela helpim. Na ol plisman bai yusim ol plis

ka long helpim mekim gut wok bilong ol.

Provinsal plis komanda i bihainim askim bilong Mista Napo, na tokim ol plisman long noken yusim ol ka ya long mekim praivet wok. Em i tok dispela ka i bin mekim tasol ol wok bilong gavman long lukautim lo na oda. Na i no bilong ol plis long yusim na paul nabaut o limlimbur wantaim famili bilong ol. Em i tok dispela ol plis ka i kam bihainim singaut bilong ol Bulolo pipel. Na ol plisman mas yusim gut long lukautim lo na oda. Bai ol pipel i ken sindaun gut na stap amamas.

Em i tok lukauf olsem sapos wanpela plisman i paulim ol dispela ka long praivet wok, em bai givim bikpela mekimsave stret long ol dispela plisman. Planti bisnismen, ol lida long Bulolo olsem kaunsil presiden, na ol bikman bilong plis i salim bikpela tok tenkyu long helpim bilong Mista Napo.

TU MINIT TINGTING

PASIN BILONG STRETIM NARAPELA MANMERI

LONG wanpela de ol pikinini i kra na i sem nogut long lukim papa na mama i paif. Wantu, haikul meri bilong famili i gat wanpela tingting. Em i ran i go ausait long telipon na i ring bek long haus bilong ol. Papa i apim telipon na em i kalap nogut long harim nek bilong wanpela meri i tok olsem: "Gut moning. Mi wanpela ripota na mi wok long raitim wanpela stori. Pastaim mi laik askim, yu laikim meri bilong yu?"

Man ya i kalap nogut na i tok hariap: "Yesa, mi laikim meri bilong mi. Na wanem..."

Nau man i sigautim meri i kam long telipon, na giaman ripota ya i tokim em, "Ekskyus, misis, mi raitim wanpela stori. Mi laik askim yu olsem yu laikim man bilong yu?" Taim mama ya i tok "yesa" em i save pinis em i nek bilong pikinini meri bilong em. Ripota ya i tok tenkyu na i daunim telipon.

Nau papa na mama i sem nogut tru. Tuhat i karamapim pes bilong papa. Em i sindaun long long sia na i tokim mama olsem: "Anna, ating yumi tupela i mas dringim wanpela strongpela kopi."

Em i wanpela klewa pasin bilong stretim pait long famili.

I gat kain kain we long stretim man o meri i gat rong. Yumi rit olsem long Mat 18:15 olsem "Sapos brata bilong yu em i mekim rong long yu, orait, yu go lukim em. Na taim yutupela tasol i stap, yu traim stretim tok wantaim em. Sapos em i harim tok bilong yu, orait, bai yu kisim bek brata bilong yu. Na sapos em i no harim tok bilong yu, orait, yu mas kisim wanpela o tupela man moa i go wantaim yu."

Wanpela namba wan lo bilong stretim narapela man/meri em i dispela. Yu noken mekim long ai bilong planti arapela manmeri. Man o meri bai sem nogut tru. Sapos yu mekim olsem long klasrum, bai sumatin i ranawe long skul.


Em i pasin bilong ol nambaman, ol i no laik bai ol arapela i polinim ol. Long taim independens i bin kamap, sampela nupela politisen i kirap nogut tru long taim ol pipel i sutim tok long ol. Wanpela i sanap long ai bilong ol wantok na i tok, "Yupela i tambu long sutim tok long mi nau. Mi no man nating. Mi kaunsil, mi gat namba. Yupela i mas rispektim mi."

Memba bilong palamen Pita Lu i harim dispela na em i kisim kaunsil ya i go arere na em i skulim em olsem: "Pren bilong mi, yu no save

wok politik em i wanem samting. Sapos ol pipel i ilektim yu, nau ol i gat rait long sut long yu. Mobeta yu strongim skin bilong yu."

Man/meri i klewa, em inap sanap strong long taim ol arapela i sutim tok long em. Sapos man i raitim pas i go long edita, na i egensim dispela politisen, orait, em tu i raitim pas. Nau ol pipel yet inap skelim tok bilong tupela wantaim. Long haikul yet em i hatwok long larim wan wan studen i stretim papa bilong narapela. Ol i sem tumas.

Namba wan we bilong stretim narapela man o meri em i dispela yu kisim em i go arere na yutupela i toktok isi. Narapela we em i long raitim wanpela pas. Tasol nogut yu bikmaus na belhat long taim yu laik stretim narapela. Em bai ting em i no gat rong, tasol yu yet i gat



FRANK MIHALIC i raitim

liklik sik na yu pairap nating long em. Pren tru em inap stretim yumi na yumi na sem liklik. Yumi pilim olsem em i laik helpim mi.

Em nau! Em i olsem naip bilong nes i katim buk i nau. I gat sotpela pen tru, tasol nau sua i wok long drai.

Papa bilong ol Kristen Brata bai kisim bikpela namba long Rom

EDMUND Rice, wanpela Katolik brata long oda bilong Kristen Brata i kisim bikpela luksave nau. Katolik sios bai kolim em olsem Blesed Edmund Rice long dispela wik, bipo long em i kamap santu.

Hetman bilong Katolik Sios long wol, Pop John Paul 2 bai givim dispela namba long Brata Edmund long tumora, Fraide Oktoba 6 insait long wanpela bikpela lotu. Lotu ya bai kamap long Sen Peter's Skwe long Rom, biksiti bilong kantri Itali.

Brata Edmund i dai pinis. Tasol taim em i stap laip, em bin kirapim grup bilong ol Kristen Brata moa long 100 yia i go pinis. Na nau ol memba bilong Kristen Brata i wok long olgeta hap bilong wol.

PNG em wanpela long ol kantri we ol Kristen Brata, na wanlain bilong ol, em long ol Mercy Sista, i wok long ol kantri olsem Ingran, Ostrelia na Kanada. Ol i wok strong long bringim na go hetim edukesen na helt developmen insait long wanwan komyniti na ples we ol i stap long en. Long planti yia, sios i skelim na luksave long gutpela misinari wok we Brata Edmund i bin mekim long taim em i stap laip. Na lukim olsem misinari ya i gat rait long kisim kain bikpela namba, bipo long ol i kolim em santu.

Brata Edmund i bilong Ailen long Yurop. Mama i bin karim em long liklik ples ol i kolim long Kalan long 1762. Em bin kamap olsem wanpela gutpela bisnisman wantaim planti mani. Bisnis bilong salim kaikai we em i wok wantaim em kandre bilong em i papa long en.

Bihain long kandre i dai, em i teko-va long dispela bisnis. Bisnis i ron gut na em i marit. Sampela yia bihain em wantaim meri i kamapim wanpela

pikinini tasol. Dispela pikinini i gat sampela samting we i no stret long bodi bilong em.

Tupela yia bihain long em i marit, meri bilong em i dai long wanpela birua. Edmund i sore nogut tru long ol hevi em meri bilong em i bungim. Orait tingting bilong em i senis. Na em i kisim bikpela laik long kamap olsem wanpela pater.

Em putim pikinini meri long lukaut bilong sista bilong en. Na i laik go skul long kamap pater. Tasol wanpela pren i tokim em olsem planti yangpela man i raun nating wantaim nogat wok. Na sapos Edmund i ken givim sampela kain helpim bilong givim skul na wok long ol.

Edmund i pilim olsem God i singautim em long helpim ol yangpela manmeri long kantri Ailen. Olsem na em i stapim bisnis bilong em. Na kirapim wanpela liklik skul bilong helpim ol yangpela manmeri o yut.

Em i nogat skul long wok tisa. Tasol i kamap olsem wanpela gutpela tisa. Na raitim tu ol skul buk bilong skulim ol mangi long dispela taim. Em nau long dispela taim ol mangi i joinim skul bilong em, em i kirapim wanpela kongrikesen we ol i kolim long Prisentesen Bradas.

Na taim namba bilong ol brata i go antap, em i salim ol long wok long Ingran, Ostrelia na Kanada. Hetman bilong Katolik Sios i givim luksave long kongrikesen. Na em i brukim grup i go long tupela hap, we ol i mekim kainkain wok i kam inap tude. Nem bilong dispela tupela grup em long Kristen Brata na Presentesen Brata. Wanpela grup i stap aninit long lukaut bilong bisop na narapela long lukaut bilong supiria jenerel.

i go moa long pes 7



Sampela misinari bilong ol Kristen Brata, wantaim ol arapela misinari na wokman meri, husat i helpim long planti wok developmen insait long Papua-Niugini.

Reveren Laka em nupela Yunaited bisop bilong Is Papua Bikples

IS Papua Meinlen o bikples rijon long Yunaited sios i gat nau nupela bisop. Nem bilong nupela bisop em Reveren Laka Renagi.

Moa long 2,000 pipel i kam long ol ples long Hula eria i bin stap insait long wanpela bung long las wik, Sande Septemba 1. Na makim Reveren Renagi olsem nupela bisop bilong ol.

Is Papua Bikples i karamapim ol Yunaited sios seket long Hula i go olsem long Milen Be.

Reveren Bisop Laka i kisim ples bilong Reveren Wala Tamate, husat i bin lukautim dispela rijon inap long 6-pela yia olgeta.

Pastaim long Reveren Laka i kisim dispela nupela wok, em bin holim wok olsem sios minista bilong Keapara seket long Hood Lagoon eria long tripela yia olgeta.

Moderata bilong Yunaited sios long Papua Niugini na Solomon Ailans, Reveren Edea Kidu i bin go pas long dispela bung long makim nupela bisop. Tupela arapela Yunaited sios bisop, Bisop Henry Kawaigu bilong Papua Ailan rijon, na Bisop Lokoloko bilong Wes Galp rijon i bin stap tu long dispela seremoni wantaim ol pipel bilong makim nupela bisop.

I bin gat ol tumbuna singsing na dannis, planti kaikai em ol pipel bilong Hula i redim long dispela taim.

Ol pipel i givim tu presen long nupela bisop, na olpela bisop wantaim.

God gat wok bilong mipela wanwan

KEVIN BANA i raitim

SAPOS yu stap long ples na yu tingting long go long taun long painim wok, tasol long taun bai yu no inap long painim wok hariap olsem yu ting bai yu kisim.

Taim yu wokabaut raun painim wok, olgeta ol dua bilong ol kampani bai yu lukim wanpela tok we ol i raitim long dua bilong opis i stap olsem, "Sori tru nogat wok."

Em i tru olsem sampela bos long kampani i save tok tru olsem i nogat wok. Long wanem ol i save skelim strong wok bilong kampani long hamas mani inap long ronim olgeta wok bilong ol. Tasol sampela i save giaman. Bikos ol i les long lusim mani bilong ol.

Em i tru olsem long dispela graun i nogat inap wok long olgeta manmeri. Wanpela bikman tasol i gat planti wok i pulap i stap. Na em i painim ol wok lain bilong mekim wok. Dispela kampani em Wok Misin bilong God Papa bilong yumi long heven.

Em i gat planti kainkain wok long yumi olgeta we inap long kain skel, strong na save bilong yumi wanwan. Na wanwan manmeri tasol i save tok yesa long kisim dispela kain wok insait long kampani bilong God.

Em i go pas long wok bilong sios olsem pater, pasto, bisop na ol het manmeri. Ol dispela manmeri i bilong supevaisim ol bikpela wokman tasol insait long wanwan seksen bilong sios. Tasol long mekim ol arapela wok long sios, i gat sot yet i stap. Em yumi wanwan kristen manmeri na pikinini long skelim tingting na askim bos bilong kampani, Papa God, long givim yumi.

Yumi planti manmeri i no stap insait long dispela kampani. Bikos yumi yet i save giaman yumi yet na tok olsem mi gat wok na mi save wokhat tru. Tasol samting tru em yumi em ol lesman tru. Na yumi save raun nating na painim rot bilong mekim trabel tasol.

Long dispela pasin yet, i nogat manmeri tumas i stap long mekim dispela wok bilong Bikpela. Olsem na Papa God i tok, "Planti gaden long kaukau i mau tasol i nogat wokman nneri i stap long bungim kaikai."

Ating yu wanpela bilong ol husat i nogat wok na raun nating i stap? Mi askim yu long aplai i kam long kampani bilong God long prea na wetim em long bekim askim bilong yu. Em yet i bosim dispela bikpela wok misin kampani, husat bai opim dua bilong yu. Na singautim yu long wok bilong em. Na yu ken mekim dispela wok bilong givim glori i go long em yet, God Papa wanpela tasol long Heven.

Lapun papa gat nem long mekim wok bilong sios

Wantaim dispela toktok, mi laik skelim wanpela stori bilong wanpela papa nem bilong em Tudi Somi. Em i wanpela bikman bilong ples Dona insait long Zaka seket, Morobe provins.



Papa Tudi Somi, husat i gat 70 krismas nau. Em i bin wanpela biknem bisnisman long Morobe patrol pos. Tasol em i pasim olgeta bisnis wok, na nau em i mekim wok bilong sios wantaim bikpela bilip.

Bikman ya i gat 70 krismas. Em bin stat mekim wok misin long ples stret bilong em Dona, na kam antap olsem long Malalo seket. Em wok i kam antap long Buakop kongrigesen na ol kristen long dispela hap i baim sip bilong en na salim em i kam long Lae siti.

As tru bilong dispela wok misin bilong papa Tudi em long tokaut long ol kristen bilong tude olsem ol i mas holim pas strong wanem liklik bilip ol i gat pinis long en.

Em yet i tok maski i gat liklik bilip tasol i stap, mi laik helpim ol arapela manmeri bilong God husat i gat liklik bilip. Na ol i ken stap strong na kamap bikpela. Long wanem bilip bilong ol yangpela manmeri long dispela taim i narakain long ol kristen long tude, na i wok long lus isi isi. Bikos planti kainkain samting na senis i wok long kamap wantaim laip bilong kago na mani.

Papa Somi i lukim dispela hevi na Holi Spirit bilong Bikpela tu i kirapim em long wokabaut na tokaut long dispela hevi. Olsem na wanpela tok long Baibel em i kisim na sanap antap long mekim dispela wok misin i stap long Rom 15: 1, 2. Dispela rit insait long pas bilong Apotel Pol i go long ol kristen long Rom bipo i tok long ol man husat i gat strongpela bilip i mas helpim ol arapela kristen husat i gat liklik bilip long ol i ken holim strong bilip bilong ol tu.

Tundi i bin skelim tu laip ekspriens bilong en tu long hau em i save long God tru bilong en.

i go moa long pes 7

# Ol Pasifik sios egensim gan long Bogenvil hevi

HEVI long Bogenvil ailan em i wanpela samting we Pasifik Kaunsil ov Sios (PCC) i gat bikpela tingting long en. Na i laik lukim dispela rot long traim pinisim dispela trabel we i givim bikpela hevi, pen na indai long planti manmeri na pikinini insait long Bogenvil Ailan.

PCC i autim dispela tingting long bikpela bung bilong ol, em i kamap long PNG Institut bilong Pablik Edministresen (bipo ol i kolim Edministretiv Koles) Mosbi, long dispela wik.

Jenerel seketeri bilong PCC, Reveren Dick Avi i tok ol memba sios bilong PPC lonjg wansolwara i wari long taim hevi i wok long go het long planti yia nau. Na ol pipel i karim pen long longpela taim pinis.

Em i tok ol sios i no bilip olsem pasin bilong yusim soldia long stretim dispela hevi i no stretpela o gutpela we bilong pinisim dispela hevi. Em i tok ol memba sios i bilip olsem i gat we bilong painim arapela rot long

## OL RIPOT LONG PASIFIK KAUNSI OV SIOS KIBUNG WANTAIM VERONICA HATUTASI

stretim dispela hevi. Na i no bilong yusim gan o strongpela samting bilong pait long stretim dispela hevi, we i bungim 8-pela yia nau.

Em i tok mobeta gavman bilong Papua Niugini wantaim ol sios insait long PNG na Solomon Ailans i bihainim na go hetim pasin bilong toktok wantaim long traim stretim dispela hevi long Bogenvil.

Olsem na Reveren Avi i bin tok PCC i putim strongpela toksave i go long sios na gavman bilong bihainim pasin kastom long ol pipel bilong Melanesia, na pinisim dispela hevi. Long wanem, ol hevi we i stap insait long komyuniti em i wok bilong ol lida long toktok wantaim na stretim.

## Sios pret long wok bilong media

PASIFIK Kaunsil ov Sios i gat bikpela wari o pret long wok bilong ol media we i karamapim niuspepa, radio na televisen insait long wansolwara.

Bikpela pret long dispela em long sait bilong wok bisnis. Ol sios lida i egensim pasin we sampela bisnis kampani i save mekim long grisim o yusim ol niuspepa, radio na televisen wantaim bikpela mani long putim ol edvetismen we i no stret tumas, na i ken bagarapim ol pipel.

Reveren Avi i bin tok wok bilong ol niuspepa, radio na televisen i ken kamapim bagarap na sindaun nogut long laip bilong ol pipel, insait long komyuniti na kantri. Dispela em sapos ol niuspepa, radio na televisen i no lukaut gut long wok bilong ol.

Olsem na Reveren Avi i bin strongim ol sios lida long wok bung wantaim long daunim ol kainkain hevi bilong sosel, wok politik na lotu we i karamapim ol pipel insait long Pasifik rijn.

• Ol memba sios long PCC i wari tu long ol nupela kainkain lotu-we i wok long kam insait nau long long wansolwara.

Reveren Avi i tok PCC i wari bikos dispela ol nupela sios i save bringim ol kain skul bilong ol we i ken bagarapim bilip na sindaun bilong pipel. Na pulim ol long bilip bilong ol olsem ol kristen sios, husat i kam pastaim insait long rijn i skulim ol long en.


Reveren Avi i bin tok long ekumenikol komyuniti bilong ol meintain kristen sios, ol pipel i kisim toktok na skul long stap na wok gut wantaim, lainim long laikim wanpela na narapela, na stap gut wantaim olsem ol wanpela pipel.

Ol Kristen sios i bilip olsem em i rong long ol sios i resis wantaim wanpela na narapela. Bikos dispela i ken kamapim hevi long sosel na wok politik, olsem nau i kamap long Noten Ailan.

## Ol sios egens Frans long testim bom

PASIFIK Kaunsil ov Sios i laikim lsem Mas 25 long olgeta yia i mas kamap olsem "Nuklia Fri Pasifik De".

Ol sios i mekim dispela askim bihainim pasin we Frans i bin mekim long testim ol posin bom o na tromoi ol pipia nogut long solwara bilong Saut Pasifik. Dispela ol pipia i ken bagarapim solwara wantaim laip insait long en olsem pis, rif, na tu laip na sindaun bilong ol pipel, husat i strong long abus bilong solwara.



• Rev Masalo Salo Sopoanga (American Samoa).

Pasifik Kaunsil bilong ol Sios i egensim tru dispela griti na nogut pasin bilong Frans. Na long dispela bung, han bilong Jastis Pis na Developmen (JPD) komiti bilong PCC i putim strongpela askim i go long bung bilong ol Forum memba kantri we i kamap nau long Masal ailans, long makim Mas 25 olsem "Nuklia Fri Pasifik De".

Dispela em de we Frans, Ingran na Yunaited Stets ov Amerika i bin pasim tok em ol i kolim long "Rarotonga Triti" long Frans i pinisim pasin bilong testim ol bom long Rarotonga

JPD i wari tu long pasin nogut bilong Frans long tromoi ol pipia nogut bilong nuklia bom long Palmyra na Masal Ailans;

BUNG bilong ol eksekutiv memba bilong PCC i lukluk na glasim sampela tu sampela arapela bikpela hevi, we i karamapim rijn, envaironmen, ol pipel na gutpela sindaun bilong ol long wanwan ples o komyuniti.

Hia em sampela bikpela toktok i kamap long dispela kibung:

• Pasifik Kaunvil ov Sios i paitim toktok tu long envaironmen we i karamapim bus raun, wara, solwara na laip insait long ol wara na solwara olsem pig, kapul, pisin, pis, rif, dolfin na sak.

PCC i wari long bagarap we ol dispela samting i bungim bihainim ol kain wok developmen olsem bilong painim gol, kopa na wel, timba na pis insait long Pasifik

kantri. Aninit long dispela eria bilong toktok, Pasifik Kaunsil ov Sios i paitim toktok tu long pasin nogut bilong ol bikpela kantri olsem Yunaited Stet ov Amerika na Frans long tromoi pipia nogut long solwara bilong Saut Pasifik;

• Nid long putim ol yangpela man long ol bikpela wok insait long ol sios ministri. Long wanem ol i gat save long ol nupela senis we i kamap long wol, sios na

wanwan komyuniti. Na ol i ken givim gutpela tingting long rdi long ol dispela senis. Bikos ol yet bai kamap olsem ol lida bilong tumora; na

• Helt, pamuk pasin na turis bisnis em wanpela bikpela eria bilong toktok em PCC i glasim tu.

Maski turis bisnis i save pulim mani na developmen i kam insait long kantri, PCC i wari olsem dispela ol samting i ken bagarapim laip o sindaun bilong ol pipel.

Na tu ol kain sik nogut olsem AIDS i ken kamap bikpela.

Olsem na sios i glasim ol gutpela samting na ol nogut samting wantaim bilong skruim save na givim gutpela skul i go long ol pipel, bai ol i ken was gut long ol dispela senis em bai kamap long laip na sindaun bilong ol.

## Papa bilong kristen bai kisim bikpela namba

I kam long pes 6

### Wok bilong Kristen Brata long PNG

Hia long Papua Niugini, ol Kristen Brata i winim 46 yia pinis long wok insait long kantri.

Ol eria we ol i wok strong em long sait bilong komyuniti na hai skul, bringim helt sevis long ol pipel, lukautim na helpim ol disebel pipel, hel;im ol alpas pipel, na helpim ol refuji pipel long Kiunga, Westen provins.

Ol Kristen Brata i wok tu long Vuvu Hai skul insait long Is Nu

Briten provins. Ol i ronim tu sampela tisa koles olsem long Vunakanau insait long Is Nu Briten na Sen Benedict's long Kaindi, Wewak, wantaim ol hai skul olsem long Fatima insait long Westen Hailens provins, Mongop long Nu Ailan na ol komyuniti skul long planti hap bilong kantri.

Nau yet ol Kristen Brata i go insait long wok bilong lukautim na helpim ol disebel pipel. Long dispela, ol i kirapim wanpela sevis bilong ol we ol i kolim long Callan Sevis. Ol i lukautim na ronim Maun Sion Senta bilong ol alpas

pipel long Goroka. Ol i wok tu long helpim na givim helt sevis i go long ol refuji long Valoka insait long Kiunga, Westen provins.

Nau yet i gat moa long 3,000 memba bilong Kristen Brata i wok i stap long olgeta hap bilong wol. Planti bilong ol bai bung long Rom tumora long amamasim bikde bilong bikman bilong ol. Brata Mark Varbongoi na Paul Kikisi bai makim ol Kristen Brata na ol olpela studen wantaim ol Mercy Sista long PNG dispela bikpela misa long Rom.

## PCC kibung bungim 60 pipel

MOA long 60 pipel i stap-insait nau long bikpela wanpela wik bung bilong Pasifik Kaunsil bilong ol Sios (PCC). Bung i kamap long PNG Institut bilong Pablik Edministresen (bipo ol i kolim Edministretiv Koles) long Waigani, na i bin stat long Mande Septemba 2. Na bai pinis long tumora, Fraide Septemba 6.

PCC i gat 31 kantri insait long Pasifik rijn i memba long en. Na ol i memba bilong ol Meinlen sios olsem Englikan, Katolik, Yunaited, Evanjelikel Luteran, Metodus na ol arapela bikpela sios husat i bin kam insait long rijn namba wan taim long bringim Gutnius bilong God long ol pipel.

Dispela kain bung ol i save holim long olgeta yia. Na em i eksekutiv bung bilong ol PCC memba. Las yia ol bin holim kain bung long Ameriken Samoa. Eben rijn bilong Yunaited Sios long PNG na Solomon Ailans i lukautim dispela bung.

Bung i kamap aninit long het tok: "Strongim yuniti bilong yumi long Kraisi". Ol samting we ol i toktok long en long dispela bung bai kamap long bikpela bung bilong jenerel asembli long Tahiti neks yia.

Long bung bilong dispela wik, ol memba i makim wanwan kantri i

givim ripot long ol wok bilong ol stat long las yia i kam inap long nau. Ol i lukluk na glasim tu envaironmen long rijn, pasin bilong karim aut ol nuklia tes o testim ol bom nogut long rijn; ol toktok bilong jastis, pis na developmen; wok bilong ol meri na ol yangpela manmeri; wok bilong ol niuspepa, radio na televisen long rijn; wok bilong ol sios na wok bung wantaim; hevi long Bogenvil ha ol kain samting olsem we i karamapim wok bilong ol sios na pipel we i kam aninit long lukaut bilong ol.

Long PNG yet, Katolik, Yunaited, Evanjelikel Luteran Sios bilong PNG (ELC-PNG) na Papua Niugini Kaunsil bilong ol Sios i memba bilong PCC.

Sampela long ol kantri we i salim ol memba bilong ol i kam long dispela bung em long Tahiti, Kuk Ailan, Ameriken Samoa, Westen Samoa, Tuvalu, Masal Ailans, Ponape, Fiji, Kiribati, Solomon Ailans na Vanuatu.

Siaman bilong PCC em Reveren Masalosalolo Sopoanga bilong Ameriken Samoa. Namba tu siaman em Bisop Philemon Riti bilong Solomon Ailans, Jenerel Seketeri em Reveren Dick Avi bilong Yunaited Sios long PNG. Na tresera em long John Powell bilong Fiji.

## God gat wok bilong mipela wanwan

I kam long pes 6

Pastaim tru taim em i boi yet, em bin go skul long wanpela tokples misin skul long Hopoi long Bukawa, klostu long Lae siti. Long dispela taim, Wol Woa 2 i bin kamap. Na wanpela taim ol soldia bilong Japan i laik sutim em wantaim gan. Na ol i askim em long go antap long diwai kokonas.

Long dispela taim stret tingting bilong em i klia. Tasol em i no inap long ranawe. Long wanem ol soldia i holim gan na sanap raunim em. Na em i painim tingting long mekim trik bilong em na ranawe. Tasol samting i hat yet na long wankain taim, namel long ol soldia han bilong Bikpela God i kam na kisim em i go lusim em long bed bilong em long skul. Orait, long hap tumora ol

kiap i tok strong long pasim skul na salim ol mangi i go bek long asples bilong ol wan wan. Long dispela taim long 1945 i kam inap long 1960, tingting bilong em i no bin klia tru long wanem bai kamap long laip bilong em long han bilong ol biru.

Papa Somi i bin kamap wanpela biknem bisnisman long Morobe patrol pos. Tasol em i luksave long dispela na em i pasim olgeta wok bisnis bilong em. Na givim em yet long mekim ol wok sios wantaim bikpela bilip. Olsem na papa Somi i tok ol yangpela kristen tingting bilong yupela i noken paul long ol giam samting bilong graun. Tasol bilip long God i bikpela bilong yumi husat i save gat bikpela marimari i pulap tru long olgeta taim long helpim yumi olgeta manmeri na pikinini bilong en.

## SOME PEOPLE DON'T TAKE STUDYING BY MAIL SERIOUSLY

Some people believe that you cannot get a good education through distance education. Some people believe that, because you are getting your education through a correspondence school, you don't have to work for your diploma or your degree. Some people confuse "phony degree mills" with legitimate distance-education schools. If you are one of these people, don't read any further.

ICS is looking for people who take their education SERIOUSLY, whether attending a traditional college or studying by mail. We are looking for people who will apply themselves and work hard to get the full value of the training that ICS offers. Diplomas and Degrees are issued upon successful completion of a program accredited by the Distance Education and Training Council...your guarantee of a quality education. If you take your education seriously and want to train for a new career or improve your job skills for advancement in your present job, ICS may have the right career training for you. Choose from 55 career programs listed below. Select the one career field you would like to train for and indicate that choice in the coupon below. Cut out this ad and mail it to ICS today. We will send you a detailed program outline and tuition schedule by return airmail. There is no obligation. SEND FOR FREE FACTS—NO OBLIGATION

INTERNATIONAL Correspondence Schools, Dept. TTSA6 Box 1900, Scranton, PA 18501-1900 U.S.A.

CAREER DIPLOMA PROGRAMS		
01 Computer Programming in BASIC	18 Bookkeeping	Z201F
07 U.S. High School Diploma	06 Electrician	
02 Electronics	03 Child Day Care	
05 Hotel/Restaurant Management	38 PC Specialist	
13 Professional Secretary	29 Police Sciences	
35 Travel Agent	10 Private Security Officer	
14 Air Conditioning & Refrigeration	55 Diesel Mechanics	
32 Art	94 Fitness & Nutrition	
59 Catering/Gourmet Cooking	85 Drafting	
23 Medical Office Assistant	31 Locksmithing	
24 Dental Office Assistant	39 Medical	
51 Fashion Merchandising	Transcriptionist	
33 Motorcycle Repair	72 Appliance Repair	
52 Surveying & Mapping	41 Journalism/Short Story Writing	
22 Wildlife/Forestry Conservation	40 Photography	
47 Animal Care Specialist	70 Computer-Assisted Small Business Mgmt.	
15 Home Inspector	79 Electronics Technician	
89 Small Engine Repair	25 Gun Pro	
08 Legal Assistant	27 PC Repair	
48 Computer-Assisted Bookkeeping	26 Teacher Aide	
42 Dressmaking & Design	30 Floral Design	
87 TV/VCR Repair		
04 Auto Mechanics		
12 Interior Decorating		

Get FREE information—  
**MAIL ENTIRE AD TODAY—Write the number of the one career that interests you**  
 Please Print  
 MR / MRS / MISS \_\_\_\_\_ AGE \_\_\_\_\_  
 ADDRESS \_\_\_\_\_ POSTAL CODE \_\_\_\_\_  
 CITY/COUNTRY \_\_\_\_\_ PHONE \_\_\_\_\_

**ICS ACCREDITATIONS AND APPROVALS**  
 ICS is an accredited member of the Distance Education and Training Council in Washington, D.C. and is licensed by the Pennsylvania State Board of Private Licensed Schools.  
 ICS Learning Systems has been approved and approved as a Certified Provider of continuing education and training programs by the International Association for Continuing Education and Training.

# Gavman rausim pawa long asples

Planti senis i kamap nau long wok bilong ol gavman na pablik sevis long ol provins. Planti bilong ol dispela senis em toktok tasol. Kaikai i no kamap yet. Ol pipel i wet yet.

Narapela samting gavman i bikmaus long en, em long kisim gavman i go daun long ol pipel. Givim moa pawa long ol pipel. Tasol rot ol dispela pasin bai kamap i no klia tumas.

Mi lukluk long lo i bosim ol dispela senis long provinsal na lokal level gavman na mi lukim olsem dispela bai i no inap kamap. I luk olsem pawa bai stap long han bilong liklik lain tasol na bai hat long planti asples stret.

Seksen 26 na sabseksen 4 i tok olsem wanwan open ilektoret long nesenel gavman bai i gat tripela lokal level gavman. Na sapos i gat nid orait minista i ken askim nesenel kabinet long oraitim hamas moa kaunsil ol i nidim.

Dispela i min wanem samting tru long ol pipel bilong wanwan ilektoret? Tok piksa bai mi givim long ilektoret bilong mi long Kikori insait long Galp provins.

Aninit long olpela provinsal gavman, Kikori ilektoret i bin gat 9-pela memba i makim tripela distrik. I bin gat 4-pela long Ihu, tupela long Baimuru na tripela long Kikori.

Nau bai i gat tripela memba tasol i makim olgeta pipel bilong



Ihu, Baimuru na Kikori long provinsal asembli. Yu ting wanem? Ol i givim moa pawa long ol pipel o rausim olgeta pawa long ol?

Ating sapos yupela glasim wanwan ilektoret bilong yupela, bai yu lukim wankain pasin i kamap. Gavman i katim namba bilong ol maus bilong yupela long provinsal asembli.

Gavman bai sutim tok olsem ol nenesel memba tu bai stap long provinsal asembli. Tasol yumi lukim wok bilong planti nesenel memba pinis. Tingting bilong ol i stap long poket bilong ol tasol.

Gavman mas tok klia nau sapos dispela bai i tru o nogat.

Long nau tu i gat wari olsem ol pipel i no inap makim ol nupela memba bilong ol lokal level gavman bikos gavman i sot long mani. Sapos dispela i tru, orait gavman i mas tokaut long wanem kain rot ol bai bihainim long putim maus bilong ol asples go insait long ol gavman.

Sapos nogat, orait bai mi tok gen: Gavman bilong Sir Julius Chan i laik rausim olgeta pawa long ol asples.

# NFB oraitim nupela NFS straksa

NESENEL Fores Bod i oraitim pinis nupela oganaisnesel straksa bilong Nesenel Fores. Sevis insait long wanpela miting Bod i holim long Mosbi i no longtaim i go pinis.

Bod i oraitim nupela straksa long bihainim ol astingting we i stap o kam aninit long Nesenel Fores Polisi we i tok olsem wanpela nesenel ejensi i mas menesim na ranim fores sekta bilong gavman. Na tu long givim helpim long menesim ol praivet na kastomari fores risos insait long Papua Niugini.

Taim em i tokaut long nupela straksa Nesenel Fores Bod i oraitim, Menesing Dairekta bilong Papua Niugini Fores Atoriti, Guao Zurenuoc, i tok olsem senis i mas kamap long lukim olsem Nesenel Fores Sevis i mas i gat ol gutpela wokmanmeri long mekim wok bilong ol nupela polisi na ol rot bilong wok insait long Papua Niugini.

Arapela samting we i gutpela na impoten, Mista Zurenuoc i tok, i olsem i gutpela long putim ol wokmanmeri husat i gat save na ekspirians long ol posisen na eria we ol i ken wokbung wantaim sinia opisa. Na tu long lukim olsem komyunikesen namel long menesmen na ol opisa i stap daunbilo i ron gut.

Ol senis we Nesenel Fores Bod i kamapim na i stap insait long nupela straksa em:


- Polisi eria bipo i stap long Polisi na Plening Divisen. Nau polisi eria bai kam aninit long nupela divisen we Bod i kamapim ol i kolim Polisi Sekretariat we bai kam aninit long lukaut bilong wanpela dairekta.

- Bod i pinisim posisen bilong Koporet Sevis Menesa na kamapim tupela nupela divisen we tupela dairekta bai stap olsem hetman. Nem bilong tupela nupela divisen em Fainens na Edministresen na Oganaisesen Developmen Dairektret.

- Stretim na daunim pegred straksa long lukluk long ol opisa na ol profesenel foresta bihainim wok ol i holim na kaikai bilong wok ol i kamapim.

- Makim wanpela ekonomis long stap long opis bilong jenerel menesa na tu apoinim arapela ekonomis long stap insait long Risos Menesmen Divisen.

Bihainim ol dispela senis na nupela straksa, Salaris na Kondisen Monitoring Komiti i oraitim pinis ol senis insait long nupela oganaisnesel straksa stat long Ogas 1, 1996.



• Menesing Dairekta bilong Papua Niugini Fores Atoriti, Guao Zurenuoc.

# Poki pilai sotim mani


Planti toktok i wok long kamap long ol hevi poka masin pilai i bringim long famili, komyuniti na tu long kantri.

Planti manmeri i lusim wok nai go pilai poka. Ol papa i lusim meri pikinini na pinisim mani long poka masin o long hos resis. Sampela mama i lusim tingting long ol pikinini long haus na i go pilai poki.

Bihain papa na mama i kros pait long haus. Ol pikinini i hangre na nogat kaikai. Ol pikinini i lukim nogat kaikai long haus na ol i painim ol arapela rot long stretim bel bilong ol.

Ol boi i joinim raskol na stil. Sampela pikinini meri i mekim pasin pamuk long kisim mani long baim kaikai na klos na ol arapela samting. Sampela mama tu i save kisim mani long dispela pasin nogut, we i doti olsem as bilong sospen.

Dispela em sem bilong mipela olgeta. Sem i no mas bilong famili husat i mekim olsem. Em i wok bilong mipela olgeta nau long mekim sampela samting long dispela hevi i bagarapim kantri bilong mipela. Mipela i mas lukaut nau na i gat sore na krai long sindaun bilong ol pikinini na ol arapela lain bilong



mipela long sosaiti na komyuniti.

I no ol man na papa tasol i stap de na nait long ol poka masin ples. Sampela meri tu i stap long ol poka masin ples.

Sapos mipela glasim gut histori bilong pilai laki gen na kas samting, bai mipela i lukim olsem ol meri i save pundaun hariap na isi tru long sik bilong dispela kain laki gem. Long tok Inglis ol i kolim "gambling". Traim wokabaut long ples, setelmen na bai yu lukim ol manmeri i sindaun aninit long diwai o haus na pilai kas o bingo i stap. Dispela em gambling. Lukluk i go insait long hos res haus na bai yu lukim ol mama i stap tu. Klostu olgeta de. Dispela i olsem wok mani bilong ol.

Poka masin i winim pinis lewa na tingting bilong planti man-

meri. Dispela i mekim poki bisnis i gro na planti poki haus i wok long kamap. Ol provins i gat ol bikpela bisnis o sampela kain kampani na wok i bringim mani insait long ol famili na pipel na kantri, dispela devil bilong stilim mani tu i stap. Ol i mekim dispela bisnis long aninit long nem bilong komyuniti developmen.

Gavman na ol papa bilong ol poka masin haus i tok bai takis na winmani bilong kampani i go long komyuniti sevis wokolsem haus sik na wara saplai. I tru tasol sapos mipela glasim gut, bai mipela i lukim olsem i no dispela kampani i bringim dispela developmen wok. Em ol lain manmeri i go pilai. Sampela pipel i tok ol manmeri i go pilai i save lus krangi tru na bringim hevi long ol yet na famili bilong ol.

Yumi skelim tu ol lain i go pilai taim ol i winim bikpela mani liklik wanpela taim, ol bai amamas tru. Tasol ol i no win, ol i lus. Ol i lusim pinis planti mani long ol arapela gem. Sapos mipela i glasim gut, mani wanpela man o meri i winim i liklik tumas long mani em i spenim.

# Solwara no inap toksori

Planti pipel i save laikim long waswas long solwara. Ol pipel husat i stap arere long solwara i save tok olsem ol i save gut long solwara.


Solwara i ken kilim manmeri na pikinini. Sapos opis bilong Nesenel Disasta na Imejensi Sevis i i autim namba bilong pipel solwara i kilim ol pipel, ola pukpuk, mipela bai no inap bilipim.

Planti pipel i lusim pinis laip bilong ol long solwara long ol yia i go pinis. Maski ol gavman atoriti olsem opis bilong Nesenel Disasta na Imejensi Sevis i givim tok lukaut, mipela ol pipel i no save kisim ol dispela tok lukaut. Mipela i ting olsem mipela i gat moa save long solwara na tok lukaut bilong ol gavman atoriti i samting nating. Taim mipela i egensim ol tok lukaut, mipela i save bungim hevi na lusim laip bilong mipela.

Long las mun (Ogas), sampela manmeri na pikinini i lusim laip bilong ol long solwara namel long Is Nu Briten na Nu Ailan provins. Asua bilong dispela birua i stap long husat?

Asua i no stap long solwara. Asua i no stap long win. Asua i no stap long ol pipel husat i lusim laip bilong ol na ol arapela husat i strong na stap laip yet.

Asua i stap long man husat i ronim bot. Bikos em i sapos long luksave long solwara i stap olsem wanem long dispela taim na tanim bot i go



bek long bikples. Em i sapos long harim askim na tingting bilong ol pipel i stap antap long bot. Tasol nogat, em i go het na ol i bungim hevi. Taim hevi i kamap, em i namba wan man long lusim bot na kalap.

Sapos mi wanpela solwara man, mi ken tok olsem mi save gut tru long solwara. Mi ken tok tu olsem mi save gut tru long ron bilong win. Tru tru mi giaman man ya. Bikos solwara na win i save senis. Solwara i no save bruk wankain olgeta de na tu win i no save ron wankain olgeta de na aua.

Gavman i putim lo tasol mipela i no save luksave na bihainim. Mipela i egensim na kamapim birua na hevi long mipela yet, famili, wanpisan na ol arapela lain.

Em i taim nau ol pipel husat i save ronim ol bot na liklik sip long solwara i mas bihainim ol tok lukaut na lo ol gavman atoriti i putim. Ol dispela samting i stap long gutpela bilong mipela.

Solwara i ken kilim man. Sapos mipela i asua, solwara bai no inap toksori long mipela.



## Kubalia pipel askim K100,000 kompensesen long ol Yangoru

OL pipel bilong ples Huaragen long Kubalia insait long Is Sepik provins i makim K100,000 kompensesen long 5-pela man Yangoru husat i kilim wantok bilong ol long Lae long dispela mun.

Ol pipel bilong Kubalia i strong olsem insait long ol dispela 5-pela man, wanwan i mas baim K20,000 kompensesen. Ol i makim dispela prais o kompensesen bihainim krismas dispela daiman i gat yet long stap.

Man ya em Alison na i gat 24 krismas. Polis long Lae na Wewak i no givim namba tu nem bilong em. Ripot i tok Alison i marit na i gat tupela pikinini.

Ol pipel bilong Kubalia i makim K20,000 long wanwan man ya bihainim narapela 26 krismas em inap stap laip yet na kamap olsem 50 krismas olgeta.

Ol i tok insait long narapela 26 krismas we em inap stap laip yet, em i ken mekim ol wok bilong sevim em yet wantaim famili bilong em na komyniti bilong em. Olsem na ol i makim dispela kompensesen bihainim narapela 26 krismas em i lusim.

Wewak Provinsal Polis Komanda, Sief Inspekta Giossi Labi i tok em i kisim pinis dispela ripot i kam long Lae polis. Tasol em i askim ol pipel bilong Kubalia long kam long polis stesin na ol i ken stretim toktok na ol pipel i no kamap.

Mista Labi i tok em i kisim dispela ripot tu long ol pipel i askim dispela kain kompensesen na tu

### YAKAM KELO i raitim

i laik kamapim ol hevi long haiwe. Tasol nogat man i kam long toktok wantaim em.

Mista Labi tok tu olsem em i bin go long Redio Wewak na mekim toksave i go long ol pipel bilong Kubalia na Yangoru long kam. Olsem na em i wetim ol yet long kam na ol i ken sindaun na stretim toktok.

Mista Labi i tok em i mekim strongpela toktok i go long ol pipel bilong Kubalia na Yangoru long no ken kamapim moa birua na hevi. Tasol ol i mas bung na stretim toktok na hevi ya long gupela rot na pasin.

Ripot i kam long Lae, bos bilong Lae polis Tony Wagambi i tok man ya em ol i kilim long Tent Siti, ausait tasol long Lae siti.

Mista Wagambi i tok ol i luk-save pinis dispela man husat i bin kilim Alison tasol ol i no inap holim em yet bikos i no gat inap ripot o stori (evidens) bilong sasim em. Olsem na man ya i raun ausait i stap.

Mista Wagambi i no tokaut olsem 5-pela man i kilim Alison. Tasol em i tokaut tasol long wanpela man em ol lain i ting em i kilim Alison.

Em i tok, ol lain bilong Yangoru na Kubalia long Lae tu i bin traim long holim wanpela bung long kamapim sampela tingting na rot bilong stretim hevi ya. Tasol dispela bung i no kamap bikos nogat man i kam long bung.

Stori i kamap olsem ol pipel bilong Kubalia i givim taim long nau inap 2 Septemba long ol Yangoru pipel i mas kamap wantaim dispela kompensesen mani. Dispela em long neks wik tasol.

Ripot i tok man Kubalia ya i bin gat sampela hevi wantaim tambu bilong em long Lae. Long morning em i bin go bek long haus bilong tambu long ol i stretim toktok tasol dispela birua i stap na wetim em. Olsem na ol i pait we ol lain tambu bilong em i sutim em long naip.

Bodi bilong em i go pinis long pels Huaragen na ol i planim pinis.

Metropolitan Supritenden long Lae Tony Wagambi i tokaut tu olsem hevi bilong stilim ka insait long Lae i wok long go bikpela nau.

Insait long dispela mun, ol i kisim ripot long 14 ka olgeta i bin lus long stil pasin. Lae polis i wok strong na kisim bek 11-pela ka. Na tripela em lus olgeta.

Mista Wagambi i tok ol stilman long Lae i save go was long geit bilong ol haus na taim papa bilong haus i kam long ka na i laik go long haus, bai ol stilman ya i save hensapim ol na kisim ka.

Olsem na Mista Wagambi i askim ol man i gat ka long i mas lukluk gut taim ol i draivim ka i go long haus. Ol i no ken stop taim ol i lukim olsem ol man i sanap nabaut long geit o dua bilong haus bilong ol.



### Mis EM TV save danis ya

• Man, Mis EM TV Rita Stegman i save seksek tu ya. Rita bilong Simbu i traim liklik Manus danis long Always Motel long dispela wik. Rita i resis long Kamap Mis PNG bilong dispela yia. Foto: Ivan Bayagau.

## Kopiak rot gat bris nau

### ARI GUH DANDEE i raitim

OL pipel bilong Kobiak long Bululu distrik bilong Morobe provins i ken kisim mPMV i go olgeta nau long ples bilong ol. Bikos rot i go long ples i gat bris pinis.

Olsem na ol i amamas tru long memba bilong ol long Palamen, Samson Napo. Bikos Mista Napo i bin helpim na baim ol samting bilong wokim dispela bris.

Bikpela tok tenkyu i go long Napo i kam long mausman bilong ol Kopiak pipel, Yang Keyuc.

Mista Keyuc i tok ol pipel i bin painim hat tru long kisim PMV ka i go olgeta long ples. Tasol nau wantaim dispela bris, ka i ken go olgeta nau. Na ol i ken kisim gaden kaikai, na ol kes krop i kam salim long Lae.

# RICE

*That's right*





## 21st ANIVESERI na NESENEL DEI MAS(parade) Mande Septemba 16th 1996

Nesanel Events Kaunsol(NEC) na Provinsel Events Komiti(PEC) i singaut i go long ol grup husat i gat bikpela tingting long olgeta hap bilong komyuniti long kamap na stap insait long Nesanel Dei na 21st Aniveseri Mas long Mande Septemba 16th 1996.

Nesanel Dei Mas bai kamap long ol wanwan Provinsel Senta na ol lain husat i laik stap insait i ken kam long ol:

- |   |  |
|---|--|
| • <b>Bisnis Haus</b>                      | • <b>Kaiserel Grup long bilas bilong Tumbuna</b> |
| • <b>Spots &amp; Klab &amp; Asosiesen</b> | • <b>Gavman Dipatmen</b>                         |
| • <b>Sios Grup</b>                        | • <b>Non-Gavman Ogenaisesen</b>                  |
| • <b>Wimen Ogenaisesen</b>                | • <b>Sevis Klab</b>                              |
| • <b>Yut Grup</b>                         | • <b>Na ol narapela komyuniti grup tu</b>        |

Nesanel Dei Mas Prais bai go long namba wan grup tru insait long wanwan eria

### Ringim Nesanel Events Kaunsol o Provinsel Events Komiti long kisim wanpela Nesanel Dei Mas Rejistresen Fom

Provincial Events Committee North Solomons Province	Phone: 93 9792 Fax: 93 9798	Provincial Events Committee Milne Bay Province	Phone: 64 1132 Fax: 641 1402
Provincial Events Committee East New Britain Province	Phone: 93 7470 Fax: 93 7070	Provincial Events Committee Central Province	Phone: 321 2738 Fax: 321 3895
Provincial Events Committee West New Britain Province	Phone: 93 5073 Fax: 93 5298	Provincial Events Committee Gulf Province	Phone: 648 1119 Fax: 648 1119
Provincial Events Committee New Ireland Province	Phone: 94 2289 Fax: 94 2072	Provincial Events Committee Western Province	Phone: 645 9138/9155 Fax: 645 9042/9176
Provincial Events Committee Manus Province	Phone: 40 9132 Fax: 40 9038/9218	Provincial Events Committee Southern Highlands Province	Phone: 59 1388 Fax: 59 1274
Provincial Events Committee West Sepik Province	Phone: 87 1251 Fax: 87 1285	Provincial Events Committee Simbu Province	Phone: 75 1219 Fax: 75 1024
Provincial Events Committee East Sepik Province	Phone: 86 2146 Fax: 86 2860	Provincial Events Committee Eastern Highlands Province	Phone: 72 3366 Fax: 72 3365
Provincial Events Committee Madang Province	Phone: 82 3752 Fax: 82 3036	Provincial Events Committee Enga Province	Phone: 57 1060 Fax: 57 1268
Provincial Events Committee Morobe Province	Phone: 43 1665 Fax: 42 4745	Provincial Events Committee Western Highlands Province	Phone: 52 1627 Fax: 52 2316
Provincial Events Committee Oro Province	Phone: 329 7345 Fax: 329 7525/7530		



16th September  
Our National Day



Official Sponsor

National Events Council P.O. Box 1975 Waigani Phone: 323 2000 Fax: 323 1975



■ Papa Kanage i bilong Manus. Tasol nau em i stap na wok long Wewak. Em wantaim famili i save slip long Kreer Heights.

Papa Kanage i no save long draivim ka. Na tu em i no save dringim bia. Tasol ol lain haus klostu long em, ol i save mekim dispela kain pasin planti taim. Na pikinini bilong Kanage save lukim. Na ting olsem ol man i save dring bia, ol tasol i gat save long draivim ka.

Wanpela apinun Kanage pinis wok na go long haus. Na junia kirap na tokim papa olsem: Daddy, yu mas dring bia na bai yu save long draivim ka. Na taim yu draiv, bai mi raun wantaim yu long ka. Kanage harim na sekim het bilong em. Na painim tok pisin long bekim long junia.

• Panismen em nupela tok long yau bilong junia. Em i no save harim dispela tok long bipo. Na tu em i no save long mining bilong dispela tok. Junia ting olsem panismen em wanpela kaikai. Wanpela de junia kisim sik long bel. Na em i go long liklik haus long rausim kago bilong em. Junia kisim taim nogut tru long bel. Na taim em i go long liklik haus, em i no sindaun gut long sit, na spreim sit long liklik haus.

Papa Kanage lukim olsem na i no amamas long junia. Em tokim junia nau: Nau bai yu gat panismen. Apinun nau Kanage go bek long haus na junia kirap na tokim Paps Kanage: Na panismen bilong em we? Junia tok olsem na stat krai long paps long givim em. Tasol samting tru, panismen long junia em olsem, em i noken go na pilai suait long haus.

Posin Mangi  
WEWAK

□ Kanage i bilong Kimbe. Em kisim tupela wik malolo long wok na go limlimbur long Rabaul. Lip i pinis na wanpela Trinde moning, em go long Kokopo maket. Na laik baim sampela buai. Na bai kaikai long sip na go bek long Kimbe. Tasol sem taim maunten paia i pairap. Em tanim na lukim wanpela kum katim meri i pasim laplap i tanim nek na putim ai narakain stret long maunten paia. Ai bilong meri ya i stap long maunten paia. Na Kanage pendaun long baim buai na lukluk i go antap long meri ya na askim: Yupela lukluk long wanem ya? Na meri ya bekim: Nogat! Mipela lukim maunten i paia ya!

Na Kanage i tromoi hap tok pisin gen: Na paia i lait? Meri kum katim i harim na lukluk go daun long Kanage na bekim: Larim em i lait. Kum katim meri tromoi dispela hap bekim na Kanage pillim olsem pawa i kisim em.  
Boi Kapont  
KIMBE

■ Kanage i bilong ples Dawage long Kundiawa. Long 1993 em bin go lukluk raun long Angoram wantaim wanwok bilong em, Siriki Bot bilong ples Kambaramba.

Taim PMV bas Namba 24 bilong John Mongo i stap long Angoram maket, Kanage supim het i go ausait long windo bilong bas. Arere long rot ol yangpela meri Megendo i salim pis i stap.

Kanage lukim ol meri Sepik na gras long skin bilong em i sanap. Kwiktai em tromoi Tok Pisin bilong em i go long ol meri ya: Hei ol Mama! Gutde tru! Mi ya, Kanage! King bilong Hailans Okuk Haiwe. Mi kam raun long baim ol meri long wan kina wan kina long san, na tu kina tu kina long nait. Na wok long moning na belo bek. Bai king bilong Kundiawa yet bai skelim kago.

Taim ol mama i harim olsem, ol i belhevi tru. Bikos kain strongpela Tok Pisin i bagarapim stret sindaun bilong ol. Mekim na sampela mama i pillim pekpek wara na i no sindaun gut.

Ol i kalap long kanu isi tasol na pul i go bek long ples. Taim ol pul i go, wanpela yangpela meri singaut i go bek long Kanage: Kisim strong bilong papa bilong yu na kam. Yu ting mi K2 na K1 bilong yu. Yu save meri Sepik em dia tumas ya. Kanage daunim spet tasol na singaut i go bek: Em i orait, win bilong yu!  
Jojo Pindo, WEWAK

• LUKIM MOA TOK PILAI LONG PES 16

# Kauage pulim ai bilong Kwin na wol

Tingim tasol olsem yu stap long bikbus na wanpela balus tiket i pundaun long han bilong yu na i askim yu long kisim balus i go long bikpela kantri Inglen long lukim kwin na dring ti wantaim em long haus bilong em.

Dispela em driman bilong planti Papua Niugini manmeri. Tasol dispela em trupela stori long Mathias Kauage, wanpela ples man husat i no go long skul tasol em i wanpela atis man bilong droim ol piksa.

Long Jun 13, 1996 wanpela toksave i kam long askim Mathias long go long Inglen long opim wanpela musium bilong Moden At na Galari long Glasgow, Scotland we em bai bungim kwin tu long hap.

Tasol dispela taim Kauage i no bilip tumas long askim ya. Olsem na em i no redim ol kolos bilong bilas, em i no redim inap mani na arapela samting. Em i stap tasol.

Kauage bai mekim bikpela tok amamas tru long wanpela nupela kampani Tanorama, long helpim long stretim ol pepa na paspot, toktok gut wantaim ol lain long Inglen na redim planti samting bilong em long i go. Kauage i skelim ol dispela kain helpim na i tok, "Mi amamas tru long Martin Brash na kampani bilong em i givim mi bikpela helpim tru na mi i go lukim kwin".

Antap long dispela, ol i salim pas tu i go long sampela kampani long helpim trip bilong Kauage. Tasol IPA i bekim bek wantaim K1,000 we Kauage i baim tiket bilong ol kago bilong em i go long balus. Hap mani em i holim long poket long yusim long Inglen. Olsem na em i tok "mi tenkyu tu long IPA long helpim mi long givim dispela mani".

Kauage i go pundaun long biktaun London long Sande 30 Jun na bungim Rebecca Hossack husat i go pas long lukautim em long stap long hap.

Long 3 Julai, Kauage i go insait long bikpela musium long dispela open de. Em i werim Papua Niugini tumbuna bilas bilong em na i go insait na bung wantaim planti arapela biknem atis bilong planti arapela kanti long wol na ol bikman tu wantaim. Kauage i sanap long fran bilong planti arapela atis wantaim bilas bilong em long welkamim kwin. Kwin i wokabout i kam na raunim Kauage pinis na bihain go bek long fran na sikan long em na mekim ol tok amamas. Pikinini bilong kwin, Duke of Edinburgh i kamap gen na tokim Kauage, "Mi amamas long bilas bilong yu long het tasol mi no laikim



• Kauage holim piksa bilong kwin

long tambolo". Tasol Kauage bekim, "Em longwe na tu ples i kol, mi kisim liklik tasol i kam. Tasol bihain mi kam bek bai yu lukim mi ful stret".

Opening bilong bikpela haus ya i stat na Musium Dairekta Julian Spalding toktok na kolim nem bilong Kauage olsem man i go pas long dispela bung long winim ai bilong olgeta manmeri. Em i kolim Kauage olsem namba wan atis bilong wol tude.

Bihain long em i dring ti wantaim kwin pinis, kwin i lukluk raun long piksa bilong Kauage na bihain Kauage i wokabout wantaim kwin i go daun long geit we kwin bai kalap long ka na i go. Kwin i tokim Kauage long tupela bai bung gen long Buckingham Pales long

Inglen. Kwin i givim oda long bukim wanpela hotel we Kauage bai slip long em 4-pela nait na strongpela sekyuriti gad bai was long em.

Bihain Kauage i putim wanpela so bilong em long banis bilong Rebecca Hossack Galari long London. Hai Komisina bilong PNG long London Sir Kina Bona i go opim na i pulim mak olsem 35,000 manmeri long go lukim ol piksa bilong Kauage.

Insait long dispela 9-pela wik em i stap long London, Glasgow Musium i askim Kauage long penim piksa bilong em long tripela longpela banis. Dispela piksa bai makim em i dring ti wantaim kwin na ol bai putim long dispela haus galari.

Klostu long pinis bilong stap bilong em long London, em i kisim piksa bilong em we em i droim Mis Simbu Kwin i go long givim long kwin. Em i tok olsem ol man i laik lukim kwin ya i no isi isi long bungim em long geit. Pulap tru ausait. Tasol nogat wanpela bilong ol bai i go insait". Em i go insait long olgeta geit inap long namba 4 geit we em i go insait. "Ol bodi gad na polis bilong kwin i was gut tru na salut long mi taim mi i go insait".

Tasol kwin i no kam bikos em istap yet long Skotlen. Olsem na sief Seketeri bilong kwin i kisim piksa bilong Kauage na tok sapos kwin i kam bek, bai em i tokim kwin long ringim Kauage long tupela i ken bung gen.

i go moa long pes 14



Bik Bro

# REBO



KLOSTU LONG TRAI-LAIN NA REBO KALAP NA TAKOLIM EM!!!

EM I NO ISI LONG EM... HAT TAKOL STRET...



BAI YU GO WEANA?

CLIFF!

NAU OL I ALTIM BAL I SO LONG WINGA SAI!!!




KAMON BOIS! KAM HARIAP NA SETIM-AP DIFENS!!



OL NOT BEARS I TRAI-HAT LONG PUTIM TRAI, TASOL DIFENS BILONG VIPERS I STRONG TRU!!!

DEFENS BILONG OL I STRONG TRU!!



WINGA PLAI KAM LONG KISM BAL!!!

Igo moa Neks Wik!!



# SIPAK MAIK



TARANGU MINISTA KISM KAGO BILONG EM NA GO LONG SIKS-MAIL SETELMEN...

MASKI! (SNIFF!) MI GO STAP WANTAIM OL VOTAS BILONG MI!

MI GO STAP LONG 6-MAIL SETOLMEN!



AIYOOO! MINISTA IKAM!!

WIYAKA BIKMAN IKAM!!



MI PAINIM PLES LONG SILIP... ER... INAP MI STAP WANTAIM YUPELA?

NO WARIS! BAI MIPELA BILDIM WANPELA HAUS KLOSTU LONG TOILET.



INO LONG TAHM NA HAUS BILONG MAIK I SANAP PINIS KLOSTU LONG TOILET...



WANPELA DE OL RASKOL MEKIM TRABOL NA POLIS REIDIM 6-MAIL SETELMEN...




MAIK I SILIP I STAP NA OL I BRUKIM DUA NA GO INSAIT!!!

SMASH!!!

HOT!!!

Igo moa Neks Wik!!

# SUPREME GUTPELA PRAIS



# YU GAT PINIS!

Nem: Lynda Tarutia  
Adres: C/-PO Box 3212, Boroko-NCD.

Save Laikim: Mi wanpela yangpela singel mama husat i painim ol penpren. Penpren em krismas i mas stap namel long

27 na 39 krismas. Tasol em i mas wanpela man bilong lotu, man bilong luksave na gat tingting, hones, gat gutpela pasin, na i no save dring bla. Mi promis bai gat bekim i go long husat i rait i kam long ml.




Nem: Marco P. Amon  
Krismas: 20  
Adres: Menzinang Bundin, PO Box 169, Bulolo, Morobe Province.

Save Laikim: Mi laikim ol meri Madang long kamap olsem penpren bilong mi. Ol samting mi save laikim long mekim em go long lotu, harim lotu na kantri musik na pilai soka.

Nem: Steven Thomas  
Krismas: 18

Adres: PO Box 528, Lae, Morobe Province.  
Save Laikim: Ritim Baibel, mekim ol kristen stori, raun wantaim ol pren, na singim kankain singsing.



Nem: Joel Apmaekam  
Kenish  
Krismas: 22  
Adres: G&G Liufu Pty Ltd, PO Box 3290, Lae, Morobe Province.

Save Laikim: Mi save laikim long go long lotu, singim ol lotu singsing, ritim ol Baibel komik, trening long masel at na stap fit.

Nem: Mary Lucas  
Krismas: 18

Adres: PO Box 3446, Lae, Morobe Province.  
Save Laikim: Mi save laikim long harim kankain musik, ol lokol na bilong ol ovasis kantri wantaim. Na tu mi save laikim long mekim fani na go long lotu.



Nem: Penny Siktaop  
Krismas: 19  
Adres: C/-Tumolbil Base Camp, Tumolbil Last Corner, Vanimo, Sandaun Province.

Save Laikim: Ritim pas, stori wantaim ol pren, serim samting i go i kam, pilaim ol kankain gem olsem soka, basketbal na volibal na harim tok bilong Baibel.

Nem: Terence Suau  
Krismas: 17

Adres: Hawaii Vocational Centre, PO Box 256, Wewak, East Sepik Province.  
Save Laikim: Harim muysik, go long danis, pilai soka na volibal, stori wantaim ol pren na bungim ol nupela pipel.

Nem: Daniel Martin  
Krismas: 20

Adres: PO Box 1087, Madang, Madang Province.  
Save Laikim: Mi laikim ol man na meri wantaim long rait long mi olsem penpren. Pilai ragbi lig, harim kankain musik, raitim leta long ol penpren na tilim tingting wantaim ol.

Nem: Wilson Sakei  
Krismas: 18

Adres: Ex-Service camp, c/-Mission Pes, PO Box 36, Aitape, Sandaun Province.  
Save Laikim: Ritim ol komik buk, harim reggae musik, pilai ragbi tas, raun na lukim ol nupela ples na raitim pas long ol penpren.

**TOKSAVE KAM LONG EDITA:**

Wantok bai stat long prinim leta bilong ol manmeri husat i laikim penpren wantaim poto we i soim kila pes bilong yupela. Olsem na yupela ken salim tu poto bilong yupela i kam long dispela adres:

Painim Penpren, Wantok Niuspepa, PO Box 1982, Boroko, National Capital District.

# Giaman profet bai kempen long 1997 nesenel ileksen

**YAKAM KELO i raitim**

PLANTI ol kendidet husat i laik sanap long 1997 nesenel ileksen bai kamap olsem ol profet giaman long pulim tingting bilong ol manmeri. Ol bai salim ol kempen komiti i go aut olsem ol disaipel bilong karim nem bilong kendidet ya i go long moa manmeri. Dispela em lukluk na tingting bilong wanpela yangpela trening pasto, Evenjelis Lesley Naiyon bilong Amele, Madang provins.

Mista Naiyon i tok bipo long gutpela taim, yumi i no save lukim pes bilong ol dispela lain. Tasol nau bai yumi lukim ol bai sanap long olgeta kibung haus na rot na tu long ol haus lotu. Na ol bai traim long kisim sans tu long autim tok long lotu long yumi harim nek bilong ol na luksave long pes bilong ol.

Bai yumi ken skelim olsem bipo ol i no save lotu tasol nau bai ol i kamap long lotu na kolim nem bilong bikpela God na putim nem bilong bikpela God antap long posta bilong ol, Mista Lesley i tok.

Long ripot Evenjelis Lesley i raitim i tok, God i no longlong man o liklik pikinini. Em i no maupas na aipas. Dispela God tasol i kamapim graun na givim laip long yumi wantaim save bilong em yet na spirit bilong em yet, na piksa na bilong em yet. Olsem na sapos yumi laik kamapim kingdom bilong God long dispela graun orait, yumi mas laikim arapela olsem yu laikim yu yet na laikim God long bel na tingting bilong yu olgeta.



**• Evenjelis Lesley Naiyon.**

Ripot i tok tu olsem yu no ken stilim samting bilong arapela na no ken bagarapim graun, bus, wara na samting bilong arapela man. Olsem na sapos yu gat bilip long God, orait yu gat wok long lukautim samting insait long kingdom bilong God. Na mekim kingdom bilong God i kamap bihainim laik bilong em.

Ripot i tok giaman tok promis o giaman politiks em God i no save laikim. Em tingting bilong satan man nogut. Long sapatim toktok bilong em Luk 16; 14-17 i tok, *yupela laik bai man i ting long yupela mekim stretpela pasin tasol. Tasol God i save long*

*samting i stap long bel bilong man. Samting man i ting em gutpela samting tru tasol em samting nogut long ai bilong God.*

Em i tok nau yumi kristen i mas save olsem taim yumi i laik makim man long ilkesen, yumi mas larim God yet i go pas long dispela disisen bilong yumi. Askim God long putim trupela lida long het bilong yu na han bilong yu i ken makim bihainim. I gat ol gridi man na man bilong bagarapim ol samting. Olsem na lukluk gut na skelim ol gut, em i tok.

Ripot i tok dispela kain man i save brukim tru gutpela tingt-

ing na i no save bihainim na glasim na kisim gut wari na hevi bilong ol pipel. Ol i ting ol i save long hevi bilong pipel tasol nogat, ol i skelim long tingting tasol na i no lukim na pilim tru ol pen na hevi bilong ol pipel.

Em i tok bikpela samting long yumi ken lukluk na skelim em long man i daunim em yet na kamap olsem wokboi bilong pipel. I no man i soim olsem em i bikman na i gat nem long wok o komyuniti. Lida i mas bihainim pasin bilong Jisas yet we em i daunim em yet na kamap olsem wokboi bilong olgeta manmeri long graun na karim pen long nem bilong ol pipel tasol. Long dispela as, em i kamap King bilong heaven.

Long tude, em i tok ol man i hangre long pawa, mani, gutpela sindaun na arapela moa olsem na yumi mas lukaut gut. Taim bilong man i putim gras bilong sipsip olsem John Baptais. Na em bai kamaut na autim tok long ples kila. Tasol em i wel dok stret.

Em i askim publik olsem taim bilong ileksen i klostu, olsem na yumi i no ken mekim namba wan disisen long maim man. Tasol larim God i makim olgeta samting. Em i askim tu long yumi mas prea long God na God yet bai makim man inap long karim wok.

Evenjelis Lesley Naiyon i raitim dispela pas bihainim lukluk bilong em long ol hevi na pasin, nau i wok long kamap long dispela kantri bikos ol lida bilong mipela long gavman i mekim na ol hevi ya i kamap.

## Kauage pulim ai bilong Kwin na wol

*i kam long pes 11*

Long narapela de bihain long kwin i kam bek, Kauage i kisim toksave olsem kwin i amamas tru long kisim dispela piksa bilong Simbu kwin. Kwin i tok em bai putim dispela piksa long rum bilong em long slip. Kauage i tok olsem long ples bilong kwin, i nogat wanpela piksa o pen piksa i hangamap long wol. Em i tok planti atis i tokim kwin olsem yu putim ol piksa bilong mipela long pales (ples bilong kwin) bilong yu na yu bai kolim mipela sia, tasol Kwin i no laik. Kwin i tok em i amamas long pen piksa bilong Kauage na em bai hangamapim piksa bilong em long haus bilong em.

Olsem na long painim wanem kain atis samting long putim long haus bilong Kwin em bai yu painim tasol long las ples long graun. Kauage em namba wan atis long wol long putim mak bilong em long em long haus bilong Kwin. Na husat man inap putim mak bilong em long haus bilong kwin em bikpela samting tru na yu i no inap lusim tingting inap yu i dai.

Mathias Kauage i wokim rekot long nem bilong em yet olsem wanpela atis long go olgeta long London na bungim

kwin, dring ti wantaim em, givim piksa bilong em long Kwin na Kwin i hangamapim piksa bilong em long haus bilong em.

Kauage i statim dispela dro o penim piksa bilong em long 1969. Inap nau em 27 krismas olgeta na em i bin raun pinis long 15 ovasis trip long soim ol piksa bilong em. Em i raun olsem long Australia, Jemeni, Inglen, Filipin na arapela kantri moa.

Em i sanapim ol piksa bilong em long ol dispela kantri pinis, insait long ol hotel na ol musium insait long wol. Em i penim piksa bilong em long ol haus, bris na antap long planti arapela samting mao. Long Jemeni bai yu ken lukim ol kain kain kala piksa bilong PNG flak, kumul pisin na ol paitman i bilas long pait.

Long Papua Niugini yet em yu ken kukim ol piksa bilong em i hangamap long wol bilong haus palamen na tu long opis bilong ol minista na memba.

Olsem na wanem kain samting em yumi save tok long appim nem bilong Papua Niugini? Planti saveman olsem dokta, politisen na arapela moa i apim nem bilong PNG long wok bilong ol. Na Mathias Kauage tu i wokim wankain long

apim nem bilong Papua Niugini long droim ol piksa bilong em na soim long arapela kantri long wol. Na dispela i apim tru nem bilong Papua Niugini long ol wok at na kalsa bilong mipela.

Kauage i apim tru nem bilong PNG long arapela kantri insait long wol moa long ol arapela i ken mekim. Na nau em i winim tru bel bilong Kwin.

PNG gavman i no save hariap long givim helpim long ol askim bilong kain wok olsem taim ol i askim long gavman i helpim. Bikpela helpim i save kam long ol arapela kantri na wanwan poroman na wantok long ol kain man olsem. Olsem nau Kauage i mekim bikpela samting long dispela kantri, PNG gavman i mas luksave long em na givim em gutpela luksave. Tru olsem em i wokim nem bilong em yet tasol nem bilong PNG i go wantaim wok bilong em.

Kauage i gat bikpela plen long wok bilong em tasol em bai i go bek stap long ples bilong em long Simbu provins. Tasol em bai raitim pas na askim gavman long helpim em long bihain taim kain askim olsem i kam long em i go soim ol piksa na wok bilong em.



• Tumbuna danis bilong Nu Ailan provins. Ol i soim las wiken long Mosbi.



• Narapela tumbuna danis bilong Nu Ailan provins.



• Tumbuna bilong Siasi tu i kamap na mekim singsing na danis bilong ol.

## Tumbuan lusim ples hait na kam aut

### YAKAM KELO i raitim

NAMBA WAN tumbuan danis i bin kamap long pablik long Mosbi long las wiken we i mekim planti manmeri i kirap nogut long lukim na tu i pretim ol ilklik pikinini husat i bin stap long dispela taim.

Dispela Tumbuan Mask Festival i bin kamap olsem namba wan taim bilong em na bai i kamap moa long bihain. Tumbuan danis yumi i no save lukim bikos long ol strongpela na bikpela pasin kastom o pasin tumbuna i stap long en nau i kam aut long pablik olsem wanpela tumbuna danis o pilai olgeta manmeri i ken lukim.

Long las wiken ol tumbuan danis i bin kam long Nu Ailan provins, Is Nu Briten, Kombe long Wes Nu Briten, Siasi long Morobe provins, Manam long Madang provins na Asaro Madmen bilong Isten Hailans provins. Ol lain bilong Nu Ailan i bin putim kamap tupela tumbuan danis bilong ol. Tupela tumbuan danis i no wankain. Tupela i gat narakain bilas na danis na tu singsing bilong tupela i no go wantaim. Arapela provins em ol i putim wanwan tumbuan danis tasol.

Tupela singsing grup husat tu i bin kamap na putim ol singsing na danis bilong ol. Ol i no tumbuan grup. Tupela grup ya em ol Westen provins na Milen Be Baniara grup.

Kain stail na bilas bilong ol dispela tumbuan danis i mekim skin bilong planti manmeri i kirap tu bikos dispela

em namba wan taim bilong lukim. Nesenel Ats Komisin i bin putim kamap dispela singsing o Tumbuan Mask Festival. Na ol i laikim bai dispela i mas kamap long olgeta yia we i no inap go wantaim arapela singsing tasol em i mas spesel o wanpela singsing danis bilong em yet long taim bilong em yet. Tasol i gat ol tok kros i kamap long arapela husat i bin lukim dispela tumbuan danis. Ol i tok Nesenel Ats Komisin i no gat rispek long kastom na pasin tumbuna we i banisim dispela tumbuan danis.

Ol i toktok i kamap olsem dispela tumbuan danis em ol bikpela samting long lukluk bilong ol man long ples. Bikos sampela tumbuan i makim spirit o tewel bihainim bilip bilong ol pipel. Olsem na ol i no save kisim em i kam aut nating. Ol i mas wokim ol kaikai, wokim ol toktok, redi ples, ol meri na pikinini i no ken jukim na planti arapela samting moa. Bikos long dispela rispek, mipela i mas redim ol dispela samting i stap pastaim orait mipela i ken pulim tumbuan i kam ples klia.

Planti i tok gavman o Nesenel Ats Komisin i nogat rispek long tumbuan bilong mipela na i laik pusim tasol i go aut long pablik i lukim olsem singsing na danis nating bilong amamas long en. Dispela samting i save hait strong tru bikos long ol lo na bilip we i banisim em, wanpela bikman bilong Wes Nu Briten i tok.

Em i tok olgeta samting bilong tumbuna i kamaut pinis long ai bilong arapela kantri. Nau yumi i laik rausim dispela las tumbuna danis na singsing bilong mipela i go aut tu, em i tok.



• Ol bikman bilong Manam i paitim kundu na pulim tumbuna bilong ol.



• Ol bikman bilong Kavieng i singsing na brukim kundu long mekim ol tumbuna bilong ol i danis.



• Singsing grup bilong Siasi i singsinglog mekim tumbuna i danis.



□ Kanage i stap long PS Kantri na i go limlimbur long ples bilong San i Ret (Sandaun). Em i go stap i go na wanpela potnait wik Fraide boi i go krus raun long Vanimo taun maket na lukim tupela yangpela resa bilong ples Lido i wok long salim plawa bols na mekimsave long paitim tokples i stap. Kanage i kam akros long tupela na wanpela i tokples long arapela olsem "Obibi Bolu." Kanage i harim dispela hap tokples na em i no bisi. Taim em i abrusim tupela resa ya na i go, em i harim gen dispela hap tokples.

Taim em i harim namba tu taim, Kanage i ting olsem tupela meri ya i tok nogutim em. Olsem na boi i tanim na bikmaus long tupela meri ya na i tok "Wankain." Na ol manmeri i harim na i askim Kanage long watpo na em i bikmaus. Na Kanage i tokim ol: Nogat, tupela ya i tok nogutim mi olsem "O pispis bol yu." Olgeta manmeri i lap na tokim Kanage: Tupela i no tok nogutim yu. Nogat ya. Wanpela i tokim arapela long givim em kambang hariap.

Kanage i harim olsem na em i sem nogut tru. Tasol long haitim sem bilong em, em i tokim tupela resa bilong Lido: Em i orait tupela susa, olsem tok i stap pinis, laka. Yutupela i laki olsem em Sandaun ya, ples bilong Mama Monika. Sapos ples bilong Papa Kela PS olsem, bai yutupela kisim filings long sutim tri kona kandis ya.

**Siloks Waranduos WEWAK**

■ Kanage em i wanpela lapunman bilong Wewak na em i save mekim ol kaving na salim nabaut long ol maket insait long Is Sepik provins. Wanpela taim em i go salim ol kaving bilong em long sait bilong Windjama Motel i stap. Na wanpela turis meri i go na askim Kanage long ol pukpuk kaving bilong em. Turis meri ya i go na askim Kanage long Inglis: How much for those pukpuks? Taim turis meri ya i askim Kanage, Kanage i kisim gutpela filings nating. Kanage i laik tokim em olsem em i salim long K5 long wanpela, tasol hai filings i long-longim em na em i tokim turis meri ya: Fail sinners for dish push push.

Turis meri ya i harim harim na em i givim ful small long Kanage na em i rausim K10 long hapaus bilong em na givim long Kanage. Na em i kisim tupela pukpuk kaving na i go.

Taim em i go pinis, Kanage i kirap na tokim em yet olsem: Ol lapun Sepik tu i save katim filings bilong ol waitmeri ya. Kanage i tok olsem na em i kilim skin long lap.

**Daumbasie Lohaltz WEWAK**

□ Kanage i go lukim wanpela SP Inta Siti ragbi lig pilai long Lae na ol i tokim em olsem geit fi em K5 long ol bikpela manmeri na ol skul manki i gat ID kat em K1 tasol. Kanage i lukim ol notis ol i putim long geit na em i kirap kisim haus sik kat bilong em na i go soim long ol husat i kisim mani long geit. Taim Kanage i go na soim haus sik kat bilong em, wanpela meri Tolai husat i sindaun long geit i ting olsem em trupela ID kat na Kanage i wanpela sumatin. Olsem na em i oraitim Kanage long baim geit long K1 tasol.

Taim Kanage i wokabaut i go insait, em i tanim na tokim meri Tolai ya olsem: Namu Kara Matam tasol na mi save wari.

Meri Tolai ya harim olsem na em i lap indai na Kanage wokabaut i go na painim ples bilong sindaun na lukim pilai.

**Anauya Jembok Wopa Kantri**

■ Kanage i bilong Wewak Lokol. Wanpela taim em i limlimbur wantaim ol kas bilong em long taun. Ol i raun pinis na kalap long ka bilong wanpela waitman i save stap long Tawa.

Ol i go long Kreer maket na kisim ol turis long go long Tawa. Taim ol i stap namel long Kreer na Tawa, wanpela turis i askim: Boys, how far is it from here to Tawa? Ol kas bilong Kanage i laik tok tasol nogat, Kanage i bekim hariap tru na tok: Small far long Tawa to here.

Ol kas bilong Kanage i sem na giaman olsem ol i no save long em.

**Luss Foggie MOSEI**

# Brata na susa kilim snek nogut



BIPO, bipo tru long taim bilong ol tumbuna long hap bilong Kimil insait long Westen Hailans provins, i bin i gat wanpela bikpela na traipela snek i stap. Nem bilong dispela snek ya em Wani Muming. Dispela snek i save stap insait long hol bilong wanpela bikpela ston.

Olgeta nait Wani Muming i save painim ol samting bilong kaikai. Sapos em i no painim sampela samting long kaikai, em i save belhat na i go long ol ples na kaikai ol manmeri, pikinini na animol. Taim em i kilim ol manmeri, pikinini na animol na kaikai pinis, em i save amamas nogut tru na i go bek long haus bilong em.

Wani Muming i mekim olsem tasol i go na ol pipel long dispela hap i save pret nogut tru. Olsem na long nait taim ol meri na pikinini i slip, ol man i save sindaun na was long ol. Ol i no save slip, ol i save sindaun na was long ol meri na pikinini i go inap tulait. Taim ol man i slip long san, ol meri i save go long gaden long kisim kaikai na ol arapela samting bilong nait. Taim ol man i go long bus long painim abus long nait na ol no kam bek long ples, ol meri na pikinini i save olsem dispela snek i kaikaim ol pinis.

Ol yia i kam i go, ol mun i kam i go, ol wik i kam i go na ol de na nait i kam na i go. Snek nogut Wani Muming i mekimsave long mekim dispela wok bilong em long painim kaikai long nait na taim em i no painim kaikai, em i save go long ples na kilim ol manmeri na pikinini na animol.



Ol pipel long ples i save wari tru long ol lain we Wani Muming i kilim na kaikai. Turangu ol pipel long ples i painim hatpela taim stret na i no save long mekim wanpela samting. Mekim i go na namba bilong ol manmeri na ol pikinini i wok long sot long ples.

Wanpela taim bikman bilong ples i holim wanpela bikpela kibung wantaim olgeta pipel long ples. Na olgeta pipel i saptim tingting bilong bikman long ol i mas lusim ples na i go long arapela hap. Olgeta pipel i wanbel na ol i redim olgeta samting bilong ol.

Em nau long nait ol i redim olgeta samting pinis na wet i stap long ples i tulait. Long bikmoning tru, ol i kisim ol samting bilong ol na wokabaut i go long wanpela arapela ples. Nem bilong dispela ples em Bunum Wo. Olgeta i go na wanpela meri tasol i stap long ples. Dispela meri em man bilong em i dai pinis na em wanpela tasol i stap. Em i no inap long bihainim ol arapela pipel bikos em i gat bel na em i painim hat long karim ol samting bilong em bihainim ol i go long nupela ples.

Em nau turangu meri i pret long Wani Muming na dikim

wanpela hof arere long haus bilong em. Na em i go insait long dispela hof na hait i stap. Em i stap i go na karim tupela pikinini, wanpela pikinini man na wanpela pikinini meri.

Meri ya lukautim tupela pikinini bilong em i go na tupela i stat long wokabaut. Ol i stap i go na tupela pikinini i stat long toktok na save long ol samting. Taim tupela i kamap bikpela, samting olsem 5-pela o 6-pela krismas, em i lainim pikinini meri long we bilong lukautim ol spia na pikinini man long we bilong wokim ol spia na tu rot bilong kilim snek nogut ya. Em i tok klia tu long tupela pikinini bilong em long watpo na ol tasol i stap long ples. Em i tokim tupela long dispela snek nogut i mekim-save long ol manmeri na pikinini i go na olgeta lain long ples i lusim ples na i go long arapela hap.

Meri ya wantaim tupela pikinini bilong em i stap i go na tupela pikinini i kamap bikpela na strongpela. Pikinini man i go long bus na karim ol samting na wokim ol spia na bunara na susa bilong em i save helpim em. Taim tupela i redim olgeta samting pinis na wanpela de tupela i tokim mama bilong tupela olsem

tupela i redi long kilim Wani Muming.

Wanpela de mama bilong tupela i redim ol kaikai bilong tupela. Na tupela pikinini bilong em i stretim na redim ol samting long arapela de tupela bai go na kilim snek nogut ya.

Orait long bikmoning tru long arapela de, mama i kirap na kukim kaikai bilong tupela. Em i pasim sampela long tupela bai karim i go wantaim tupela. Em i redim kaikai pinis na kirapim tupela na tupela i kaikai. Taim tupela i kaikai pinis, em i kisim ol spia na kaikai em i pasim na putim insait long wanpela bilum. Na tokim pikinini meri long karim. Taim ples i laik i go tulait olgeta, tupela pikinini bilong em i lusim dispela hol ol i hait na stap na tupela i stat wokabaut i go long ples we Wani Muming i stap.

Tupela wokabaut i go na kamap long dispela hol bilong ston we Wani Muming i stap. Taim tupela i go kamap, snek nogut ya i smelim tupela na lusim hol bilong ston na kirap kam ausait. Taim tupela i lukim olsem, susa i rausim ol spia long bilum na givim long brata bilong em. Taim Wani Muming i laik putim het bilong emi kam ausait olgeta, brata i aste yet i redi pinis na stap. Wantu em i tromoi namba wan spia bilong em i go na sutim het bilong Wani Muming. Susa i givim moa spia na brata i mekim-save long sutim snek nogut ya i go inap em i kilim em i dai olgeta.

Bihain nau tupela i bringim gutpela nius i go bek long ples na tokim mama bilong tupela olsem tupela i kilim pinis Wani Muming. Mama bilong tupela i amamas nogut tru long tupela na ol i stap wantaim amamas long ples i go inap mama bilong tupela i dai na lusim tupela tasol i stap.

**Johanna Ding na Jennifer Klap Fatima Primary School Banz**

# Boipren marit tasol laikim mi yet

**Dia Lalplain,**

*Mi bin prenim wanpela man long arapela koles long tripela yia na mitupela i pasim toktok long marit. Bihain long em i greduet na go long ples, ol lain bilong em i pusim em long maritim wanpela meri long ples. Olsem wanpela Kristen, mi laik stopim dispela prensip bilong mitupela. Olsem na mi raitim na salim planti pas i go long em na tokim em long dispela tingting bilong mi. Tasol em i go het yet long salim pas na tu salim ol presen long mi. Na mi save les long kisim ol dispela presen na pas. Mi gat wari olsem sapos lain bilong em i painim aut long samting em i wok long mekim, ol bai no inap amamas na tu ol bai kros.*

*Mi save Baibel i tok olsem wanpela man na meri taim tupela i marit bai stap wanpela bodi i go inap long taim indai i bungim tupela. Mi respektim lo bilong God na mi nogat laik moa long mekim wanpela samting dispela man.*

**FREEDOM**

**Dia Pren,**

Olsem wanpela Kristen yu gat gutpela tingting olsem em i no stret o gutpela long yu go het yet long i gat rilesensip wantaim dispela man bikos em i marit pinis. Dispela i kliapela Kristen tising o lo. Yu tok stret tu olsem sapos em i go het long salim pas na presen long yu, bai i gat hevi



i kamap sapos meri bilong em na ol wan-tok bilong em i painim aut.

Hevi yu gat nau yet i olsem man ya i laik holimpas yet long rilesensip bilong yutupela tasol yu no inap long stopim em. Yu bin askim yu yet long watpo na yu no inap long stopim em?

I luk olsem i gat planti as. Wanpela ating i olsem ol lain bilong em i pusim em long maritim meri long ples na em i no luvim na laikim dispela meri. Em i laikim na luvim yu na i laik holimpas yet long dispela rilesensip bilong yutupela. Arapela as i olsem yu luksave olsem yu mas pinisim dispela olpela rilesensip bilong yu wantaim em. Tasol yu no strong inap long tok klia long em long tingting na bilip bilong yu. Eksampel-yu bin tok klia long em long watpo na yu gat laik long pinisim dispela prensip bilong yutupela? Yu bin tokim em olsem dispela i egensim Kristen bilip bilong yu? Yet arapela as ating i olsem yu

laikim na luvim em yet na em i luksave long dispela. Maski em i salim ol presen na yu les-long kisim. Bikos yutupela i bin pren long tripela yia, mipela i gat luksave i stap sapos yu laikim em yet. Sapos dispela i tru, em bai save taim yu toktok long em na dispela bai strongim em long go het yet long lukim yu.

Sapos ol samting mipela i tok antap i tru, bai yu mekim wanem samting long mekim em i luksave long tingting bilong em na pinisim dispela olpela rilesensip? Bai moa gutpela sapos yu raitim wanpela strongpela pas long em na tok klia long em long watpo na yu gat bilip long dispela rilesensip bilong yutupela i mas pinis. Dispela i min olsem yu mas tok klia long ol Kristen bilip bilong yu na askim em na kirapim tingting bilong em long luvim na laikim meri bilong em.

Arapela samting i olsem bikos yutupela i pren long tripela yia, sapos yu toktok long em dispela bai kirapim tingting bilong em long taim na go hetim dispela filesensip. Olsem na yu mas traime long abrusim em o noken toktok long em.

Arapela samting gen i olsem long helpim yu long abrusim yutupela yet, mipela i askim yu long painim arapela boipren hariap. Sapos em i save olsem yu gat nupela boipren, em bai traime long lusim tingting long yu na dispela olpela rilesensip bilong yutupela.

**Lalplain**



# Noken tok kros long lotu

**Dia Edita**  
 Mi laik autim liklik wari bilong mi i go long ol dispela man husat i save tok resis long ol kainkain lotu i stap insait long dispela graun.  
 Olsem na long tingting bilong mi, mi tok olsem i no gutpela long resis long ol sios.  
 Tru i gat planti lotu tasol ol i save lotu long wanpela God tasol.

I nogat planti God. Dispela ol lain husat i save tok resis long ol lotu ating ol i nogat het bilong tingting na save.  
 Em tasol liklik wari bilong mi.  
 Sapos yu husat i laik bekim em laik tasol.  
**Rubzle Wara Cosmas**  
**Wewak, ESP.**

# Larim Peter Barter i stap yet long sit

**Dia Edita,**  
 Mi wanpela man bilong ples tasol mi laik tok klia long ol manmeri bilong Madang olsem nesenal ileksen i kam klostu olsem na noken traim resis wantaim Peter Barter. Larim em i stap olsem tasol long sia bilong em yet bikos nau yupela i ken lukim Madang i laik senis. I no olsem bipo bipo ol gavman bilong daunim moni bilong ol pipel i stap.  
 Dispela man em namba wan lida bilong Madang. Yu wanpela i laik reis wantaim em i olsem yu nogat moni olsem na yu laik stilim moni bilong ol pipel o bilong gavman.  
 Peter Barter i no sot long moni na

sanap nogat em i gat inap tasol em laik helpim Madang provins na ol pipel bilong en. Mista Barter i gat bikpela tingting na bilip long kirapim Madang provins stret. Olsem na em i go insait long sanap long ileksen na winim. Plis larim em i sanap olsem.  
 Yu husat i no ken traim rijinol sit, nogut yu lusim moni bilong yu olsem na maski long tingim dispela. Taim Madang Open.  
 Em tasol na husat i laik sapatim o egensim em orait tasol.  
**James Nobital Bigawa**  
**Madang provins**

# God em stia bilong gutpela kantri

**Dia Edita**  
 Planti taim mi save amamas tumas long ritim *Wantok Nius*. Na mi laikim olsem na tude mi wok long lukim bung wantaim o yuniti bilong kantri em i pundaun tru.  
 Bikos mi lukim insait yet long Sauten hailans mipela i gat 9-pela mamba bilong nesenal-palamen tasol, ol dispela mamba bilong mipela ol i no save wok bung long kirapim wok developmen long Sauten hailans provins. Olsem na yuniti bilong dispela pipel long provins em i pundaun tru.  
 Bikos pastaim gavman bilong Palas Wingti na Chan, Roy Yaki em Minista bilong trenspot na Woks na em i wokim planti wantok sistem long helpim ol lain bilong em yet. Na i no lukluk long ol arapela distrik bilong provins.

Na tu makim ol pablik sevans wansait tu. Olsem na nau tude tu husat man i kisim wok minista.wankain kain pasin wok long kamap long provins na yuniti o bung wantaim bilong mipela i pundaun. Na sapos yu lukluk long we i go bek long yia1968, 1972, 1977 na 1982. Haus Asembli bai yu painim stori olsem mipela dispela taim mamba bilong palamen mipela i no skul man tumas tasol mipela save wok bung gut tru. Dispela em i bikpela samting long kantri na mipela save wok wantaim long kamapim kantri go het long wokim ol kain kain wok developmen long Papua Niugini. Olsem na mipela karim kantri i kamap long kisim fri independens long Septemba 16 1975, na i tru dispela taim mipela i gat sampela kros pait long selp gavman

na independens. Tasol nogat hevi na man meri i no dai long dispela taim. Na tude PNG kisim independens 21 krismas i kam i go pinis nau.  
 Na 109 membas long Nnesenel plamen ol i wok resis long politiks planti taim na resis tu long mani na save bilong ol na yuniti wantaim wok developmen i wok long pundaun na bagarap na politiks i wok wantaim jeles griti selpis na pasin birua na bel sigarap i wok long kamap nau. Na mi sori tumas long kantri na provins tasol mi laik yumi askim Papa God na ol dispela hevi yumi putim i go long han bilong bikpela God bilong yumi.  
 Em tasol.  
**Matiabe Yuwi OBE**  
**Former MP Tari SHP.**

# Traim sensim stail bilong Madang musik

**Dia Edita,**  
 Mi wanpela manki long Sandaun, mi laik sapatim pas bilong Brata Nizia J Pellengo pas bilong brata ya i tok long stail musik bilong ol Madang.  
 Yes Brata pas bilong yu em i stret olgeta.

Long radio Sandaun mi no save harim ol musik bilong PNG. Tasol pawa ben bilong Madang i save mekim mi sik malaria na het i save pen long harim dispela musik bilong Madang tasol olgeta taim long redio Sandaun.  
 Nogut, ol i mas i gat

wanpela papa na mama bilong ol ya. Olsem tu mi laik askim?  
 Ating olgeta pawa em ol singa bilong Madang provins i mas kamap long wanpela tumbuna bilong ol tasol.  
 Sapos nogat, ol i mas senism nek na bit bilong musk liklik long larim ol manmeri i ken

harim kain kain kra i na stail bilong musik. I no dispela kain wankain stail olgeta taim tumas.  
 Em tasol na bai mi amamas tasol long lukim husat man i sapatim o egensim mi.  
**Dennis Yano Nai**  
**Vanimo**

# Prais bilong ol samting long stua i go antap tumas

**Dia Edita**  
 Mi wanpela manki long ples Balepa insait long Madang provins tasol, nau yet mi i stap long Kainantu insait long Isten Hailans provins.  
 Yes, mi rait long autim bel hevi na wari bilong mi i go long ol prais kontrola, i mas kam long Kainantu taun na sekim ol prais bilong ol samting olsem kolos na ol kaikai long ol stua.  
 I luk olsem ol papa bilong ol dispela stua i no save tingim mipela

ol grasruts long ol haus lain na ol pablik sevans husat wok long Kainantu.  
 Na tu i luk olsem ol helt inspekta i mas kam na sekim ol haus kaikai bilong ol dispela stua tu.  
 Bikos long lukluk bilong mi yet, planti samting i no gutpela tru long helt bilong ol manmeri.  
 Mi lukim olsem ol stua i no save redim gut ol kaikai o wasim gut han o ples bilong salim kaikai. Planti pipia na doti tumas na ol manmeri inap kisim sik nogut long

en.  
 Liklik ples olsem Kainantu tu i no gutpela long mipela i baim ol kaikai o samting long bikpela prais olsem. Mi askim gavman tu long lukluk na glasim prais bilong ol kaikai na samting long Kainantu.  
 Yu husat brata o susa i wanpela o egensim long dispela, rait tasol na mi bai lukim.  
**Segi Labtes Nid**  
**Kainantu**

# Sensim taipis bilong Bundarai CIS

**Dia Edita,**  
 Mi wanpela grasruts manki tasol nau mi i stap long Bundarai CIS long Kainantu wantaim kandre man bilong mi husat i wok olsem woda long Kainantu.  
 Yes, bel hevi na wari bilong mi em mi laik tok olsem dispela taipis o kuskus em i no fit long paitim ol opisal pas bilong ol woda gut long taiprait masin. Em save taipim ol nem i go

kranki olgeta.. Nogat spes namel long ol wanwan toktok. Olgeta stori em longpela na em i joinim tasol i go longpela inap long mak em i pinis. Wanem hap em i pinis bai yu kisim taim tru long win paip bilong yu bikos yu i no inap pulim win inap yu pinis long ritim pas.  
 I luk olsem bos bilong banis mas lukluk na rausim em, em pasim spes bilong sampela

lain long kisim wok i luk olsem em save i stap nating na pinsim moni nating bilong gavman. Bos lukluk na kisim nupela taipis o kuskus meri long opis bilong ol CIS long Bundarai haus kalabus.  
 Yu husat brata o susa long dispela banis i wanbel o egenisim, rait i kam long edita seksen na mi lukim.  
**Moidig Tuninya**  
**Goroka**

# Popondeta taun pulap long pipia

**Dia Edita,**  
 Toksave i go olsem planti hap bilong Papua Niugini taun bilong ol i klin o nogat. Mi no save tasol long hia Popondeta em rabis i pulap tru. Long wanem ol manmeri i save maketim buai daka klostu long stua. Na tu ol kaikai na spetim klostu long stua. Na tu ol kaikai na spetim klostu long dua we manmeri i go i kam na krungutim buai spet.  
 Em i no gutpela pasin. Long wanem sampela arapela kantri na ol waitman meri tu i lukim na tok bilas long yumi Papua Niugini. Em mi save tingting planti tumas long dispela na pilim sori.  
 Long wanem ol arapela provins i gutpela tasol hia long Popondeta kaunsil i no wok strong. Long

wanem ol manmeri toromi pipia o spetim buai.  
 Em wok bilong kaunsol. Yupela i no save mi tokim yupela toksave long manmeri tambu long salim buai daka long stua. Karim i go long ples maket na salim long en. Na tu long bikpela maket.  
 Tasol long main maket i no gutpela tumas. Long wanem em ples bilong salim ol kaikai stret bilong yumi kisim i go na kukim na kaikai long haus. Olsem na no ken salim buai na daka long bikpela maket stret. Tasol go salim long ol liklik maket long arere bilong taun.  
 Em tasol komplek bilong mi.  
**Bolman Bub.**  
**Popondeta.**

# Watpo na Bogenvil trabel kamap bikpela

**Dia Edita**  
 Mi wanpela Hailans manki husat i laik askim sampela poin i go long gavman bilong Chan na Haiveta long lukluk na skelim na mekim sampela eksen long Bogenvil trabel.  
 • Watpo na gavman i no digim aut long trabol bilong BRA?  
 • Watpo na Solomon Ailans oraitim BRA long kalapim boda?

• Watpo na gavman i no kotim Solomon Ailans long oraitim BRA long ailans bilong ol?  
 • Watpo na BRa lidas boss long Solomon Ailans?  
 • Wai na Solomon Ailans saptaim olgeta samting long BRA?  
 • Wanem taim bai gavman bai lukluk long BRA lidas long trabol?  
 • Watpo na soldias wok long dai yet olsem

dok na pik?  
 • Wanem taim bai Bogenvil trabol bai pinis)  
 • Watpo na gavman i no givim save long Solomon Ailans long sapatim BRA?  
 • Watpo na gavman westim taim long pinisim trabol?  
 • Inap gavman gat ai long pinisim o mekim eksen long 8 yias Bogenvil trabol. Em tasol na gavman i mas lukluk na skelim.

# Madang musik em stail moa

**Dia Edita**  
 Mi wanpela manki Madang nau mi stap long Vanimo, mi laik bekim pas bilong brata Nixcas J Pellengo i bin kamap long Wantok Niuspepa long 25/7/96 em i bin tok olsem, sikin indai long Madang musik.  
 Em i bin tok olsem, nek na musik bilong ol lain pawa ben bilong Madang i wankain tasol.  
 Brata sapos yu bin skelim gut ating i luk olsem ol sampela narapela lain tu i wankain. Olsem ol Tolai na ol

Kerema (sampela exampel) ol TV i gat ol wankain nek tasol na musik. Ol Kerema ol i gat wankain nek tasol, na ol Tolai tu i wankain.  
 Stail bilong musik tu i olsem. Ol Morobe ol i save mekim reggae em stail bilong ol. Na mipela ol Madang tu i gat stail bilong mipela yet.  
 Brata yu skelim, ol manki Madang ol i save singsing long ol kain laip bilong tete long ol we na stail bilong ol yet.  
 Na tu i luk olsem Madang musik i

wok long topim ol sampela hap nau ya.  
 Kain ol lain olsem Wali hits, man fes relis bilong ol i topim stret ol kaset sels long Saut Pasifik ya. Na singsing bilong ol, meri ya lewa i sanap namba wan long SP Top 20 amaspela wik olgeta na singsing bilong Old Dog and the Off Beats Kalibobo. Flying Fox na lait toktok kem olsem National Anthem bilong ol Madang stret, bara em mining tul ya skelim.  
 Kain nek bilong ol boi Madang tasol

i save mekim na ol man meri i no save sindaun gut. Olsem na brata yu tingim na skelim gut bihain yu ken toktok.  
 Wetim neks rilis bilong Wali Hits ating em bai kukim ples stret.  
 Ok brata, em tasol na tenkyu tru. Yu husait i laik sapatim o egensim mi yu welkam tasol, abang kitek  
**Daniel Rex Limbe**  
**Mad Gaunsit**  
**Vanimo**

Mi no gutpela man tasol em liklik rabis tingting bilong mi bikos mipela les pinis long dispela hevi long Bogenvil i stap longpela taim tumas na hevi bilong em i wok long bagarapim tingting bilong mipela ol Papua Niugini manmeri tu wantaim.  
**Woda manki**  
**CIS Bomana**

# Sandaun pablik sevans paulim ka

**Dia Edita,**

Mi wanpela manki Sandaun na mi laik autim bel hevi bilong mi i go long ol pablik sevans insait long Vanimo. Planti taim mi save lukim ol i yusim gavman ka olsem praiwet ka bilong ol. Ol i save karim ol famili bilong ol i raun nating long taim bilong wok, karim ol i go long maket na stua bilong baim kaikai.

Long wiken, mi save lukim ol i spitim nating ol ka olsem ka bilong ol yet stret long mekim dispela kain pasin.

Ating mi ken tok olsem ol ino wokim wok bilong gavman, nogat. Mi bilip olsem dispela pasin i kamap tu long ol narapela provins na mi tok dispela pasin i mas stop o pinis.

Em tasol bel hevi bilong mi na husat arapela i laik sapotim em laik tasol.

**Peter Werlye**

**Vanimo, Sandaun provins.**

## Pasindia sip sasim ol liklik manki olsem kago

**Dia Edita,**

Mi sapotim ol toktok bilong brata Kiwen, wanpela man Wes Sepik husat i bin rait i kam long Wantok Niuspepa long mun Me bilong dispela yia.

Brata ya i komplem long pasin we ol boskru long sip i mekim long sasim ol liklik pikinini long baim fi bilong kalap long sip long Vanimo i go long Wewak. Fi we ol i sasim i go long wan wan bek em long K2.00 na ol pikinini we krismas bilong ol em 5-pela krismas i kam antap.

Dispela mi lukim olsem em ino stret. Bikos dispela em ol kago nating. Na ol pikinini i no wok mani na yupela i sasim ol, nogat. Sasim ol papamama na ol pikinini maski. Larim ol i go fri.

Mi lukim long Wewak i kam long Madang na i go bek ol boskru na ol sekyuriti bilong sip i mekim wankain pasin long sasim ol pikinini. Olsem na mi no amamas long dispela samting.

Moabeta ol lain long Luteran Siping kampani i lukluk long dispela samting na traim senisim bilong mekim ol pasidia i amamas liklik.

Em tasol na mi bai amamas long lukim sapot bilong yupela arapela tu.

**Samuel Gidlon**

**Buluma, Kimbe**

# Larim Tekwie stap gen long palamen

**Dia Edita,**

Mi laik sapotim sampela toktok we pas bilong wan aidia brata Paul Litbagi i autim na we i bin kamap long Wantok Niuspepa bilong Julai 11, 1996.

Long sapotim pas bilong brata ya, mi laik putim tok olsem mi no laik bai nesenel memba na gavana bilong mipela long Sandaun, John Tekwie i lus long 1997 nesenel ileksen.

Mi laik putim dispela toktok i go long ol pipel bilong mipela

long provins olsem maski long senisim man tumas, traim na makim wanpela man tasol i go inap long 15 o 20 yia na skelim em na wok bilong em. Sapos wok bilong em i no gutpela, yumi ken senisim em wantaim nupela man.

Dispela tu inap mekim memba i go het long ol wok na plen bilong em long kirapim ples wantaim ol developmen na sevis. Sapos liklik taim o sot-pela taim tasol, bai i no gat inap taim bilong memba i

mekim samting bikos yu senisim em hariap na olgeta plen na tingting bilong em i go lus nating.

Nupela man i kamap na i laik traim wokim ol plen na tingting bilong em long senisim ples, na yumi kirap hariap gen senisim em. Ol plen na rot bilong kamapim senis long provins i bagarap gen.

Yumi senisim memba tumas klostu klostu, bai yumi i no inap tru long lukim wanpela gutpela developmen. Na yumi

bai i stap las provins yet long arapela Papua Niugini provins.

Dispela kain pasin tasol insait long Sandaun provins i kamap na yumi nogat sinia politisen o memba tu long palamen i stap olsem long ol narapela provins.

Husat i gat sampela toktok long dispela samting, plis rait i kam long Wantok Niuspepa na mi bai i amamas long lukim.

**Richard Philip**

**Vanimo, Sandaun provins.**

## Glasim gut hevi bilong ol woda boi

**Dia Edita,**

Mi wanpela woda na mi laik putim askim bilong mi i go long gavman sapos em i ken skelim gut na mekim sampela wok bilong CIS insait long ol haus kalabus long kantri.

Namba wan askim bilong mi i go olsem: Watpo Wabag na Laiagan haus kalabus i stap las insait long las 10-pela krismas yet?.

Namba tu, inap gavman i lukluk long olgeta haus kalabus insait long kantri na stretim wari bilong ol woda na ol kalabus manmeri?

Watpo na gavman i putim ol kalabus man-

meri long nogut kalabus?

Gavman i gat ai tu long lukluk raun long olgeta CIS banis long kantri o nogat? na

Watpo na woda i hatwok nating long lukautim ol biknem kalabus manmeri?.

Em ol dispela wari na askim bilong mi we mi laikim sampela bekim long en i kam long ol atoriti.

Tenkyu long yupela lukim na mi bai amamas long lukim bekim bilong yupela long Wantok niuspepa.

**Konsen Wodaman Bomana, Mosbi**

# Nogat senis long Henganofi eria

**Dia Edita,**

Komplem bilong mi i sut i go long nesenel memba bilong mipela long Henganofi em John Giheno.

Mi save olsem mipela ol pipel bilong Henganofi i makim em i kamap olsem memba long karim hevi bilong mipela na tokaut long ol long palamen na toktok strong long kisim sevis i kam long ol pipel.

Tasol i kam inap long nau, mipela i no lukim han mak bilong em long Henganofi.

Yes, mi save olsem sampela pipel bilong Henganofi ol i lukim han mak bilong olpela memba Snuku Klogie na klostu mipela i laik lukim han mak

bilong Viviso Seravo tasol yu putim bai ileksen long 1993 na yu win. Tasol i nogat han mak bilong yu yet mipela i lukim.

Henganofi i stap long bikpela bus yet na planti raskol pasin i kamap na go het yet. Wanem taim bai Henganofi i lukim senis?

Memba bilong Henganofi, tru yu gat nem long nesenel level tasol long ai bilong ol pipel bilong yu, em nogat.

Husat i gat komplem o sampela toktok long dispela samting, rait i kam tasol long Wantok Niuspepa na mi bai i lukim.

**Rodney Beniaso**

**Kiunga, Westen provins**

# Marit meri save paulim ol yangpela

**Dia Edita,**

Mi putim wari bilong mi long Wantok Niuspepa bilong ol manmeri long lukim na givim tingting bilong ol long en.

Dispela samting mi lukim i kamap long planti taim na mi no amamas long en.

Mi save lukim olsem planti marit meri i save wari tru long

mani. Narapela tu em planti marit meri i save paul wantaim ol singel man. Planti bilong ol singel man tu i no yusim het bilong ol bipo long ol i poromanim ol marit meri na dispela pasin ino gutpela.

Long taim bilong marit long haus lotu, tupela i save wokim tok promis long ai bilong God

na bihain ol i go wokim ol pamuk pasin. Dispela ino gutpela long ai bilong Bikman na ol arapela kristen manmeri.

Plis ol marit meri, moabeta yupela i yusim het bilong yupela liklik na wetim ol man bilong yupela na potnait mani we ol i save kisim. Maski long salim skin i go long ol singel

man.

Husat manmeri i gat sampela toktok long dispela samting, rait i kam tasol long Wantok Niuspepa na mi bai amamas long lukim bekim bilong yu.

**Kundlip Hingi**

**Bialla, Wes Nu Briten**

# Ol lain Telefomin i no save wok kaunsil

**Dia Edita**

Mi wanpela manki long Telefomin, Sandaun provins i laik kamautim bel hevi bilong mi i go long lain Telefomin insait long Sandaun provins.

Mi yet long lukluk bilong mi, mi no save lukim ol wok kaunsil liklik tu. Ai bilong ol i save op stret long wok moni tasol na long wokim wok kaunsil em nogat tru long ol stret.

Olsem na, gutpela ples balus bilong ol nau i pas pinis.

Na tu ol wok man bilong (TDDA) o Telefomin distrik developmen askiri-

men tu i no save lukluk long ples balus dispela kain bisi ples. Ol wokman bilong T.D.D.A i mas lukluk long dispela na putim kolta long ples balus.

Nau mi laik save long T.D.D.A moni i save go olsem wanem? Ol i save tingim poket bilong ol yet o em i save go olsem wanem?

Em tasol na nau yu husat i laik sapotim o egensim em welkam tasol.

**Maevers Bobo.**

**Telefomin, S.D.P.**

# Raitim soka stori bilong Mendi na Pangia tu

**Dia Edita**

Mi wanpela manki Pangia distrik long Mendi na mi laik autim wari bilong mi olsem long planti taim i kisim niuspepa na mi save ritim planti taim tasol mi no lukim nem bilong Pangia na Mendi soka asosiesen. Na mi bin baim niuspepa long planti taim na mi ritim na mi lukim nem bilong Mosbi na Lae na Madang na Hagen na ol narapela ples tu. Tasol mi no lukim Pangia soka asosiesen na Mendi soka asosiesen.

Nem bilong tupela na taim bilong soka tonamen nem bilong Pangia na Mendi i save kamap tasol i no save kamap long Wantok Niuspepa olsem na mi askim na save.

Mipela tu i save kikim bikpela soka resis long Mendi na Pangia. Olsem na yupela ol Wantok niuspepa lain i mas sekim mipela na kisim stori bilong mipela. Na tu mipela save tromoi mani long baim Wantok niuspepa olsem na yupela mas mekim gut long

mipela na raitim soka stori bilong mipela tu.

Em tasol wari bilong mi. Husat i laik bekim em laik tasol.


**Kariai Mari**

**Kapua Lake**

**Pangia - Mendi**



Salim pas i kam long:  
**WANTOK NIUSPEPA**  
 PO BOX 1982  
**BOROKO**



# PNG BUSINESS

Keep up to date with the latest happenings in the business and investment sector of Papua New Guinea by reading your copy of PNG BUSINESS.

Published at the end of each month, PNG BUSINESS is distributed direct to its target market, the decision makers and looks to comment on such items as new product releases, new company openings, any new initiatives which may influence local trade, changes to key management etc...

50¢ only!


The collage features several pages from the PNG BUSINESS newspaper. The top left page is the November 1995 issue (No. 265) with the headline "TOLUKUMA POISONED OUR FISH - VILLAGERS" and a sub-headline "... mine officials say no operation yet, water is clear". It includes a photo of a truck and text by Daniel Mona. The top right page is the June 1996 issue (No. 272) with the headline "RIC SEEKS AUST/ PNG ASSISTANCE TO FIGHT OFF TICK PROBLEM" and a photo of a man. The bottom left page is an advertisement for "Executive luxury at a very down to earth price." featuring a Mercedes-Benz. The bottom right page is another advertisement for "The Mercedes-Benz E-Class".

## ENSURE YOU STAY INFORMED WITH PNG BUSINESS

PROUDLY PUBLISHED BY WORD PUBLISHING COMPANY PTY. LTD. P.O. BOX 1532, BOROKO, NCD, PHONE: 325 2500 FAX: 325 2579.



• Pilaia bilong Kenmore i saitim lek long blokim bal tasol namba 14 bilong Sobou i kalap long kisim. Em Divisen 1 soka resis bilong Mosbi.



• Lella Gilchrist bilong Mosbi i pulim bal insait long PNG wimens trening kem long Mosbi.



• Susa ya i holim bal na redi long tromoi tasol ol wan pilaia i no kamap hariap long helpim em.



• Sobou na Kenmore pilaia i tromoi lek wantaim long bal. Tupela dro 2-2 long Mosbi soka resis las wik.



• Wantin Yangun bilong Lae i pulim bal i go long trening kem bilong ol meri long Mosbi las wik.



• Strongpela salens bilong netbal long Mosbi las wiken.





• Tupela Sobou pilaia i komplem olsem bal i bilong Sobou. Tasol Kenmoore pilaia i wet long referi i mekim disisen.

# Nagai askim ol soka pilaia long pilai strong na stap redi

## SOKA RIPOT

OL GUTPELA soka pilaia husat i nogat sans long stap insait long PNG skwat i mas was gut long skwat bilong tude na redi long kisim ples long bihain. Ol pilaia i no ken ting ol i no gat sans na stat long lusim pilai bilong ol, nesanel soka kosa Richard Nagai i mekm dispela toktok bihain long em i tokaut long fainal 22 skwat memba bilong PNG tim.

Nagai i tok dispela skwat bilong 1996, em i makim bihainim pilai bilong wanwan pilaia. Em i makim pilaia husat i gat gutpela eksperiens na i save pilai strong long traim winim gem.

Nagai i tok taim PNGFA i makim em long kamap kosa, em i bungim ol pilaia we ol i givim long em. Na em i kisim ol i go long trening. Em i tok insait long trening em i traim long bungim ol eksperiens bilong ol pilaia, lukluk i go long pilai ol i kisim long ol intanesenel gem long bipo i kam. Sampela ol sinia pilaia long sinia skwat bilong ol man na arapela bilong ol PNG junia tim long bipo i kam nau ol i pait long go insait long sinia tim.

Em i tok long lukluk bilong ol pilaia, olgeta i bung na amamas gut wantaim long toktok na klia long ol yet long pilai bilong ol. Dispela i mekim ol i gat strongpela bilip long ol yet olsem wanpela tim.

Sampela sinia pilaia i tok tu olsem dispela em wanpela bikpela senis ol pilaia go insait long sait bilong redim gut ol pila-

ia na bung wantaim bilong pilaia. Na dispela i soim strongpela sanap bilong tim.

Nesanel kosa i tok dispela mak nau i sanapim strong bilong PNG skwat long sanap long em bihain. Na husat kosa na menesmen bilong tim i kamap bihain long kisim skwat bai luksave long dispela na yusim dispela long redim skwat i go moa.

Bai PNG soka tim i redi long bung gen long Septemba 9 long fainal trening kem bilong ol i go inap long Septemba 14. Bai ol i kisim malolo long 15 na long Septemba 16, bai bikpela soka resis bilong Melanesian Kap na Wol Kap Kwalifai resis i stat. PNG bai pilaim namba wan gem long Septemba 16 egens Solomon Ailan long Sir Ignatius Kilage stedum long Lae.

Ol kantri bilong Saut Pasifik rijen husat bai kamap long Lae em, Solomon Ailan, Vanuatu, Fiji na Nu Kaledonia.

Kosa Nagai i askim olgeta skwat pilaia long no ken bagarapim skin bilong ol long dispela taim. Sapos ol i pilai long klap bilong ol, yet insait long lokel soka resis bilong ol, ol i mas pilai isi na was gut long abrusim ol bagarap inap kamap long lek na bodi bilong ol.

Em i askim ol kosa bilong ol klap tu long no ken traim long pusim PNG skwat pilaia tumas long lokel gem bilong ol. Ol i mas

was gut long ol na larim ol i stap gut inap long ol i ken bung gen na wetim bikpela soka resis ya long kamap.

Nagai i tok ripot bilong tim dokta i tokaut tu olsem olgeta pilaia i oraif. I gat wanwan wantaim ol liklik hevi tasol. Olsem na em i askim olgeta long lukautim ol yet gut na i no ken bungim bagarap.

Kosa i kisim bek John Laskam bilong Lahi na Taku Niebo bilong Mosbi olsem tupela was pilaia o sedo pilaia bilong PNG skwat. Tupela bai go wantaim ol 20 pilaia long Septemba 9 long las trening kem long Lae.

Kosa i tok em i holim tupela bikos long ol hevi we inap kamap long pilaia long las minit. John em fulbek pilaia na Taku em midfil pilaia.

Kosa i bin singautim Abiang Kera bilong Mosbi i bin go insait long skwat. Na em i kisim ples bilong Victor Carson bilong Madang.

Nagai i tok Victor em yangpela gutpela pilaia husat i gat planti taim bilong makim PNG yet long soka. Em i makim Abiang bikos long longpela eksperiens bilong em na tu em i gutpela long ritim pilai na man na i gat dispela bikpela veliu bilong golkipa bikos long eksperiens bilong em.

Em i tok bai ol i kolim yet Victor long skwat sapos hevi i kamap long golkipa. Na tu long neks yia na ol krismas bihain, bai ol i kolim Victor yet long PNG skwat, em i tok.

## Kosa makim Chris na Abiang bihainim pilai

CHRIS Nagai Tamari i gat nem long stap insait long fainel soka skwat bilong PNG. Dispela skwat bai kik insait long bikpela soka resis bilong Melanesian Kap na Wol Kap kwalifai resis long Septemba 16 inap 22.

Nesanel kosa bilong PNG soka tim, Richard Nagai i mekim dispela toktok long bekim ripot i kamap olsem Chris Tamari i no gat nem long skwat tasol em i wok long trening na kisim ples bilong Madang pilaia Victor Carson. Skwat i bin lusim Victor long fainel skwat.

Nagai i tok ol i makim Chris bikos em i ken pilai moa long wanpela posisen. Chris i ken pilai long midfil na tu long fran.

Tasol em i tok Chris no bin kisim ples bilong Victor. Abiang Kera bilong Mosbi i bin kisim ples bilong Victor. Bikos em i mekim dispela bihainim lukluk na glasim bilong wanwan pilaia na eksperiens bilong em.

Nagai i tok Abiang i kisim ples bilong Victor bikos Abiang i gat eksperiens na dispela strong o veliu bilong sanap long golkipa na i ken skelim o ritim gem.

Dispela nem Chris Tamari em nem i bin stap long paspot buk bilong em taim em i bin pilai long PNG anda 20 skwat bipo long Osenia anda 20 tonamen long Tahiti.

Long bekim tu ol toktok i kamap olsem Abiang tupela Chris i bin nogat nem long namba wan skwat i bin kamap. Tasol wanem as tupela i kamap na stap long skwat, selesen o makim moa pilaia i no stop taim ol i makim trening skwat. Painim moa pilaia yet long kisim i go het yet long putim ol i go insait long kisim trening wantaim ol memba bilong trening skwat.

Nem Tamari em famili nem Chris i bin putim long paspot bilong em. Taim ol pilaia i bringim o soim ol paspot na haus sik buk bilong ol long givim nem, dispela nem Tamari i stap long paspot bilong Chris bikos em i bin yusim long bipo. Tasol em i pikinini bilong nesanel kosa Richard Nagai.

Niuspepa ripot long dispela wik i tok Tamari em namba 18 pilaia insait long 22 pilaia bilong skwat. Na dispela i brukim olpela plen bilong makim fainal 20 pilaia. Niuspepa ripot i tok moa olsem bikos long Chris Tamari, ol i lusim John Laskam husat em wanpela gutpela fulbek pilaia bilong Lahi na Taku Niebo wanpela strongpela midfil pilaia bilong Mosbi long skwat.

Tasol Nagai i tok John Laskam na Taku Niebo i bai stap wantaim fainal skwat ya long trening kem.

Nagai i tok John na Taku bai stap long fainal kem bikos nogut sampela pilaia long posisen bilong tupela i bungim hevi long dispela taim bilong pilai. Olsem na tupela bai stap redi olsem was pilaia o sedo pilaia. Stap bilong tupela insait long tim i mekim namba i go olsem 22 memba olgeta.

Nagai tok moa olsem Victor Carson em wanpela yangpela na gutpela golkipa husat inap karim nem bilong PNG i go moa long bihain. Olsem na em i tok em i no lukdaun long Victor tasol skwat bai kolim Victor long joinim PNG tim yet long dispela yia o arapela yia bihain. Bikos Victor em i wanpela yangpela na gutpela golkipa husat bai makim PNG yet long planti yia bihain, em i no ken daunim em yet o lukdaun long dispela pilai bilong em olsem golkipa, Nagai i tok.

## 7-pela pilaia wokim nem namba wan taim long skwat

GEOFFREY Emang bilong Mosbi Rapatona i kepten long PNG soka tim husat bai kik long Melensian na Wol Kap kwalifai soka resis long Septemba 16.

Geoffrey Emang husat em wanpela olpela soka pilaia bilong PNG i kisim dispela taitel long las wik bihain long nesanel kosa i tokaut long nem bilong ol fainal 20 man long skwat.

Emang i bin wokim nem pinis long planti bikpela soka resis we em i save go olsem pilaia bilong PNG long pilai egensim arapela ovasis kantri.

Namba tu kepten em Willie Bera bilong Mosbi na golkipa bilong PNG tim. Willie Bera tu em wanpela eksperiens golkipa tu bilong PNG. Willie na Geoffrey em tupela pilaia bilong Rapatona Soka Klap long Mosbi.

Insait long PNG soka skwat, i gat 7-pela soka pilaia husat em namba wan taim bilong ol nau long wokim nem insait long PNG tim. Ol dispela pilaia em, Harrison Kamake, Masi Ngayang, Manis Lamond, Batman Furigi, Chris Kataka, Chris Tamari Nagai na Kelly Jim. Tupela sedo pilaia o was pilaia, John Laskam na Taku Niebo em tupela nupela man tu long wokim nem long PNG skwat. Tupela bai stap insait wantaim ol manki long skwat na was tasol long o senis we inap kamap.

## SOKA RIPOT

PNG skwat em, Willie Bera, Abiang Kera, Geoffrey Emang, Joe Aisa, Beno Luluai, Gidix Nasa, Harrison Kamake, Masi Ngayang, Richard Daniel, Roy Karang, Manis Lamond, Batman Furigi, Steven Mune, Chris Kataka, Desmond Waku, Wesley Waiwai, Francis Moyap, Chris Nagai, Duri Yarawi na Kelly Jim. Sedo pilaia em John Laskam na Taku Niebo.

Wanpela biknem soka opisel long Madang i tokaut olsem PNGFA i no ken lukluk tumas long ol dispela olpela pilaia na kisim ol long skwat tumas. Bikos sampela bilong ol dispela pilaia i bin stap long skwat longpela taim tumas na ol i no kamapim sampela gutpela senis o winim gem yet long PNG.

Opisel ya i tok em i no amamas long PNGFA i holim yet ol kain olpela pilaia olsem bikos soka i wok long senis na ol olpela pilaia i no senis. Ol i stap wankain yet, na PNG bai i stap wankain yet we em i no inap long winim wanpela pilai. Inap long em i senisim na kisim ol nupela pilaia, bai i gat gutpela senis i kamap.

Bikman ya i tok i gat planti gutpela pilaia moa long ol dispela lain long PNG tim i stap. Tasol

PNGFA i no inap long painim ol. Em i tok i gat ol pilaia i stap olsem long Kimbe, Rabaul, Buka, Makam, Wewak na arapela moa. Tasol PNGFA i no save go aut long painim ol kain pilaia olsem.

Em i tok PNGFA i no ken wet tasol long ol tim i kam bung long bikpela nesanel sempionsip na em bai makim ol pilaia. I gat arapela rot olsem em i ken salim ol kosa i go raun long wanwan ples na glasim ol pilai long wan wan asosiesen na painim ol kain pilaia olsem.

Em i tok soka i wok long groa o senis moa. Olsem na mipela tu i mas senisim ol tingting bilong mipela na senisim ol pilaia bilong mipela husat i stap yet wantaim ol olpela tingting na stail. Sapos mipela i no mekim ol dispela kain senis, bai mipela i no inap long winim wanpela pilai yet, em i tok.

Em i tok bikos mipela olgeta i lain bilong laikim na sapot long soka, bai mipela i toktok long wanem samting i kamap long soka. Dispela em interes bilong mipela long toktok long ol gutpela samting bilong soka o nogut bilong soka. I no long mipela i egensim wanpela man. Tasol interes bilong soka em yumi bai toktok long en, bikman ya i tok.

# Goroka soka go long fainal

SOKA gren fainal bilong Goroka long dispela wiken i mas kamap gut na i no ken gat trabel, Cliffson Isaiiah presiden bilong Goroka Soka Asosiesen i tokaut long dispela wik.

Presiden Isaiiah i tok Goroka soka resis bai pinisim olgeta gem bilong em long dispela wiken wantaim gren fainal. Ol tim long primia, primia risev na divisen bilong ol meri bai salens long dispela gren fainal.

Long primia divisen bilong ol man em, fainal bai kamap namel long PTC na Rapatona. Dispela bai wanpela strongpela gem tru bikos tupela tim wantaim strongpela na gutpela.

Rapatona i gat nem long gutpela pilai bilong em long bipo i kam na em i save winim planti bikpela pilai olsem. Olsem na em i gat moa eksperiens long pilai insait long gren fainal. Em i gat tu

...Isaiiah laikim gutpela fainal

## GOROKA SOKA

gutpela fom bilong winim gem na sapos PTC i no was gut bai Rapatona i ken rausim 1996 soka taitel bilong Goroka long dispela wiken.

Tasol PTC em narapela tim tu husat i bin pait strong i kam long dispela yia na em bai i no inap long givim isi gem long Rapatona. Rapatona bai bungim tru bikpela salens bilong PTC bikos ol boi ya i laitim paia long aninit yet i kam antap we em i wok long kilim ol tim i kam antap long mak bilong gren fainal.

I nogat man inap tokaut long wanem tim bai win bikos dispela bai bikpela na strongpela pilai tru.

Tasol tim husat i no holim gut gem plen bilong em na mekim planti asua long fil i ken lusim gem bilong em. Na tu tim husat i yusim ai na tingting bilong em long pilai bai i ken winim gem bilong em tu.

Long primia risev bai bikpela salens bilong gren fainal bai kamap namel long Morobe Yunaitet na ol boi bilong Rapatona.

Rekot i soim olsem ol kande bilong Morobe Yunaitet i bin laitim paia long aninit long namba 5 ples i kam antap. Em i wok long rausim olgeta tim long rot bilong em i kam inap long em i bungim gren fainal ples long dispela wiken we em bai traim las pilai bilong em egens Rapatona. Long las wiken gem bilong Morobe Yunaitet egens Murat, ol manki Morobe i no isi

long katim stret olgeta strong bilong Murat. Olsem na em i nekim Murat 4-0 long prilimimeri fainal long las wiken.

Rapatona i bin kisim tupela wik malolo long wetim gren fainal. Em i bin wet i stap taim Morobe Yunaitet i wok long kukim bus i kam. Olsem na Rapatona i mas was gut long dispela strong bilong Morobe Yunaitet na i no ken mekim liklik asua.

Tasol dispela em gren fainal na gem bai strong tumas namel long tupela tim wantaim inap tim i strong i painim sans long skoa na winim gem long fainel.

Long gren fainel resis bilong ol meri, bai pilai i stap namel long ol meri PTC na Rapatona. Bikpela tingting i stap olsem ol telefon meri bilong PTC i gat bikpela sans long winim dispela gem. Tasol ol susa bilong Rapatona tu bai redi

long givim salens tu long ol meri PTC.

Ol susa bilong PTC em ol maina primia bilong Goroka soka resis long dispela yia. Ol i bin stap namba wan long poin lata bilong Goroka long stat bilong sisen inap long pinis bilong olgeta pilai.

Long divisen bilong ol primia man tu em ol boi bilong Murat em maina primia bilong dispela yia. Murat tu i bin namba wan long poin lata bilong Goroka soka resis long dispela yia. Em i bin winim planti gem bilong em moa long arapela primia tim na kamap maina primia.

Isaiiah i tok em i laikim gutpela pinis bilong soka long Goroka long dispela yia. Olsem na em i askim olgeta pilai na sapota long amamas long pilai na pilai gut long pasin bilong gutpela spotman na spotmeri.

## LFA bai meknais long bikpela soka salens

MITIF na Telikom bai traim bun long dispela wiken insait long primia divisen bilong LFA soka resis.

Dispela bai wanpela strongpela gem bikos tupela tim wantaim i strongpela na i gat ol plani gutpela pilai i stap.

Telikom i stap namba 4 long poin lata bilong LFA na em bai i no inap long pilai isi. Em bai pilai strong long winim dispela pilai long apim skoa bilong em i go antap long stap insait long fainal top 5 tim bilong LFA.

Telikom inap kamap namba 3 long poin lata sapos em i winim dispela gem na tu Buresong i lusim gem bilong em. Buresong i stap namba 3 long poin lata wantaim 40 poin na Telikom em 38 poin.

Buresong bai bungim tu bikpela salens long dispela wiken taim em i bungim ol boi bilong West Taraka. Sapos em i lus, bai em i pundaun go daun long namba 4 ples.

Tasol pilai bilong Mitif na Telikom i no inap long kamap isi gem long husat tim i win.

Telikom i gat ol gutpela pilai olsem Abia Abia na Kaizam long fran, long midfil em Nicholas Pui na Rueben Yanga na long

## LFA SOKA

### YAKAM KELO i raitim

beklain em Gidix Nasa wantaim yangpela Awini.

Telikom em eksperiens tim husat i save wokim nem long gren fainal bilong LFA na tu long bikpela nesanel sempionsip bilong PNG. Olsem na em i gat dispela sans long winim Mitif.

Tasol ol manki Eriku (Mitif) tu i gat stail na strong tu bilong rausim strong bilong Telikom. Mitif i bin wokim nem tu long kik insait long nesanel klap sempionsip long 1994 na tu kik insait long sampela gren fainal pinis long LFA. Olsem na em tu i gat wankain strong olsem Telikom.

Bikpela wok bai i stap long midfil bilong tupela tim wantaim. Mitif i gat strongpela pilai olsem Jack Jonathan na Charlie husat bai ronim fran lain bilong ol long traim wokim nois long umben bilong Telikom. Olsem na ol beklain bilong Telikom i mas was gut long tupela man ya.

Telikom i gat moa sans long winim dispela gem tasol sapos

em i mekim planti asua long fil, em i ken winim gem.


Mopi long narapela primia gem i gat bikpela sans long autim tiket bilong Jaura. Mopi nau i stap namba wan long soka resis bilong LFA wantaim 46 poin. Olsem na em i no inap long lusim dispela gem i go isi long han bilong Jaura bikos em bai strong yet long holim posisen bilong em long namba wan ples.

Mopi i gat ol pilai olsem Greg Elipas, Berry Bruce long beklain, Bobby Mako na Duta long midfil na Jonathan Dote wantaim lapun Eric Niwo long straika. Mopi i gat gutpela lainap na em bai i gat bikpela sans long winim gem ya. Golmak bai i stap long gutpela han bilong David Soweni.

Namba 2 ples Goro bai traim bun tu wantaim Faze long soka resis bilong tupela long dispela wiken.

Goro em wanpela strongpela tim tasol em i no ken lukdaun long ol boi bilong Faze bikos, nogat stori i tanim na Faze i wokim das long Goro.

Long resis bilong ol meri em, Waliya bai rausim win bilong Mopi, Bara bai nekim Tarangau, Goro bai traim pawa bilong Wastai na Buresong bai givim skul long ol meri Yunivesiti.



Michael Miise bilong Sobou i kamap long hetim bal tasol kas bilong Kenmoore i kalap strong na hetim bal. Tupela dro 2-2 long las wiken Mosbi soka resis.

## Boomers na Buresong pretim ol tim

ILIMO Boomers i kamapim gutpela stail soka long las wiken na autim tiket bilong Easterners 1-0 long fultaim insait long Mosbi soka resis. Dispela i bin wanpela gutpela pilai tru bilong ol manki Ilimo Boomers bikos olgeta strong na tingting bilong putim kamap i bin kamap stret long winim dispela pilai.

Long beklain, ol boi bilong Ilimo i mekim bikpela wok tru rausim ol birua bilong Easterners. Olgeta taim ol i pait strong long winim bal na i save rausim bal kwiktai i go long midfilda bilong ol.

Midfil bilong Ilimo tu i gat kain kain stail na trik moa long pilai pila wantaim bal. Bal i save oltaim pas gut long lek bilong ol na ol i save ronim gut bal i go long winga na painim lek bilong ol straika. Sampela taim ol midfilda tu i save ronim bal ol yet i go long mak bilong Easterners.

## MOSBI SOKA

Ol boi bilong Easterners tu i gat planti gutpela sans long bomim golmak bilong ol boi Ilimo. Tasol ol yet i save abrus na i no i save givim bal hariap long ol straika taim ol i stap long gutpela mak bilong kisim bal na ronim.

Tupela straika bilong Easterners i bin putim kamap bikpela salens tru long ol beklain bilong Ilimo tasol beklain i strong tumas. Gol bilong Ilimo i kamap taim ol boi bilong midfil i winim bal na ronim i go long winga na winga i salim i go bek long namel na pas long lek bilong straika we em yet i ronim i go na pinisim ron bilong bal long golmak bilong Easterners.

Dispela i bin wanpela gol tasol we Ilimo i putim bikos long dispela taim tu, Easterners

i strongim banis na i no laik moa long Ilimo i go gen long skoa. Olsem na em i pasim dua bilong banis bilong em inap fultaim we skoa i sanap 1-0 long sait bilong ol boi long Ilimo haus kakaruk.

Long arapela divisen 1 soka resis long Mosbi, ol boi bilong Buresong i holim kamap bikpela salens wantaim Keweh na tupela i dro 2-2 long fultaim.




Dispela salens namel long ol boi Morobe na Manus i no isi. Tupela wantaim i putim olgeta strong na pawa long stat bilong gem i go inap long pinis bilong pilai tasol strong bilong tupela wantaim i wankain olsem na tupela i dro.

Ol manki Buresong olsem Pasek Naring, Michael Gedion, Ken Zilong, John, Norman i putim kamap gutpela pilai tru long las wiken. Tasol ol yet i no painim gutpela sans bilong

bomim umben bilong Keweh na tu blokim difens bilong ol. Olsem na Keweh i go isi tasol na bekim bek tupela gol ya na ol i dro. Keweh tu i putim kamap planti gutpela pilai long dispela gem. Long pilai bilong Sobou na Kenmoore, tupela tim wantaim i dro 2-2 long fainel. Dispela tu i bin wanpela bikpela strongpela gem tasol strong bilong tupela tim wantaim i bin wankain. Sobou i bin putim kamap ol strongpela gem bilong em egens ol boi bilong Kenmoore tasol Kenmoore tu i taitim banis na sanap strong.

Sobou i hariap hariap long ronim bal i go fowet na skoa na i no was gut long beklain bilong em. Olsem na Kenmoore i glasim dispela na em i ronim bal i go insait na mekim nois long umben bilong Sobou tupela taim na bekim tupela gol bilong Sobou. Tupela i dro 2-2 long fultaim.

# WANTOK SPOT



## PORT MORESBY SOCCER ASSOCIATION INC. DRAW

Saturday September 7, 1996. Week: 20

### Bisini One

Time	Division	Fixture	vs	Fixture
08.00	U19	Defence	vs	Hoods
09.15	Reserve	Defence	vs	Hoods
10.30	W2	B/Kumuls	vs	Kutu
11.45	W1	GFC	vs	Guria
13.00	U/19	Babaka	vs	K/Andra
14.15	Reserve	Momase	vs	Guria
16.00	Premier	B/Kumuls	vs	E/United

### Bisini Two

08.00	D2	Togelu	vs	H.W. Haus
09.15	W2	Tawala	vs	Rapatona
10.30	D2	Tawala	vs	Kutu
11.45	W1	Uni	vs	Wanzesi
13.00	D2	Kenmore	vs	Cyclone
14.15	Premier	Telikom	vs	PS Rutz
16.00	Premier	FBH Defence	vs	Hoods

Sunday September 8, 1996.

### Sir John Guise Two

09.00	U19	Momase	vs	Guria
10.30	W2	Togelu	vs	PS Rutz
12.00	U19	B/Kumuls	vs	Ela United
01.30	Reserve	B/Kumuls	vs	Ela United
09.00	U19	Telikom	vs	PS Rutz
10.30	Reserve	Telikom	vs	PS Rutz
12.00	U/19	Rapatona	v	GFC
1.30	Reserve	Rapatona	v	GFC

### Bisini One

08.00	U/19	Uni	vs	Sunam
9.15	W2	Icweh	vs	Murat
10.30	W1	K/Andra	vs	Nomads
11.45	W1	Sobou	vs	Telikom
13.00	Reserve	Babaka	vs	K/Andra
14.15	Premier	Momase	vs	Guria
16.00	Premier	Babaka	vs	K/Andra

### Bisini Two

08.00	D2	Bell United	vs	Nomads
09.15	W2	C.T. Kings	vs	Ilimo Bommers
10.30	W1	Sunam	vs	Defence
11.45	Reserve	Uni	vs	Sunam
13.00	D1	Sians	vs	Eastenders
14.15	Premier	Uni	vs	Sunam
16.00	Premier	Rapatona	vs	GFC

### Bye:

D2	C.T. Kings	V Tarangau - (played twice)
D2	Mean	V Ilimo Bommers (played twice)
W2	Tarangau	Momase (played twice)
D1	All games have been deferred except Sians v Eastenders will play their catch up game on Sunday.	

# 12,000 manmeri bai lukim soka: Mommers

YAKAM KELO i raitim

## ...Fiji i no inap kam

PRESIDEN bilong PNG Futbal Asosiesen (PNGFA) Peter Mommers i tokaut olsem planti manmeri moa bai pulapim stadium long Lae long lukim soka resis bilong Melensian na Wol Kap kwalifai long Septemba 16 na 22.

Mommers i tok ol i skelim olsem mak long 12,000 manmeri bai kamap long lukim pilai long wanwan de, stat long Mande 10<sup>1</sup> go pinis long 22 Septemba. Skelim dispela kain namba bilong ol manmeri long lukim pilai long Mosbi bai i no inap bikpela tumas, em i tok.

Tasol tenis bai kamap long dro bilong dispela soka resis bikos Fiji bai i no inap kamap long pilai.

Osenia Futbal Konfederesen (OFC) tu i kisim toksave pinis long dispela tenis em Fiji i kamap wantaim.

Long dispela as, Mommers i tok bai ol i senisim dro bilong pilai we Nu Kaledonia, Vanuatu, Solomon Ailan na PNG tasol bai pilai.

Presiden i tok dispela tenis long dro bai kamapim wanpela gem tasol long wanwan de. Na tu bai pilai i pinis wanpela de pastaim long de ol i makim pastaim long dro. Dispela i min olsem pilai bai i no inap long pinis Sande 22, tasol pilai bai pinis nau long Sarere 21. Tonamen bai i stap olsem wanpela wik olgeta. Olgeta pilai bai kamap long Lae na wanpela tasol bai kamap long Mosbi long Fonde 19 long Sir John Guise stadium. Dispela pilai em tim bilong mipela long PNG bai pilai egensim Nu Kaledonia.

Tupela gem insait long dispela pilai em Wol Kap skoa. Na dispela gem em namel long PNG, Vanuatu na Solomon Ailan.

Mommers i tok em (PNGFA) i kisim pinis pas bilong Fiji Futbal Asosiesen long em i no inap kamap long dispela pilai. As Fiji bai i no inap kamap long pilai ya em bikos asosiesen bilong em i bruk i go tupela hap. Na i kamapim hevi long ol i makim ol pilaia bilong ol long makim kantri bilong ol i kam long dispela pilai.

Ripot bilong Fiji i tok planti pilaia bilong ol husat i save makim kantri bilong ol long

pilai egensim narapela kantri, i stap nau long nupela asosiesen ol i kolim Ba Asosiesen. Na dispela asosiesen i no bin afiliat wantaim OFC. Olsem na ol i no inap long larim ol pilaia aninit long dispela asosiesen i kik insait long ol kain tonamen we OFC i save go pas long ol.

Nau Fiji i no inap kamap long pilai, dispela bai mekim bel bilong Solomon Ailan i amamas long dro bilong ol. Bikos long olpela dro we Fiji i stap long en, Solomon Ailan i no gat inap taim long kisim malolo namel long ol gem

bilong em.

Nau foapela kantri tasol bai kik, Solomon Ailan bai kisim tripela gutpela malolo namel long wanwan gem bihain long em i pilaim ol arapela gem bilong em. Solomon Ailan i no bin amamas long olpela dro tasol nau em bai amamas long dro bikos long tripela de malolo ol pilaia bilong em bai kisim.

Mommers i tok bikos Fiji i lusim dispela pilai nau, dispela tu bai daunim kos bilong PNGFA long lukautim ol pilaia bilong Pasifik kantri hia long PNG.

Siama bilong Ogenaising Komiti, Aine Sengero i bin tokaut strong long las wik na dispela wik long ol kampani na gavman i mas givim salim helpim i kam hariap long pilai i stat. Dispela em wanpela wik moa long pilai i stat.

Komiti i laikim olsem ol i mas i gat mak long K200,000 long lukautim dispela pilai.

Gavman i bin tok long givim K100,000 tasol em i no givim yet. Tasol Peter Mommers i tok bai PNGFA i kisim dispela K100,000 long dispela wik.

Bikos Fiji i no inap kam, bai dispela i daunim kos PNGFA bai tromoi long baim ol samt-ing bilong lukautim ol tim i kam long arapela kantri ya.



• Pilaia bilong Defence i kamap na redi long wokim baisikol kik long primia gem egens Sunam long las wiken. Tupela tim dro 2-2 long Futaim.

OL SPOT DRO.

... pes 21

CHRIS na ABIANG GAT NEM.

... pes 22

GOROKA SOKA FAINEL.

... pes 23

OL SPOT POTO.

... pes 20

NAGI ASKIM OL PILAIA.

... pes 22


LFA SOKA RESIS.

... pes 23



# Rugby Lig Nius

F  
A  
I  
N  
E  
L  
S  
  
T  
A  
I  
M



**HANUABADA HAWKS GAT STAIL ...** Dispela Paga Panthers pilai i laik takelim wanpela Hawks pilai tasol em i leit pinis long wanem baga ya i autim bal. Hawks i winim Paga na bai bungim Defence long wanpela strongpela gren fainel tru bilong PRL resis long dispela wiken.

## ... PRL, SP Inta Siti Kap, Optus Kap

RODNEY KAMUS | raitim

DISPELA wiken em bai wanpela bikpela taim bilong ragbi lig stret insait long kantri.

Long wanem, ol bikpela ol senta bilong ragbi lig bai holim ol fainels bilong ol na wankaim taim tu bikpela Sidni Lig resis bai go insait long ol fainel.

Pot Mosbi ragbi lig resis i kamap long gren fainel bilong ol long dispela wiken.

Na tupela biknem tim em Defence na Hawks bai pilai long dispela wiken long painim husat em i sempion tim tru bilong Mosbi ragbi lig resis.

Defence i bin autim maina primia tim Paga long kisim namba wan ples bilong gren fainel.

na long wankain taim tu, Hawks i bin mekim save long ol Paga long autim ol olgeta na kisim sia bilong bungim ol Defence.

Antap long hailens tu long dispela wiken, bai i gat tupela bikpela fainels bai kamap.

Goroka Lahanis husat i kisim maina primia taitel bai bungim ol Mendi Muruks long Minj. Na long dispela bikpela fainel, husat tim i lus i gat wanpela moa sans i stap yet long pilai. Wina bilong dipela geim namel long Lahanis na Muruks bai sindaun na wetim gren fainel.

Narapela bikpela pilai bai kamap long Hagen we ol Eagles bai bungim ol Kundiawa Warriors. Long dispela pilai, husat tim i lus bai aut olgeta long resis bilong inta siti kap. Wina bilong dispela pilai namel long Warriors na, Eagles, bai bungim lusa bilong bilong

Lahanis na Muruks long neks wiken antap.

Bikpela pilai tru long dispela wiken em planti man bai sindaun na lukim long televisen em Optus Kap resis bilong Australia.

Optus Kap resis bai statim ol fainels bilong ol long dispela wiken taim ol top 8 tim bai pilai.

Stat long Fraide nait, Cronulla bai bungim Western Suburbs na husat tim i lus bai aut olgeta long resis. Bihain gen long Sarere long 4 klok em bai ol lain nogut ya St George bai bungim Canberra Raiders. Dispela pilai tu husat tim i lus bai aut olgeta long resis.

Na bikpela pilai long Sarere nait em bai kamap namel long North Sidni na Brisbane Broncos long Suncorp stadium long Brisbane. Lusa bilong dispela pilai i gat wanpela moa sans.

Na long Sande nait, bikpela pilai tru bai kamap long Sidni Futbol Stadium namel long Sidni Siti Roosters na Manly Sea Eagles.

Long dispela pilai husat tim i lus i gat wanpela moa sans na wina bilong dispela pilai bai bungim wina bilong Norths na Brisbane long kisim namba wan ples bilong gren fainel. Taim tupela lusa bai salensim tupela yet.

Ol tim em Ragbi Lig Nius i bilip bai win em long PRL resis, Defence bai autim Hawks, Inta Siti Kap em Muruks bai autim Lahanis na Warriors bai autim Eagles.

Long Optus Kap resis, West bai autim Cronulla, St George bai autim Canberra, Brisbane bai autim Norths na Manly bai rausim trausim bilong Sidni Siti Roosters.

Tripela tim bilong Tigers go insait long fainel

**VANIMO LIG RIPOT**

BROTHERS ragbi lig klab nau yet i kamap olsem maina primia tim bilong Vanim Ragbi Futbol Lig bihain long ol i bin autim ol Sandaun Motel Tigers long wanpela strongpela pilai tru tupela wik i go pinis.

Ol Brothers husat i bin kisim pilai graun egensim ol Tigers husat i werim nupela Sidni Tigers Jesi bilong ol i bagarapim stret sindaun bilong ol Tigers long 24-10.

Ol strongpela pilai long sait bilong Brothers i bin planti tru long wanem olgeta hap kona em ol i karamapim gut tru. Tasol tupela man husat i pilai strong tru long ol narapela Willy Labong wantaim pilai bilong Bulolo Brothers Herman Winch.

Tasol long las wik Sande, ol Tigers i pinisim stret win bilong ol Sea Eagles 16-4 long wanpela strongpela pilai tru. Na Tigers bai traim gen strong bilong ol Brothers long fainel bilong dispela wiken.

Brothers wantaim ol pilai bilong ol olsem Kini Kone, Bonny Ando na Rex Genewar i kam bek bai strong tru long ol Tigers long winim ol. Tu ol bai kisim sapot long pilai kosa Ken Martin, Abel Agwi, Clemence Kap na Patrik Waimo. Rollen Kallien na Helmut Sombre bai go insait long gren fainel olsem namba wan taim bilong ol.

Long baklain bilong ol Brothers, Petrus Yarip bai go pas long ol na bai kisim helpim long Alois Dau na Ron Rudolf.

Long ol narapela gret fainels long las wiken Sandaun Motel Tigers bai bungim Tarangau long A risev na Hawks bai bungim Tigers gen long anda 19.

# Klostu Lam kisim Rothmans Medal

...tasol Jason Taylor i winim em



• Jason Taylor husat i winim top awod bilong Rothmans Medal.

KUMUL ketpen Adrian Lam i winim Allan Langer tasol em ino inap long winim Jason Taylor na David Fairleigh bilong Norths Sydney long kisim top awot bilong Rothmans Medal.

Lam i kisim 20 pons, bihain long David Fairleigh (22) na Jason Taylor(26) tasol em i winim sampela ol narapela biknem pilai olsem Geoff Toovey, Allan Langer, Laurie Daley na Tim Brasher.

David Fairleigh wantaim Jason Taylor i bin sindaun long 22 pons wantaim tasol long laspela raun bilong pilai long las wiken, Taylor i abrusim Fairleigh long winim dispela medal bihain long em i kamapim wanpela gutpela pilai tru egensim ol Gold Coast.

Tasol sapos Lam i bin pilai long las tupela geim bilong ol Sidni Siti, i luk olsem em bai kamapim planti hevi long taim bilong ol jas long makim husat tru bai kisim dispela top medal awot bilong Australian Ragbi Lig (ARL). Lam i bin kisim bagarap logn solda bilong em na ino bin pilai long las tupela geim. Tasol ol ripot i kamaut i tok olsem em i redi long pilai egensim ol Manly long dispela wik Sande.



• Adrian Lam i bin kam namba tri man bilong dispela awod.

Eagles bagarapim hom rekot bilong Muruks

**ROBERT BOMA i raitim**

LIKLIK bilip bilong ol Mt Hagen Eagles long go insait long semi fainel bilong SP Inta Siti Kap resis long dispela wiken i kamap tru long las wiken taim ol i bagarapim sans bilong Mendi Muruks long kisim maina primiasp taitel na winim ol long 18-12.

Dispela pilai i bin kamap long fran bilong 3000 manmeri moa long Tente pilai graun long Mendi long las wiken.

Dispela pilai i bin wanpela strongpela pilai stret long wanem tupela senta wantaim ya i gat nem long pilai ol strongpela futbol. Planti ol sapota tu i bin amamas stret long lukim dispela pilai.

Eagles ol i mas winim dispela pilai tru long stap insait long fainel olsem na ol i tingting planti long winim dispela pilai olsem wanpela gren fainel bilong ol. Olsem na ol biknem pilai olsem Max Tiri, Elias Kamiak na James Kops i go pas gut tru long ol.

Mendi Muruks tu dispela pilai i bin wanpela bikpela pilai long ol long wanem ol bai kisim maina primiasip taitel sapos ol i winim ol Eagles. Tasol ol ino inap long stopim ol Eagles husat i traim hat tru long kisim wanpela ples bilong semi fainel.

Ol Eagles ino bin winim dispela pilai isi tasol. Ol i wok hat tu long apinun long winim dispela geim.

Eagles wantaim ol Lae Bombers i bin stap long ol i mas winim pilai tasol Lae Bombers i lus egensim ol Capital City Cowboys na ol i tok gutbai. Goroka Lahanis tu wanpela strongpela tim long dispela sisen i winim ol Islands Guria na abrusim Muruks long kisim maina primiasip taitel.

I luk olsem dispela em i namba wan taim bilong ol Muruks long lus long as graun bilong ol. Muruks i gat gutpela hom rekot long dispela sisen tasol ol Hagen Eagles i bagarapim stret rekot bilong ol.

Ragbi Lig Nius i save olsem Eagles bai bungim Kundiawa Warriors long dispela wiken logn Rebaimul pilai graun. Dispela semi fainel pilai em bai husat tim i lus bai aut olgeta long resis bilogn inta siti kap na wina logn dispela geim bai go het long bungim lusa bilong Lahanis na Muruks pilai.

STAT long taim PNGRFL i bin kamapim dispela tingting bilong Inta-Siti resis, mi wok long lukim kamap bilong geim i go bikpela, na mi amamas long lukim olsem level bilong geim long kantri i wok long surik isi isi i go.

Long lukluk bilong mi, dispela i stat bilong ol pilaias bilong mipela long pilai ragbi olsem wanpela ful-taim wok bilong ol, wankain long ol pilai long Ostrelia, Nu Silan na Inglen.

Yu traim long glasim stail na wei bilong ol pilaias bilong mipela bipo long stat bilong Inta-Siti na bihain long kamap bilong dispela pilai, ating bai yu lukim klia tru olsem i gat bikpela senis long ragbi geim.

Mi amamas long lukim olsem mipela yet i klia long stat long wanem liklik rot mipela yet i mas stat pastaim long mipela i ken go wokim ol narapela samting.

Na Inta-Siti i-soim mipela olsem dispela kain rot i gutpela long

## Inta-siti apim level bilong ragbi lig

mipela long go het long halivim mipela long redim mipela long pilai long ol inta nesenel geim.

Lukim wei ol pilaias bilong mipela i bin pilai long wol kap las yia, na lukim sampela ol pilaias i wok long kisim ol wanwan kontrak long ol Ostrelia na Inglen na wei bilong pilai.

Stanley Gene, Marcus Bai, John Okul na Elias Paiyo i bin stap long stat bilong Inta siti, skul ol i lainim insait long ol kain pilai olsem i halivim long kisim ol ovasis kontrak.

Mipela i stat pinis long kamapim ragbi lig olsem wanpela 'profesinel' geim na nau yumi mas wokim plen bilong mipela long wanem samting tru mipela i mas wokim long putim mipela long stendet bilong geim olsem Ostrelia na Inglen.

**SECOND CHANCE**  
with **JOE KANEKANE**



Tru, tok pait i stap namel long Supa Lig na ARL tasol nambawan samting tru mipela i mas klia gut tru em, wanem kain halivim mipela i ken kisim long wanem sait bilong dispela tupela lain sapos mipela i laik stap long kain sait olsem.

Long wanem bihain taim mipela i wokim disisen yumi noken tok olsem mipela i no laik wokim dispela na bilong wanem na mipela i wokim dispela, kain bekim long bihain taim i mas noken stap.

Long yia i go pinis nambawan tingting bilong mipela long kantri em i long winim ol tim long ovasis na putim wanpela tim long pilai long Optus kap resis.

Nambawan lain tru mi lukim i soim intres em ol sponsa bilong ol wanwan tim, taim i nogut, mani i hat long painim tasol ol i wok long tromoi wanem liklik mani ol i gat long sapatim geim long kamap bikpela.

Tasol wanpela samting mi laikim i mas go wantaim dispela level wei bai geim i ken ron gut

em, ol liklik senta i mas stap long wankain kamap bikpela bilong geim.

Ating planti taim tru mipela i save lusim tingting olsem dispela ol senta tu i save strong long kamap bikpela bilong ragbi lig na luksave i mas go long ol tu.

Long wanem ol pilaias long Inta-Siti bai ino inap stap olsem olgeta taim long wanem wanpela taim bai ol i go daun na ol nupela pilaias i mas sambai long kisim ples bilong ol.

Mi laik lukim olsem ol senta aut-sait long ol taun i stap long Inta-Siti i mas i gat sampela kain resis olsem bai kamap bikpela bilong ol i ken stap wankain long ol Inta-Siti resis.

Gutpela olsem Inta-Siti i apim level bilong geim tasol em i moa beta sapos ol narapela eria bilong ragbi lig i mas go wantaim long mekim stendet bilong ragbi lig i go bikpela.

# Optus Kap bai pulim planti sapota tru long dispela wiken

## RODNEY KAMUS i raitim

SAPOT bai go long husat tru nau long dispela wiken taim planti ol senta ragbi lig kompetisen i go insait long ol fainels bilong ol?

Nau yet i gat tripela hap olgeta em ol bai pilaim ol fainels bilong ol na i luk olsem planti sapota wanta' . ol manmeri husat i save laikim ragbi lig bai bruk namel long wanem samting tru ol bai lukim.

Long Mosbi, em bai bikpela gren fainel i kamap na antap long Minj na Rebiarnul pilai graun long Hagen, em bai ol inta siti kap semi fainel bai kamap.

Na bikpela samting tru em Optus Kap ragbi lig semi fainel long Sidni

bai olgeta bai kamap long televisen em stat logn Fraide yet.

Olsem na nau em bai laik bilong wanwan manmeri nau olsem ol i laik go lukim ol bikpela pilaia o stap long haus tasol na lukim Australia Ragbi Lig semi fainel em bai kamap long TV.

Stat long Fraide nait long 8 klok em bai namba wan semi fainel bai kamap namel long Cronulla. Na ol lain husat i sapotim dispela tupela tim bai pas wantaim TV bilong ol.

Long Sarere, em bai bikpela pilai i kamap namel long St George na Canberra Raiders long 4 klok na bihain gen long nait em bai pilai i kamap namel long Norths na Brisbane Broncos.

Na bihain gen long Sande em bai Manly na Sydney City bai salens na planti ol sapota husat i save laik Adrian Lam bai ino inap lusim sans bilong ol long lukim dispela das mangi bai pilai. Dispela pilai bilong tupela tim ya bai kamap long 4 klok na i luk olsem em bai wankain taim SP Inta Siti Kap resis ol semi fainel bilong ol tu bai kamap.

Planti taim SP Inta Siti Kap fainel i save kamap long 3 klok o 4 klok na lukluk long dispela wiken, i gat bikpela bilip tru olsem planti manmeri bai ino inap kamap long lukim dispela pilai.

Bilong wanem? Planti bai pas long TV bilong ol long lukim dis-

pela tupela biknem tim ya Manly na Sidni Siti bai pilai.

Long wankain taim long Sande, Pot Mosbi ragbi lig tu bai holim gren fainel resis bilong ol namel long tupela A gret tim em Hawks na Defence. Na ol lain husat i save sapotim tru lokel lig i luk olsem bai kamap na lukim tupela tim ya i pilai. Tasol ol narapela husat i save bihainim gut tru dispela tupela tim Manly na Sydney City bai pas long TV bilong ol na ino inap long kamap na lukim pilai.

Dispela em wanpela bikpela hevi nau Papua Niugini ragbi lig i wok long bungim long wanem planti manmeri na ol sapota ino ave kamap long pilai graun long lukim

ol pilai. Planti i save stap long haus na lukim ol ARL pilai i kamap long TV.

Nau yet bai yu lukim olsem planti manmeri bai staplong haus bilong ol tasol na lukim ol pilai long TV. Long Mosbi i luk olsem ol sapota bai kamap long liklik namba long lukim ol pilai long wanem planti bai stap na lukim TV.

Antap long hailens, ol trupela sapota bilogn inta siti resis bai stap baksait na sapotim ol tim bilong ol long win.

Nau yet em i laik bilong wanwan sapos ol i gat mani i ken go na lukim ol pilai long pilai graun na nogat ol i ken stap tasol long haus na lukim ol ARL pilai long TV.

## Inap Hawks brukim rekot bilong PRL?

### MOSBI LIG GREN FAINEL

#### RODNEY KAMUS i raitim

SANS bilong Hanuabada Hawks long brukim rekot bilong Mosbi ragbi lig bai kamap long dispela wiken sapos ol inap long autim ol Mosbi Defence long bikpela A gret gren fainel long dispela wiken.

Ol Hawks bai kamapim rekot long wanem dispela em i namba wan kam bek sisen bilong ol bihain long ol i stap aut long wanpela sisen.

Logn 4-pela wik i go pinis, Hawks i bin stap namba tri long poin lata. Tasol Defence i bin strong tru na autim ol na ol i go daun long bungim West. Wantaim West ol i autim tiket bilong ol mangi Kerema na wetim lusa bilong Paga na Defence. Taim Defence i autim Paga Panthers na Paga i bungim ol las wiken, Hawks i soim olsem ol i gat strong long autim maina primia tim Paga na nau em bikpela taim bilong ol long bagarapim sindaun bilong ol Defence na winim dispela taitel bilogn Mosbi ragbi lig resis.

Ol Hawks i gat pawa long gutpela beklain bilong ol wantaim ol gutpela spitman husat bai stap aninit long ai glas bilong Philip Boge.

Tasol toktok long sait bilong presa na ekspriens bilong gren fainel, i luk olsem Defence i gat moa pawa long dispela eria na ol i ken winim ol Hawks long bikpela skoa. Dispela em ol Defence i bin soim pinis bipo na wantaim planti ol pilaia bilong ol husat i stap long Vipers na duti long Bogenvil i kam bek, Defence i gat bikpela sans tru long winim gren fainel gen.

Husat tim i gat moa pawa long ekspriens bilong ol na ino tromoi bal nambaut na mekim ol asua bai winim dispela pilai.



Fewel ron... • Ol pilaia bilong Goroka Lahanis taim ol i bin winim 1993 SP Inta-Siti Kap egegensim Vipers.

## Lahanis na Muruks redi long brukim bun long Minj

GOROKA LAHANIS inta siti kap tim husat i kisim maina primiasip taitel bilogn SP Inta Siti Kap resis bai bungim bikpela salens tru long dispela wiken taim ol i bungim olpela birua bilong ol Mendi Muruks long bikpela mesa semi fainel long dispela wiken long Minj.

Tim husat i winim dispela pilai bai wokabaut stret i go insait na kisim namba wan ples long pilai long gren fainel bilong dispela resis.

Ol Lahanis husat i bin stat isi liklik long stat bilong dispela yia bihain long planti pilaia bilong ol i lusim ol i soim olsem ol i wanpela

strongpela tim tru na i ken mekim wanem samting ol i bin mekim long 1993.

Man husat bai go pas long ol kepten John Markam bai lukim olsem fowat lain bilong ol Lahanis i wok hat strong tru long pasim ol strongpela man bilong Muruks.

Markham bai kisim bikpela sapot i kam long ol yangpela husat planti bilong ol em namba wan taim bilong ol long testim ol fainels bilong dispela semi profesinel futbal pilai.

Kosa Leva Tete husat i gat bikpela ekspriens long ol dispela kain strongpela pilai bai wok hat

tru long lukim olsem ol yangpela Lahanis bilong em i mas gat strong na bilip longol yet long winim dispela pilai.

Wankain taim tu ol Muruks husat i bin stap insait long gren fainel bilong las yia bai wok hat tru long lukim olsem ol Lahanis i mas pilai gen long go insait long fainel.

Muruks i bin gat sans long kisim maina primiasip taitel long las wiken tasol ol yet i mekim wok i rong na ol Hagen Eagles i bin winim ol long Mendi.

Dispela win bilong ol Eagles i putim ol i go insait long semi fainel na rausim primia tim bilong las yia

Lae Bombers i go aut long resis bilong semi fainel.

Dispela pilai em bai wanpela strongpela pilai tru long Minj long wanem tupela senta ya i gat planti ol stori bilong ol long dispela hap graun bilong pilai.

Long 1994 taim tupela tim ya i bung long semi fainel, bikpela pait i bin bruk namel long tupela tim ya we planti ol Muruks sapota, pilaia na opisal i bin kisim mekimsave.

Olsem na nau tupela i mas soim trupela wei bilong pilai ragbi lig na pilai gut long amamasim ol sapota na developim gut ragbi lig. Wina bilong dispela geim bai wetim gren

fainel taim lusa bai bungim wina bilong Eagles na Warriors.

Long narapela bikpela pilai bilong dispela wiken em bai ol Eagles bai bungim Warriors long do-o-dai pilai. Tim husat i lus bai aut olgeta long dispela resis.

Ol Kundiawa Warriors husat i bin wanpela strongpela tim tru long dispela resis i luk olsem bai wok hat tru long winim ol Eagles long wanem ol bin go pas long dispela resis long sampela taim.

Ol Eagles wantaim gutpela sapot ol bai kisim long asgraun bilong ol bai i ken kamapim hevi long ol Warriors.

### Florima laikim ol Norths i mas winim Brisbane

**BIKNEM PILAIA** bifong Norths Sidni Greg Florimo i tokaut olsem kamap long gren fainel em bai wanpela bikpela samting tru bihain-long em i pilai gut tru long sait bilong ol Bears long winim ol Gold Coast 38-8 long North Sydney pilai graun las wik Sande.

Florimo husat i kamap wankainolsem rekot man Norm Provan longpilaim 231 fes gret pilai bilong Norths i kamap wanpela gutpela pilai tru long helpim tim bilong em long winim ol Gold Coast.

Dispela senta pilaia husat ol i tanim em long kamap seken rowa i skorim tupela trai long sait bilong em husat i putim 7-pela, tasol em i misim sans bilong em long skorim tripela trai logn fes gret pilai bilong em.

Wantaim 5-pela minit tasol i bin stap long klok, Florimo i pundaunim bal klostu tru long lain bilong ol Chargers.

Ol Norths husat i sindaun long namba tri ples long poin lata em ol beklain bilong ol tasol i skorim ol narapela 5-pela trai egensim ol Chargers wantaim tupela bilong Florimo.

Dispela olupela New South Wales na rep pilaia bilong Australia i gat bikpela tingting tru long ol Bears i mas win taim ol i redi long go insait long gren fainel.

"Olgeta samting i kamap gut long mipela nau. Mipela i gat planti ekspirians insait long tim,"Florimo i tok.

"Mipela i gat planti ol pilaia husat i ken skorim trai long olgeta hap kona bilong pilai graun.

"Mipela ino laikim wanpela samting moa tasol win long gren fainel," em i tok husat i gat bilip olsem em bai pilai tupela sisen moa.

Kepten bilong ol Norths Jason Taylor i surikim skoa bilong em i go antap tu long wanem em i kikim 5-pela gol insait long 7-pela gol.

# Lukaut long Manly winga Hopoate!

**STRONGPELA** winga bilong Manly John Hopoate i soim olsem em i kam bek strong tru long ragbi lig bihain long em i skorim 4-pela trai long 48-10 win bilong ol Manly egensim Souths Sydney long Sande.

Wantaim narapela winga Jack Elsegood i sindaun long sailtain long namba wan 30 minits, Hopoate i opim ai bilong kosa Bob Fulton long ron insait longol ring egensim Danny O'Keefe long traim na stretim em yet i kam antap.

I gat bikpela bilip olsem Elsegood bai go pilai long Canterbury long neks sisen, wanpela hap toktok em bos bilong ol Manly, Frank Stanton i tok em i orait long dispela samting.

Elsegood i bin senisim Hopoate long namel logn sisen tasol i luk olsem em i wok long pundaun wantaim ol klab opisals, na gimim Hopoate long kirapim bek sans bilong em long pilai i go antap.

"Em i stat long paia pinis," Fulton i tok. "Em ino bin pilai gut

long namel bilong yia tasol em i wanpela man husat i ken kam bek strong tru na dispela em wanem samting em i soim egensim ol Souths."

Gutpela pilai bilong Hopoate em long skorim wanpela trai long 67 minit we em i winim O'Keefe long ron, na bihain abrusim em gen long 77 minit we em i opim akaun bilong ol Eagles long namba 5 taim.

Manly bau bungim ol East Roosters long namba tru semi fainel bilong dispela wiken long Sidni Futba Stadium.

## Broncos pilaia Gee na Lazarus kisim bagarap



• Andrew Gee.

**BIKPELA FOWAT** bilong Brisbane Broncos Glen Lazarus i kisim bagarap long lek bilong em na dispela i ken lukim em bai stap long sailtain taim ol i pilai egensim ol Norths long ragbi lig fainel long dispela wik Sarere long Lang Park.

Bikpela toktok long bagarap bilong Lazarus i bin kamap long Mande taim em i bin trening inap long 15 minits tasol na kosa Wayne Bennett i wari likliklong dispela bagarap bilong Lazarus. "Sapos em i 90 pe sen, bai mi

ino inap lusim em i pilai," Bennett i tok.

Wantaim sisen bilong Andrew Gee i pinis bihain long em i bagarapim han bilong em egensim ol Auckland long las wik Fraide nait, Brisbane i bungim planti bagarap taim ol i kamap klostu long gren fainel.

Gee em han bilong em i stap long plasta tasol em i no givap yet long pilai na i luk olsem em bai soim pes long wanpela bilong ol fainels. "Dispela plasta i mas stap inap wanpela wik



• Glenn Lazarus.

olgeta tasol mi bai trening yet wantaim bagarap," Gee i tok.

Bennett i gat bikpela bilip olsem senta Steve Renouf bai pilai wantaim fowat Shane Webcke bihain long ol i kisim bikpela takel long han bilong ol Auckland long las wik Fraide nait.

Norths i bin winim Brisbane long las 4-pela pilai insait long 5-pela, na winga Brett Dallas wantaim senta ben lkin i gat liklik bagarap em ol ino wari tumas.

## Fitler laikim ol Rooster mas winim Manly

**KEPTEN** bilong Australia Brad Fitler husat i kisim bagarap na stap i tokim ol wan pilaia bilong em long Easts olsem ol i mas winim maina primia tim Manly na ol i ken gat bikpela sans long kisim primiasip taitel.

Fitler i mekim dispela toktok taim pilai i pinis long resis bilong Australian Ragbi Lig na dro bilong fainels i kamaut. Insait long dispela dro, Western Suburbs i kisim namba 8 ples long poin lata.

Nau West bai bungim Cronulla long namba wan eliminesen fainel long Parramatta Stadium long Fraide nait bihain long ol i rausim Newcastle, Auckland, Sydney Tigers na Parramatta long traim na kisim dispela laspela ples long fainels.

Ol Magpies i bin pilai hat tru long winim ol Illawara 12-8 long wanpela strongpela pilai tru long Campbelltown long Sarere na bihain ol i mas wet pastaim long Cronulla na Newcastle we Cronulla i winimol Newcastle 22-0 bipo long ol i amamas tru.

Auckland na Parramatta i go autsait long resis long Fraide nait bihain long ol Broncos i bin winim ol Warriors long 28-6 na Penrith i winim ol Eels 24-16, taim West i autim olgeta bilip bilong ol Tigers.

Ol Tigers i bin lus long ol Siti 24-10 we i mekim na ol Roosters i autim ol Sharks long namba 4 ples longpoin lata. Tasol Fitler i tok olsem ol i mas winim ol Manly na nogat em i luk olsem ol bai ino inap go long gren fainel na win.

"Stat long dispela wik, em i nupela resis olgeta, em mipela i mas winim tripela moa pilai," Fitler i tok. Ol Top 8 tim em Manly, Brisbane, Norths, Sydney City, Cronulla, Canberra, St George, West.

## Fil gol bilong Langmack ino karim kaikai

**WESTERN SUBURBS** ragbi lig kepten Paul Langmack i tokaut olsem em i kisim las minit long kikim wanpela fil gol long dispela 12-8 win bilong ol egensim ol Illawara long yet ol West i tok olsem ol i mas winim ol yet long 5 points.

Win bilong ol Magpies na Cronulla i nekim ol Newcastle 22-0 i mekim na i bin gat bikpela pati tru long dispela liklik taun.

Tasol Langmack husat i mekim ol sapota i tingting planti long taim em i abrusim fil gol, i nogat as long komplek long dispela.

"Bai mi tokim yupela trupela stori olsem long namel long wik, mipela olgeta pilaia i bung wantaim na tok olsem mipela i mas winim ol Illawara long 5 points,"Langmack i tok.

"Wantaim wanpela minit long go, taim mipela i stap klostu long mak bilong ol, mi kisim bal na laik pasim i go long Andrew Willis, long wanem planti pilaia, i no luksave olsem mipela i stap wanpela poin bihain. Ol i lus tingting olgeta long promis bilong mipela.

"Mipela i kamap klostu long gol pos na i gat wanpela maka long fran, mi lukluk long klok na i gat 20 sekens i lep na mi ting olsem mi ken putim i go antap long mi yet.

"Bal i paitim gol pos na go autsait, mi bin wari long wanem mipela i lusim mani tasol mipela i winim pilai tu.

Ol Magpies i bin wet longpela taim tru long wanem long lukim olsem ol Cronulla i mas winim ol Knights long gimim ol West wanpela sans long pilai.

Ron i go insait long strongpela win, Paul Green wantaim ol Sharks bilong em i win ol Knights na ol West i kisim sans.

"Mipela i winim Cronulla long sampela yia i go pinis na mipela i bilip ating bai mipela i kamapim gutpela pilai egensim ol ol."

**SIDNI** Siti kosa wantaim poroman bilong em Bob Fulton i kamapim ol toktok bilong gren fainel long taim ol i surik isi i go pilai pilai bilong ol semi fainel. Manly bai bungim Sidni Siti long dispela wik Sande.

Gould husat em sait bilong em ino winim gut tumas ol Sidni Tigers 24-10 long las wiken i tokaut olsem i luk olsem sait bilong em bai painim hap-pela taim liklik long taim bilong gren fainel. Tasol em i senisim tingting bilong em gen bihain long kepten bilong Australia Brad Fitler, hapbek Adrian Lam, lulbek Iain Cleary na

## Fulton na Gould pait long ol toktok

seken rowa Luke Ricketson i bin pasim fitnes tes bilong ol long Mande. Tasol em i toktok yet na putim ol Rooster i go daun long sans bilong ol.

"Long lukim mipela wantaim ol narapela sait husat i stap long fom pinis, fom bilong mipela ino gutpela olsem bilong ol," Gould i tokaut.

"Tasol dispela ino min olsem mipela ino inap pilai gut long Septemba. "Egensim Manly yu ino

inap skorim moa long B o 10 poin long wanem ol i wanpela gutpela difensiv sait tru.

"Na ol i gat wanpela gutpela sait bilong atek tu na ino hat long ol long painim rot."

Manly kosa Bob Fulton i tokaut olsem ol Roosters i gat planti paia pawa we ol i ken mekim ol Manly i wari "Ol i tok olsem ol i gat ol dispela bagarap, na ol narapela pilaia i kisim bagarap, tasol ol i wanpela gutpela

sait tru na tu ol i gat gutpela kosa," Fulton i tokim SBS redio

"Na ol i gat ol gutpela pilaia bilong painim ol hul olsem Fitler, Lam na Tony Iro."

Wantaim tupela Nu Silan prop Terry Hermanson na Jason Lowrie ino inap pilai moa, ol Rooster bai putim olgeta hevi antap long han bilong olupela fowat Paul Dunn husat i bin winim wanpela primiasip wantaim ol Canterbury.

"Mipela i baim Dunn long pilai long dispela yia long mekim wanpela wok na dispela wok em i mekim gut tru."



• Philip Boge(olpela Kumul na Vipers kepten) wantaim bal i ron strong tru egensim banis bilong Paga Panthers long las wiken. Paga husat i maina primia i lus egensim ol Hawks. Hawks bai bungim Defence long gran fainel long dispela wiken.



• ANTAP: Faiv-eit bilong Paga Panthers A gret Norris Selu i autim bal long semi fainel pilai namel long ol na Hawks. Hawks i winim Paga na bai bungim Defence long gren fainel.



• Kosa bilong Defence anda 21 Kelvin Togatia(long sotpela trausis) i luk olsem em i wari liklik. Tasol nogat, tim bilong em i winim ol Paga Panthers na em i ken amamas.

**MOSBI LIG REDI  
LONG GREN  
FAINEL DISPELA  
WIKEN:**  
*Ol Poto: IVAN BAYAGAU*



• ANTAP: Nogat rot bilong go. Wapela Defence pilai i nogat rot long go egensim ol Paga Panthers long anda 21 divisen. Paga i lus long Defence.

• LEPHAN: Wapela Hawks pilai i kisim bal na i laik givim siksti i go long trai lain bilong ol Paga Panthers long A gret semi fainel las wiken.

TEAMS FOR FIRST WEEK OF RUGBY LEAGUE FINALS

FRIDAY, September 6:

**WESTERN SUBURBS v CRONULLA** at Parramatta Stadium (7.30pm)

**MAGPIES:** Andrew Leeds, Darren Willis, Paul Bell, Brandon Pearson, Aseri Laing, Andrew Willis, Steve Georgallis, Paul Langmack (c), Damian Kennedy, Bill Dunn, Justin Dooley, Nathan Lakeman, Harvey Howard. res: Ken McGuinness, Kevin McGuinness, Darren Capovilla, John Skandalis, Willie Newton (one to be omitted).

**SHARKS:** David Peachey, Mat Rogers, Andrew Ettingshausen (c), Paul Donaghy, Richard Barnett, Mitch Healey, Paul Green, Tawera Nikau, Nathan Long, Craig Greenhill, Les Davidson, Dean Treister, Danny Lee. res: Andrew Pierce, Martin Lang, Adam Dykes, Allan Bateman.

SATURDAY, September 7:

**ST GEORGE v CANBERRA** at Sydney Football Stadium (2.30pm)

**DRAGONS:** Dean Raper, Ricky Walford, Mark Coyne (c), Mark Bell, Adrian Brunner, Anthony Mundine, Noel Goldthorpe, Wayne Bartrim, Scott Gourley, David Barnhill, Luke Felsch, Nathan Brown, Jason Stevens. res: Lance Thompson, Colin Ward, Jeff Hardy, Troy Stone, Chris Quinn, Kevin Campion (two to be omitted).

**RAIDERS:** Ken Nagas, Steve Collins, David Boyle, Brett Mullins, Noa Nadruku, Laurie Daley (c), Steve Stone, David Westley, David Furner, Brett Hetherington, John Lomax, Steve Walters, Quentin

Pongia. res: Luke Davico, Bruce Mamando, Simon Woolford, Roger Kenworthy.

**BRISBANE v NORTH SYDNEY** at Suncorp Stadium (7.30pm)

**BRONCOS:** Robbie Ross, Michael Hancock, Steve Renouf, Willie Carne, Wendell Sailor, Kevin Walters, Allan Langer (c), Peter Ryan, Brett Green, Brad Thorn, Shane Webcke, Kerrod Walters, Glenn Lazarus. res: John Plath, Darren Lockyer, Tonie Carroll, Chris Johns.

**BEARS:** Matt Seers, Brett Dallas, Ben Ikin, Chris Caruana, Nigel Roy, Michael Buettner, Jason Taylor (c), Billy Moore, David Fairleigh, Greg Florimo, Steve Trindall, Mark Soden, Gary Larson. res: Brenton Pomery, Danny Williams, David Hall, Craig Wilson, Josh Stuart, Matt Toshack, Mark Reber, Jody Rudd, Dallas Weston, Sean Rutgerson, Paul Stringer, William Leyshon (eight to be omitted).

SUNDAY, September 8:

**MANLY v SYDNEY CITY** at Sydney Football Stadium (7.30pm)

**SEA EAGLES:** Matthew Ridge, Danny Moore, Craig Innes, Terry Hill, John Hopoate, Cliff Lyons, Geoff Toovey (c), Des Hasler, Nik Kosef, Daniel Gartner, Steve Menzies, Mark Carroll, Jim Serdaris, Owen Cunningham, David Gillespie (two to be omitted). res: Neil Tierney, Jack Elsegood, Scott Fulton, Craig Hancock, Matthew Dunford, Mathew Guberina.

**ROOSTERS:** Ivan Cleary, Darren Juinee, Matt Sing, Peter Clarke, Peter Jorgensen, Andrew Walker, Adrian Lam, Brad Fittler or Shane Rigon, Tony Iro, Luke Ricketson or Shane Millard, Paul Dunn or James Smith, Sean Garlick (c), Julian Troy. res: Nathan Wood.

ARL FINALS DRAW

WEEK 1 (elimination and qualifying finals):

• Friday, Sept 6, 7.30pm - Game A: Cronulla vs Western Suburbs at Paramatta Stadium (loser drops out)

• Saturday, Sept 7 2.30pm - Game B: Canberra vs St George at Sydney Football Stadium (loser drops out)

• Saturday Sept 7, 7.30pm - Game C: Brisbane vs North Sydney at Suncorp Stadium, Brisbane (winner progresses to Week 3)

• Sunday, Sept 8, 2.30pm- Game D: Manly vs Sydney City t Sydney Football Stadium (winner progresses to Week 3)

WEEK 2 (preliminary finals):

• Saturday, Sept 14, 2.30pm - Game E: winner of A vs loser of D at SFS (loser drops out)

• Sunday, Sept 15, 2.30pm - Game F: winner of B vs loser of C at SFS (loser drops out)

WEEK 3 (semi-finals):

• Saturday, Sept 21, 2.30pm- Game G: winner of C vs winner of E at SFS (loser drops out)

• Sunday, Sept 22, 2.30pm - Game H: winner of D vs winner of F at SFS (loser drops out)

WEEK 4 (Grand-final):

• Sunday, Sept 29, 2.30pm - The winners from week 3 at SFS.

MADANG RUGBY LEAGUE DRAW

Saturday September 7

- 12.00 Brothers vs Panthers U/17
- 1.00 Hawks vs Brothers U/19
- 2.00 Brothers vs Tigers A/Res
- 3.00 Panthers vs Brothers A

Sunday September 8

- 12.00 Royals vs Hawks U/17
- 1.00 Royals vs Tigers U/19
- 2.00 Hawks vs Trangau A /Res
- 3.00 Royals vs Tigers A

POINTS LADDER

Team	P	A GRADE					PTS
		W	D	L	F	A	
Brothers	20	13	1	6	390	257	27
Panthers	20	13	1	6	351	298	27
Tigers	20	9	3	10	277	301	21
Royals	20	9	2	10	277	301	20
Tarangau	20	7	3	10	256	286	17
Hawks	20	5	2	12	279	388	12
<b>A RESERVE</b>							
Tigers	20	11	3	6	312	201	25
Brothers	20	11	1	8	312	242	23
Hawks	20	10	3	7	240	232	23
Tarangau	20	9	1	10	261	284	19
Royals	20	7	3	10	232	262	17
Panthers	20	4	1	10	154	310	9
<b>U/19</b>							
Brothers	20	17	1	2	294	87	35
Hawks	20	9	1	10	184	169	19
Tigers	20	9	1	10	145	176	19
Royals	20	7	2	11	136	185	16
Tarangau	20	6	4	10	128	184	16
Panthers	20	5	1	14	127	219	11
<b>U/17</b>							
Brothers	20	15	0	5	198	79	30
Panthers	20	13	2	5	425	179	28
Royals	20	7	1	12	120	169	15
Tigers	20	4	2	14	59	185	10
Tarangau	20	4	1	15	109	200	9

# AUT LONG AFRIKA

SHARK PARK em i longwe tru long ol win i save blo long Afrika, tasol Cronulla fulbek David Peachy i soim ol sapota bilong em olsem Kenya em i namba wan hap tru taim em i brukim banis na ron.

Stail bilong em long ro i gat stail bilong ol man bilong ron long Kenya-na long ol sampela-olsem ol tim meit bilong em-em i gutpela samting tru long lukim.

Ol longpela leg bilong Peachy long karim em i go i save wok isi tru, tasol em bai tokaut olsem em i ron isi tru long wanem em i stail bilong em.

"Mi harim wanpela taim Peter Sterling i tok long TV olsem mi bin go isi tru long kisim bal egen-sim Manly," Em i tok. "Mi traim hat tru long dispela taim tasol long wei yu lukim mi ron bai yu ting olsem mi wok long isi."

Tasol i nogat wanpela samting i stopim Peachey long painim wanpela spes na go insait. Em i wanpela samting we i mekim em i wankain olsem ol strongpela man bilong ron long lig.

Em i luksave tu long dispela. Taim em i go insait logn sait bilong ol birua, em i save olsem em i wok long bihainim lek bilong biknem pilaia bilong Canberra Brett Mullins.

"Mi save amamas long dispela," Em i tok. "I nogat wanpela samting i gutpela long lukim wanpela sans na go het long dispela...dispela i namba wan tru."

Sampela taim mi save harimol sapota i singaut mi save tingting long mi yet, meit, yu mekim wanem long hia?"

Yangpela mangi ya husat i gat 22 krismas i save askim dispela long em yet taim em i kam kama-

long Sidni long 1992 long pilai wantaim ol Sharks.

"Mi bin wari tru long ples bilong mi long Dubbo na mi laik kisim ol samting na go bek planti taim tru," em i tokaut.

"Long namba wan 6-pela mun taim mi stap long Sidni, i bin nogut stret. Mi lusim meri bilong mi, Janine, bebi gel Ashleigh na mi wari tru long ol."

"Tasol mi bin laki. Wanpela biknem klab sapota nem bilong em Ronny Gordon i toktok long mi na save kisim mi go long trening na lukim olsem mi stap orit."

"Artie Beetson tu i lukim dispela na i mekim gutpela ol toktok long mi olsem mi mas stap na mi bin stap."

Peachey em i kain samting olsem man i go pas long ol Aborijies mang insait long NSW na em i save long wanem ol

samting bai kama long dispela.

Long taim dispela Sharks pilaia i go long ples, em i save kamapim ol kosing klinik long ol lokel skol. Taim em i lainim ol, wankain taim tu em i save tokim ol olsem edukesen tu em bikipela samting.

"Mi gat hai skol setifikek bilong mi. Na dispela em bikipela samting tru long mi sapos mi gat."

"Taim mi stap long hostel, planti ol mangi i save kam lukim mi. Mi mekim olgeta samting long lukim olsem ol i mas skol gut."

"Planti ol mangi olsem mi i save gat bikipela laik tru long pilai spots. Toktok bilong mi em i go long olgeta mangi, na ino ol abo tasol, em long lainim gut ol samting long skol."

"Nogat planti mangi i save mekim long spots, na sapos yu

nogat gutpela maks long skol, em bai ol samting i hat tru long yu."

Fes gret laip i no gutpela long pilai tumas long dispela fulbek husat i save smail olgeta taim. Las yia long raun 6, em bin brukim lek bilong em na ino pilai i go inap sisen i pinis.


Peachey i sakim tok olsem em i pilai-strong nau long wanem em i mekim ap long taim em i lusim na stap aut wantaim dispela bagarap long lek.

"Ya ol i bin tok olsem long mi," em i lap. "Tasol mi no tingting olsem, mi mekim wanem samting mi ken mekim."

Taim "mekim wanem samting mi laik mekim" i olsem i bikipela tru, em bin kama gut tru long dispela man husat i save ronolsem ol Kenya. Na i gat planti ol Sharks pilaia husat i rispekim.



# Starspot



## DARREN LOCKYER Brisbane

**Posisen:** Utiliti

**D.O.B:** Mas 24, 1977

**Weit:** 84 kg. Hait: 178 cm

**Wok:** Profesinel futbol pilai na wok olsem Dvelopmen Opisa wantaim Broncos

**Kar:** Nissan Bluebird. Driiman kar: ASV GTS

**Biknem pilai:** Wally Lewis

**Bikpela samting long laip:** Mekim fes gret long las yia

**Tingting long mangi bilong yu:** Terry Matterson i tok amamas long mi taim mi kisim seleksen long anda 12 tim bilong Kwinslen.

**Feveret Kaikai:** Speketi

**Feveret TV So:** The X-Files

**Bikpela taim long yu:** Winim Origin Series 3-0 bilong Kwinslen.

**Feveret Muvi:** The Rock

**Malolo longwe long futbol:** Mi save pilai golf

**Sapos yu gat 24 hour long stap laip:** Bai mi kisim advens long kontrak bilong mi na pinisim olgeta yet.

**Long husat yu laik em bai holim skin bilong yu bihain long pilai:** Demi Moore

**Sapos yu no pilaia bai yu kamap wanem:** Kapenta, long wanem mi gat setifikek long dispela.

**Laikim:** Win na kisim pei

**No Laikim:** Lus na nogat mani

**Yu save kaikai wanem bipo long pilai:** Pan cake o pasta

**Wanem em bikpela kaikai bilong yu long wanpela wik:** Red Rooster

**Yu tingting yet wanem samting taim yu kamap long fes gret:** Skoa. Mipela winim Parramatta 60-14.

**Husat Broncos pilaia i save helpim yu:** Kevin Walters, em bin wanpela utiliti pilaia bipo.

**Wanem samting i mekim Roma i save kamapim ol gutpela pilai:** Willie Carne i tok em wara i save mekim.

**Yu lusim wanem samting stret long Roma:** Ol poroman bilong mi...na kuk bilong mama.

**Wanem samting em Broncos i gat long dispela yia we ol i nogat long las yia:** Ating ol i gat moa strong na ol lain olsem Robbie Ross, Shane Webcke, Brad Thorn, Ben Walker i pilai strong tru nau.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.